


Mepuzho Ne Mikumbu

Pa Mupashi Wazhila

 Kabiji panyuma ya bufuku bwapita atweba twayulatu bonse. Amiwa naumvwa lushimuno lwawama leelo lwa bavula batambwile Mupashi Wazhila. Kabiji tuji bingi na lusekelo pa kikye.

² Kyalusekelo pa kwikala na Mulongo Graham bufuku buno, umo wabubiji mu lumvwang'ano ne atweba kuno wafuma ku tabbanako, aye kafunga wa ku kipwilo kyabuzhile monka mu Utica. Kabiji Mulongo Jackson, wajinga muno mukachi, bufuku bwapita, Naketekela byo kyajinga, nangwa aye uji kunyuma mu jibumba kuntu kumo pakino kimye, muntu umo wajikwaamba mba, mu. . . Ee, Namona Mulongo Jackson kunyuma mu jibumba. Kabiji—kabiji ne Mulongo Ruddell, uji muno bufuku buno? Ao ye mukwabo umo wamu lumvwang'ano ne atweba kuno ku “62.” Tunji na lusekelo pa kwikala nabo muno. Kabiji ne wetu. . . Oo, Mulongo Pat, kabiji ne bonse bo balongo bakwabo, tuji—kabiji ne momwa mu jibumba. Tuji bingi na lusekelo pa kutanwa nenu muno bonse bufuku buno.

³ Pano, inge Nakonsha kwikiwamisha, Nakonsha kuleta bamo ba mwi abo basapwishi bawama baamba kwi anweba, mambo akuuba mba Amiwa njina jiji jayoyooma kufuma pa kimye kyawama bufuku bwapita.

⁴ Pano, mukazhi wami, aye ye kololwa kwami; mwayukatu, balongo, Amiwa kyo mbena kwambapo. Aye waambile mba bantu bajinga kunyuma bufuku bwapita kechi bang'umvwinenga ne, mambo Naambijilenga mu kikye kintu. Kabiji pano, Amiwa kasa kyangye kutatula ne, Amiwa nsakweseka kintu kimo. Pano, Nakumya kana akyo kyawamatu. Bushe aje ke jishinda jawamatu koko kunyuma? Nangwa aje jawamatu? Aje jawamatu nyi? Pano, Mutemwe, akyo ke kimye kimo kyo Njina kiyukilo kyatama kwi obewa. Bino, baamba mba ajo jawamatu. Kijitu bulongo. Oo, ami! Awa ke mwanamukazhi. Ao kewawama, mambo papita kimye kyabaya kufuma po Najinga na umo. Aye kimye kyonse uji bulongo.

⁵ Kyawama, kine twajinga na kimye kyawama bingi pa kokwa kupwila kwa mafuku asatu; Amiwa byo naubile. Kabiji pano, matepu, onse kufumyako bufuku bwapita. . . Naichile Mulongo Goad ne ku mubuula amba eye asende matepu aku tabbanako. Bino kyamwekele kwikala kuuba mba Amiwa naumwine kuuba mba Billy Paul wajinga na motoka wanji kabiji waya, nanchi tepu kechi wajinga kwalepa ne byo Nayuka ne. Nanchi

atweba twapushilepo umo. Nafwaijilwe kutemwa kumulama mu kipwilo na mambotu a kipwilo—muntu umo wakonsha kwamba mba—byo twaketekela.

⁶ Pano, bufuku buno Amiwa nsakwamba pa *Aya Mbung'eno Ikatampe*, inge Nakonsha kupwisha mepuzho mu kimye kyaitabilwa. Kabiji nanchi, keesha lukeelo ke pwijilo ya lubuko. Kabiji tukalombelelanga bakolwa. Onkao mambo, atweba kechi twakonsha kupana ne—nangwa kuyatu na kwamba mba, “Pano, Amiwa nsakusenda obe, ne obewa, ne obewa.” Akyo kechi kyakonsha kwikalatu bulongo ne. Bino tupaana mulumba wa bitupa, kabiji monka mu byobya bitupa, Ngitapo bamo bacheche ku pulatifomu. Kabiji pano, inge Mupashi Wazhila watatula kusolola, apo ipo Pokiya kyapita mu jibumba ne kufumyamo bantu mu jibumba baakuya ku lubuko. Kabiji pano, keesha lukeelo, Amiwa kaambanga, inge Nkambo waswa, mpwijilo ya lubuko kasa ikyangye kwikalako.

⁷ Namona mukazhi wami ubena kuseka. Mutemwe, kechi ubena nkung'umvwa nangwa pachechetu nenyi? Oo, ubena nkung'umvwa. Kyawama, akyo kyawamatu. Aye wikalatu kunyuma kabiji inge kechi—kechi wakonsha nkung'umvwa ne, usukanya mutwe wanj, “Obewa . . . Kechi nakonsha kukumvwa obewa ne, kechi nakonsha kukumvwa obewa ne.”

⁸ Nanchi keesha—keesha bufuku ke pwijilo ya busapwishi ne lubatizhilo lwa mu meema. Kabiji pano, inge Napwishatu kusapwila keesha bufuku, tukazhikankanya bipembe ne kwikala na lubatizhilo lwa mu meema muno keesha bufuku. Inge Nkambo waswa, inge Nkambo waswa, mu kimye kya lukeelo Nasaka—nangwa keesha bufuku Nasaka kwamba pa mutwe wa: *Ke—Ke Kiyukilo Kya Painwe*. Kabiji pano, inge tukekala pano pa Kisatu bufuku, inge Nkambo waswisha amiwa kwikala muno pa Kisatu bufuku, Nasaka kwamba pa mutwe wa: *Twamona Kabaangabanga Kanji Ku Musela Kabiji Kyotwaishila Na Kumupopwela*. Pano, akyo ke bufuku bwakutwala pa Kimishimishi.

⁹ Kabiji pano, kupwishatu kukokoloka kwa Kimishimishi ke mulungu wakukokoloka kwa Kimishimishi. Apo ipo po tusenda makalata onse. . . Mulongo Mercier ne abo javula be asendamotu onse. Kabiji twiatachika onse, ne kulombelela pa ao makalata kabiji ne kwipuzha Nkambo kwitutangijila konse konse nkotukayanga muntanda.

¹⁰ Pano, baji keba, Bantu Basulu Benakilishitu, baji na kutachikwa kukatampe bingi, ako kukekalako ponkapotu mu mbung'eno yabo ku Florida. Kufuma kokwa kuya ku Kingston, kabiji ke kuya ku bena Haiti, kabiji ne kufika ku Puerto Rico, kuya ku South America, ne kubwela kupichila ku Mexico.

¹¹ Bino aye Nkambo kyamweka nobe ubena kutangijila kuya ku Norway. Amiwa kechi nayuka ene mambo ne. Anweba

mwayuka buuku wamucheche watelwa mba *Muntu Watumwa Kufuma kwi Lesa?* Ke kintu kya bupopweshi kinembwa pavula bingi mu Norway. Langulukaipo pa kikye, byauba Nkambo kokwa. Kabiji byo Najinga kokwa, kechi baswishishe mba mbiike maboko pa bakolwa ne. Najinga kookwa mafuku asatu. Kabiji abo kechi baswishishe kubika maboko pa bakolwa ne. Nanchi mwamona Lesa kyo akonsha kuuba. Jibumba jajinga jabaya bingi poso basenda ba kapokola, bambili, kabiji ne kufumyamo bantu mu mikwakwa pakuuba mba Mfike ku kifulo. Kabiji Amiwa kechi nabikile maboko pa bakolwa ne. Ne balombelejile nangwa byonkabyo; kwibaleka babika maboko abo umo pa mukwabo.

¹² Nanchi. . . [Muntu umo waamba kwi Mulongo Branham—Waku.] Ee, Amiwa kine kooba, nanchi. Bino, keesha lukeelo. . . Pano, bufuku buno, kape tusakuya mu ao mepuzho, mambo tuji na amo awama bingi. Kabiji kechi Nayuka ne kana Nkambo usa kwitulama bimye binga pa aao. Kabiji pano, keesha lukeelo nangwa Billy Paul, Gene, nangwa Leo, umo, ukekala kuno nakupana bitupa bya milombelo pa eiti kufikatu ne pa eiti-sate. Pano, bantu bafuma-mu-tauni ungi, lekai nekyambe jikwabo pakuuba mba kechi mukalubeko ne. Inge mwakonsha kutemwa kwiya mu mulaini, twakonsha kwikala na bantu bafuma-mu-tauni ungi inge kyakosheka kubiwa.

¹³ Bino, kimye kimo muno mu kipwilo tufika pantu pamo po baamba mba, “Kyawama. . .” Tusende bantu ba-mu-tauni ungi, baletai kuno. . . Muntu umo wamba mba, “Kyawama, Amiwa kechi nayukile kyatamine kwi abo ne. Abo kape babuulang’enenga kintu kyatama.” Nanchi mwataana bantu mu tauni; baamba mba, “Oo, anweba kape mwibayukile.” Nanchi. . . Nanchi abo baamba mba—kyaambiwa mba, “Kyawama, Amiwa nsakwimubuula mba, ke bitupa bya milombelo.” Kyawama, pano ngaabo babula kwikala na bitupa bya milombelo? Kabiji bikalako juba pa juba inge kiji. . .

Kwaamba ka? [Mulongo Branham waipuzha kubwela panyuma ya maikolofoni—Waku.] Kubwela panyuma ya maiki? Kyawama, mwayukatu, Amiwa kimye kyonse nsapwila pakachi ka mukwakwa. Nanchi kapepo Amiwa nsakwikisendatu muyewa musango. Bushe akyo kyawama? Akyo kyawama. Akyo kiji bulongo. Nsakwimubuula byo kiji. Kyetu—kyetu kyakwambilamo kyatama bingi kuno, kyatama bingi. Kabiji kechi tubena kukeba kwikala na kyawama pano ne, mambo tubena kukeba tabbanako wakatataka ashimikwe bukiji bukiji. Kabiji akyo kyo kimye kyo tukekala na mpuzha yabaya (mwamona?), inge twakonsha kwiya kuno na kwiibaishako pacheche ino mpuzha, kabiji ne kubikamo mampuzha akwabo, kabiji twaikala benengezha na mpwijilo kimye kyakwikala nayo kuno.

¹⁴ Kabiji pano, vulukai, mu lukeelo kelo bansongwalume,

umo nangwa basatu bakapananga bitupa pakachi ka eiti-sate, nangwa, eiti ne eiti-sate. Akyo kipana kimye ku muntu uji yense pa kuuba mba ekale bulongo. Kabiji Najikwambanga pa byo bapana bitupa, kika kyo twikyubila. Ke kyakulama mutende. Mwamona? Pano, ibyepi inge Naiya muno, nobe ponkapano ne kwamba mba, “Lekai *yuwe* mwanamukazhi, *yuwe* mwanamukazhi, ne *yewa* mwanamulume, ne *yuwe* mwanamukazhi. . .?” Mwamona, akyo kyakonsha kwikala— akyo kyakonsha kwikala kyakosa. Mwamona? Kabiji pano, inge anweba. . . Bimye byavula Nguba kikyeye. Kabiji inge kechi bavula mu lukeelo kelo ne, Nakonsha kuuba kintutu kimo. Amiwa nsakwamba mba, “Baanga bantu muno bafuma mu muzhi ungi baji na kintu kyatama kwi abo? Anweba imanai.”

¹⁵ Mulongo Mercier, anweba mwaiya na nkupulushako. Anweba musakukwasha nyi? [Mulongo Mercier waamba mba, “Amiwa mbena kwiya na kukupulusha.”—Waku.] Oo, anweba mubena kwiya. . . Aye ubena kwiya na kwipulusha aye mwine. Najikwamba ku mutemwe obe nsongwakazhi leelo. Bino, wafwainwa kwikala wawama bingi kwi amiwa. Mwamona? Kijitu bulongo. Akyo kyawama. Na—Nakomoka akwa kunshipa Mulongo Leo. Inge kechi kiji bulongo ne, twayai—twayai twikyube bulongo monka mo twafwainwa kwikyubila, monka mo twakonshesha kuuba bulongo.

¹⁶ Nanchi pano kwikalatu, kwipuzha bantu bafuma-mu-mutauni ungi kusutulako maboko abo aba baji na kintu kimo kyatama. Kabiji pano imanaitu ponkapo, zhijikai muntu umo poso Mupashi Wazhila watatula, ne kukumbana mu jibumba jonse. Baanga bajinga muno byo bamwene kyokya kyaubiwa mukachi muno? Kine! Monai, mwamona? Nanchi kechi kijipo nalukatazho ne. Kijitu. . .

¹⁷ Nakeba anweba kuvuluka kikyeye, kabiji Amiwa nkeseka kupitamo jibiji lukeelo. Bangentila, Mamboawama apewa kwi abo ke Mamboawama a lwitabilo, kechi ke a mingilo ne. Mwamona? Kabiji nobe byonka byo Naambile bufuku bwapita. Kimye Mupashi Wazhila kyo aponene pa Pentekositi, byo baile ku Bayudeya bajinga kokwa (Byubilo 19:5), babikile maboko pe abo pakuuba mba Bamutambule. Kabiji byo baile ku bena Samaliya, babikile maboko pe abo. Pakuuba byo bafikile ku Bangentila mu nzubo yakwa Koneleusa, “Kimye Petelo kyo a kyambilenga bibye byambo. . .” Kechi kwajinga kubikapo maboko ne.

¹⁸ Kimye nsongwakazhi mucheche kyo afwile, mwaana wamukazhi wakwa Jailosi, ng’anga, waambile mba, “Iyai mubikepo maboko pe aye, kabiji usakwikala na bumi.” Pakuuba mushilikale mwina Loma, awa Ngentila, waambile mba, “Amiwa kechi nafikilamo kuuba mba Anweba mwiye mushi ya mutenge wami ne, ambaitu kyambo.” Abo byokiji. Mwamona?

19 Awa mwanamukazhi waku Sailofenisha, wajinga Mungiliki, kimye aye—kimye Yesu kyo amwambijile, waambile mba, “Kechi kyafwainwa Amiwa kutola shinkwa wa baana ne kupana ku bakabwa ne.”

Aye waaambile mba, “Akyo kyakine, Nkambo; bino nangwa byonkabyo bakabwa baja twa baana tupona kutebulu.”

Aye waambile mba, “Mambo a kikyee kyo waamba, diabola wamuleka mwaana obe wamukazhi.” Ambaipo bintu byawama nanchi. Ambaipo kintu kimo kyawama pa muntu umo. Ambai pe Yesu. Ambaipo kintu kimo kyanema, kintu kyakine. Ajo jo jishinda ja kufumishamo ba diabola. Aye kechi waambile mba—Aye kechi wamulombelejile nsongwakazhi ne. Aye kechi waambilepo kintu kimo pa mambo akubukiwa kwanji ne; Aye waambiletu mba, “Na mambo a kukwe kwamba, na mambo a kukwe amba. . . .”

20 Hattie Wright, juba jikwabo, kechi waipwizhepo kintu nangwa kimo ne. Aye waikela byobya, bino waambile kintu kiji bulongo, akyo kya mutokejile ku muchima Mupashi Wazhila. Kabiji ne Mupashi Wazhila wa mukumbwile ne kwamba mba, “Hattie, ipuzha kiji kyonse kyo usaka, kiji kyonse kyo uji nakyo nangwa kyo ukeba. Yukai kana kikyee kyakine nangwa ine. Ipuzhai kiji kyonse (lubuko lwa kasaji wachepa mubiji kilema waikala popa wivungavunga; teni sausande maddola a kumulekesha kupoya ku tutumbatumba tuji kokwa; ba yufi babwezhiwe ku mubiji wanji-wakooka); kyonse kyo mwakonsha kukeba kwipuzha, anweba kipuzhai ponka pano. Inge Kyabula kwiya na kupewa kwi anweba ponka pano ne, nanchi Amiwa ne ngauzhi wabubela.” Akyo—akyo kyo kintu kimo, kechi ibyo nenyi?

21 Yesu waambile mba, “Amba ku yuwe mutumba. . . .” Kabiji mwaumvwa—pa bintu byaubiwa; ao ye mwingilo ye tubena kutwelamo. Tubena kuya mu mukwakwa pakino kimye. Katatakatu Kwiya kwa Nkambo Yesu kufike. Kabiji twafwainwa kwikala na lwitabilo lwa kushikulwa mu Kipwilo lwakonsha kwalulwa mu kakimye kacheche, pamo nobe kukopa kwa jiso ke kuya, inge ne atweba kechi tukaya ne. Bino kechi musakamane ne, kukekala konka. Kukekala konka. Kabiji umvwe bulume bwa *kikyee* kipwilo kwasutulwa, bukaleta balongo baabo; bulume bwa *kyokya* kipwilo kwasutulwa, bukaleta balongo baabo; bulume bwa *kyokya* kipwilo bukaleta balongo baabo; nanchi kukekala lusanguko lwa bonse. Kabiji ne atweba tubena kupembelela kuya kulutwe.

22 Pano, kulubako ne, bitupa bya milombelo lukeelo eiti koloko kufika ne pa eiti-sate. Pano Nebepuzha kika kyajingamo, nanchi lekaitu kupana bitupa, ne kubwela kunyuma, kabiji mwaikala (mwamona?), mambo be apana onse pakyokya kimye nangwa byonkabyo, nangwa bekaletu bavula bakonsha kufumamo.

Bansongwalume bakemana, bamvwakanya bitupa byonse ku meso enu, pano umvwe mwakeba kimo, mwakeba kimo, nangwa bikwabo bya yewa musango. . . Nanchi pano umvwe Naiya, Amiwa nkoobatu. . . Konseko Nkambo ko akonsha kwamba mba ichila kukwe. . . Kabiji inge Aye waamba mba, “Kechi mwite nangwa pachechetu ne,” Amiwa kechi nsakwita nangwa umo ne (mwamona?), monse mo kyaikela.

²³ Kabiji Amiwa. . . Aya nyingijilo ibena kuya na kupwa nangwa byonkabyo; kuji kintu kimo kikatampe kibena kwiya. Vulukai, amo momo kyaambiwa kuno kupulatifomu nangwa kuno ku pulupiti, kabiji kechi kyakikakalwapo ne. Anweba mwavuluka nyingijilo ya pa kuboko? Monai byo kyaubile? Milanguluka ya mu muchima, monai byo kyaubiwe? Pano monai kikye: ambai Kyambo, kabiji monai byo Kyubiwa. Mwamona? Nemubuujile myaka yapita kunyuma—kipwilo (Mbeni kwamba ku tabbanako)—myaka yapita kunyuma, isatu nangwa myaka foolo yapita, kintu kimo kibena kuya na kumwekanyika; kibena kuya na kufikizhiwa. Kabiji papo ke kimwekanyike kuya mu. . . Kibena kwilenga akyo kine. Bino, twasata pa kyokyo. Oo, twakila bingi mukusata. Njibingi na lusekelo.

²⁴ Bino, tuji na mepuzho akosa bingi kuno, kabiji tubena kukeba kutwela monka. Muntu umo watajile pa onse o mabuuku o Najinga nao. Naambile mba, “Kyawama, muntu wajimuka ukebatu umo.” Bino Amiwa kechi ne muntu wajimuka ne. Nafwainwa kwikala na avula a kutalamo. Kyawama, awe ke Diyagoloti, kabiji awe ke Baibolo, kabiji awe ke konkodansi. Nanchi ke. . . Tusa kwipuzha Nkambo pakuuba mba etukwashe kutangijila kukumbula ao mepuzho monka mwaila kyaswa muchima Wanji wa Bulesa kabiji ne Kyambo Kyanji.

²⁵ Nanchi pano, twayai tukunyike mitwe yetu pa kakimye kacheche tulombe. Nkambo, twasata kwi Anweba kufuma panshi ya muchima wetu pa byo Mwitubila mu ano mafuku asatu apita. Oo, pa kumona mbung’eno ya bamingilo kunyuma kokwa mu kibamba ne kwiimuna maboko, kabiji ne kusangulula lwitabilo, kabiji—kabiji ne tapulo ipya yasendwa. Kwita pa foni. . . Kabiji ne michima yetu yasangalala, kabiji bantu kutambula Mupashi Wazhila panyuma ya—ya kumona Kyambo Kyenu, byo Kibuulang’ana tapulo pa tapulo mwakutambwila Mupashi Wazhila Wenu. Twasata bingi pa kyokyo, Nkambo.

²⁶ Anweba mwalenga bintu kwikala byapeela bingi kwi atweba, mambo a kuuba mba twi bantu bapeela. Kabiji twalomba, Lesa, amba—mba Anweba musakwituleka atweba bene kwikalatu bekepesha kimye kyonse. Mambo kiji. . . Awa ye musango wikepesha aye mwine ukatumbijikwa. Kabiji maana a panopantanda ke bumbulwa maana kwi Lesa; akya kyasekeshe Lesa kupichila mu kukosama kwa kusapwila mu kwibapulusa aba balubilamo.

27 Kabiji pano, Taata, kuno kuji mepuzho avula mu maboko ami ao aipuzhiwa kufuma ku michima yabukishika ayo yatako muchima. Kabiji jimo jakumbulwa bibi jakonsha kutwala muntu mungi, ne kupana kyeya kingi pa jipuzho jabo ajo jibena kwibakatazha. Nanchi Nkambo Lesa, Nalomba mba Mupashi Wenu Wazhila usa kwenda pe atweba kabiji ne kusolola bibye bintu, mambo kyanembwa mu Binembelo mba, “Lombai kikemupewa; kabiji ukeba ukekitana; kokoshai kabiji kikakushikukila obewa.” Kabiji abyo byo tubena kuba pakino kimye, Nkambo, na kukokosha ku kibelo Kyenu kya lusa. Kasa twaimana mu kivule Kyenu kyabuchibishi bwamambo bwaoloka bwa Bulesa, twasashijila Mashi a Kilishitu akwa Lesa kabiji ne ku Mupashi Wazhila.

28 Kabiji kechi twaiya bufuku buno na mambotu akuuba mba twafuma mu mafuku asatu akusapwila pa Mupashi Wazhila ne, twaiya na munema wabaya bingi kabiji ne bukishika. Twaiya nobe buno bo bufuku bwapelako bwakwikala na bumi pantanda. Twaiya na luketekelo amba Anweba musakukumbula milombelo yetu. Kabiji Nkambo, twalomba kwi Anweba amba mwitwikushe na Bumi Bwenu Bwapeenape. Kabiji pa kupana mukumbu wa mu Kyambo Kyenu, lekai Mupashi Wazhila, Anweba Lesa, byo twatana mba ke Anweba bene muji mukachi ketu, twalomba mba Aye usa kusolola kwi atweba bufuku buno bintu byo tubena kukabila. Kabiji twakabila mba myeo yetu ikale yakokoloka, kabiji ne milanguluko yetu ikale na mutende, kabiji ne kwikala na lwitabilo mwi Lesa lwa kwenda kuya kulutwe na kukeba mapesho Omwalaile. Twaipuzha kiky mu Jizhina ja Yesu. Amena.

29 Pano, Njina mepuzho onse ao apewa kwi amiwa, kanatu jimo. Kabiji Nakumbwile Mulongo Martin wa muचेचे ao wangipwizhe jipuzho bufuku bwamasoshi, jajingatu jimo. Kwajinga avula kuno bufuku bwapita, bino byajinga bya kukabila milombelo. Kabiji Mulongo Martin wangipwizhe jimpuzho pa Yoano 3:16—*nan-gwa Yoano 3, Naketekela, pa, “Kanutu muntu wasewwa mu meema ne ku Mupashi, aye kechi wakonsha kumona Bufumu ne,” kabiji ne kwikyesakanya pamo na tepu ao ye Natuma pa Bahebelu. Kabiji Namukumenye mu kibamba kyakunyuma kuno mabaanga abufuku, kabiji—Amiwa kasa kyangye kwikala na jishuko ja kumukumbula ne, kabiji pano Nekyubile kokwa, pa mutwe walufujisho.*

30 Bino, mujipo umo muno wabujileko bufuku bwapita nyi? Twayai tumone maboko enu, abo babujileko kuno bufuku bwapita. Oo, atweba, kine twakebelenga mwaikalala ne atweba. Twajinga na kimye kyawama bingi. Aye Mupashi Wazhila. . .

31 Nakonsha, pa mineti umo. . . Kechi kyakonsha kukozhang’ana ne. Abye byabikwa pa tepu. Kabiji inge wamwingilo uji yense wamweka nobe—*nan-gwa muntu wakonsha kupachika pa byo Mbena kukeba kwamba kino*

kimye, nangwa mu mepuzho, Naipuzha, mulongo, namba kechi mwikilanguluke nobe kyenyi ne, kana kuuba mba—vulukai mba awe tepu ubena kulengwa mu tabbanako wetu muno. Tubena kufunjisha ku bantu betu. Bavula bamwingilo ba lwitabilo lwapusanako baikala muno. Kabiji Nakonsha kutemwa kuya mu lufunjisho ne jikwabo, mambo kwajinga bantu bamo babujile kutwela bufuku bwapita abo bo Namona baji mukachi bufuku buno. Kabiji Nakonsha kutemwa kupitamoo kakimye kachechetu, inge mwakonsha kwikiswisha, pa byo Naambile mabaanga abufuku; kabiji akya kyajinga pa Pentekositi, pa kutambula Mupashi Wazhila.

Pano, kutanga kufuma mu *Emphatic Diyagoloti* wa tutulwilo ya mulaka wa Kingiliki, amo Monajinga mabaanga a bufuku bwapita, ao wazhikulwa kulutwe yami ponkapano. Ayo yo tutulwilo itanshi kufuma mu Kingiliki kuya mu Kizungu. Kechi kyapitapo mu bakwabo batutulula ne, kiji—ne mabuuku akwabo, kyafumatu mu Kingiliki kuya mu Kizungu. Bino, byambo bya mu Kizungu, bimye byavula biji na byo byalumbulula kwi abo, nobe byonka byo Nakonsha kwamba pa kino kimye, *board*. Tola kyokya kyambo kya *board*. Wakonsha kwamba mba, “Kyawama, kyalumbulwile mba atweba twamulengejilenga *kitendwe aye*.” Ine! “Oo, aye—aye walipijile *board*.” Ine! Kyawama, aye. . . “Ke *jipulanga* kulubaji lwa nzubo.” Kyawama, mwamona? Nangwa kimo kya byobyo. . . Kuji foolo nangwa faivi byambo byapusana byakwingijisha; wafainwa kusenda mukuku yense wa byambo. Kyambo kya *see*. *See* kyalumbulula mba “kukwatakanya,” mu Kizungu. *See* kyalumbulula mba “ke mvujilo ya meema.” *See* kyalumbulula mba “kotalapo.” Mwamona? Pakuuba pa bibye bilumbululo, kyambo kyaingijishiwa papo, kyo Naambilepo bufuku bwapita mu Byubilo kyapitala kyabu 2, apo po kyaamba mba, “Njimi ya mujilo yaikele pe abo. . .” Pano, Nakonsha kutemwa kubwela panyuma kakimye kachechetu. Mwakonsha kutemwa kwikyuba, pa kimye kicheche, nobe kupitulukamo kimye kicheche kasa tukyangye kuya kwalepa?

³² Pano, zhikulai, mu King James wenu nangwa buuku yense ye mubena kutangamo. . . Kabiji Nakeba kwikitanga. Kabiji mutelekeshe bulongo pano. Kwikyumvwina mungi ne. Bavula leelo, ne nyenga yami, bavula ba mwi abo baitwa, amba. . . Mrs. Morgan. . . Bavula mwi abo bajingamo mabaanga a bufuku bwapita. Mrs. Morgan ye umo wa banyenga yetu bobakakelwe; kabiji wajinga pa bantu banembwa kufwa ku Louisville pa myaka sikisitiini, myaka sebetiini yapita na kaasa. Naketekela mba waikala muno jibiji kunyuma bufuku buno. Aye kechi wakonsheshe kumvwa ne, waambile mba, mambo Naambijilenga mu maikolofoni. Kabiji na mambo a abo Mbena kukeba kubwelapo pa kikye kakimye kacheche.

³³ Pano, Mbena kutanga kufuma mu kikye Kinembelo kya

Byubilo 2:

...*kimye juba ja Pentekositi byo jafikile, bonse bajingatu mu mulanguluko umo...*(Bino, Natemwa kyokyo kukila kwikala mu buumo: mambo wakonsha kwikala na buumo pa mutwe uji yense, bino papo milanguluko yabo yajingatu pamo.)...*mulanguluko umo kabiji kasa baji pa kifulo kimo.*

Kabiji ponkapotu kwaishile kilulumo kufuma mwiulu nobe kupupa kwa lubesha lukatampe, kabiji kyayuzhizhe...mu nzubo yonse mo baikele. (Kechi kufukama ne, kechi na kulomba ne, kasa baikalatu.)...

...Yaabanwa *njimi...*(N-j-i-m-i-njimi. “Kasa yaabanwa” kyalumbulula mba, “kwabenamo.”)...*Njimi...yamwekele kwi abo...nobe...mujilo, kabiji umo...*(“Umo,” kintu kimo)...*waikele pa umo umo wa mwi abo.*

Kabiji bonse bayuzhiwe...(“Kabiji,” kunungakanya.)...*bonse bayuzhiwemo na Mupashi Wazhila, kabiji batatwile kwamba na njimi ingi, monka Mupashi mo ebapejile mulaka.*

Kabiji mu Yelusalema mwaikajile Bayudeya, batekanya, bafuma mu mikoka yonse ya muno munshi.

...*kabiji kino byo...kabiji byo kyaumvwanikile, jibumba japwijile pamo po baji, ne bulaka bwibanshikile, mambo...bonse be bomwine abo... na kwamba mu milaka yabo obe bene.*

³⁴ Pano monai! Kimye mujilo byo aishile, wajinga njimi; byo baambilenga, kyajinga ke mulaka. Bino, paji lupusano lwabaya bingi pakachi ka njimi ne milaka. Kwi atweba bijitu pamo. Bino, mu Kigiliki, “njimi” kyalumbulula *kikye*. [Mulongo Branham wasombolola muntu umo ubena kwenda—Waku.] Kutwi ke *kikye*. Mwamona? Akyo kechi kijipo na mulaka ne; kyalumbulula lubaji lwa mubiji obe ao ye lujimi. Inge mwamona, kyatutululwa mba *njimi ya mujilo* akyo kyalumbulula “nobe njimi,” kijitu pamo nobe kulakauka kwa mujilo, ke kulakauka kwa mujilo kwalepuluka. Pano, monai kukokomesha. Kabiji ponse po pabifulo, kechi mulubeko ne.

³⁵ Pano, tusa kupana kisela kicheche bufuku buno. Kabiji Nsawkikileka kwi obewa mwine. Pano vulukai, inge kintu kimo kyapusanako, akyo kiji kwi obewa. Bino jishindatu muntu yense jo akonsha kutambwilamo kintu kufuma kwi Lesa ke kupichila mu lwitabilo. Kabiji kasa ukyangye. . .

³⁶ Nafwainwa kuyuka kyo Mbena kuuba kasa Kyangye kwikala na lwitabilo mu byo Mbena kuuba. Kika kyakusongwela mukazhobe? Wajinga na lwitabilo mwi aye. Obewa wamwesekele, wamutajile, wamona kokwa ko afumine, wajinga

ng'anyi. Abyo byokiji na Kinembelo, kwi Lesa. Akyo kyo kilengela bibye bimwesho, awa—awe Mumbulungwa wa Mujilo, byonse bye bintu, mambo Lesa wikilaile. Lesa ye waambile byobyoyo. Amiwa na mutopele Aye monka mu Kyambo Kyanji kabiji nayuka mba Kya Bukine. Kabiji anweba mwalondela Kyambo Kyanji. Nanchi inge kuji kulubakana kucheche pantu pamo, nishi pajipo kintu kimo kyatama pantu pamo. Mambo Lesa (telekai!)—Lesa kechi ye waubiilepo nangwa kechi ukengilapo pangye Yanji mwine—nangwa byapusanako na mizhilo Yanji ne. Kimye kyamashika kechi kikeya mu kimye kyakisalo ne, kabiji kimye kyakisalo kechi kikeya mu kimye kyamashika ne. Mabula kechi akonsha kupona mu kimye kyalutepu kabiji abwela aiya mu kimye kyamayoo ne. Kuuba mwikilenga kyaikala byobyoyo ne.

³⁷ Nobe byonka byo Naambile bufuku bwapita na nsulo itupauka meema, itekezha bijimwa byenu. Nangwa inge waimana kuno pakachi ka bujimi, kabiji ke fishi ifita, kabiji wakonsha kwamba mba, “Oo, malaiti akatampe, Nayuka mba anweba muji mu bujimi. Bino, Amiwa na lubilamo, kechi nayuka Nkombena kuya ne. Panai kyeya, pakuuba mba Mone byo nakonsha kwenda! Kuji malaiti avula bingi a kumwesho kyeya mu bujimi.” Akyo kine. Ee, mwane! Muji malaiti avula bingi mu kino kibamba a kupana kyeya kwakubula ne kwambula malaiti, kwakubula ne kyokya ne. Bino wafwainwa kwiatangijila. Pano, wafwainwa kubijika kyabaya poso wakakalwa ne kutwajijila na kubijika, kechi kyakonsha kupana kyeya ne. Pakuuba umvwe wakonsha kwingila mwaila mizhilo ya malaiti, ipo po ukekala na malaiti.

³⁸ Kyawama, ajo jo jishinda jimo byokikala mwi Lesa. Lesa ye Mulenga mukatampe wa meulu ne ntanda, ye umotu keesha, leelo, ne myaka yonse. Aye ukijitu Lesa. Bino Aye ukengilatu monka mo mulondela mizhilo Yanji ne mikambizho. Balunda, Naamba kikye: Amiwa kechi ne kimonapo kukakalwa ne, kabiji kechi kikobiwa ne.

³⁹ Pano, twayai tumone. Yesu mu Luka 24:49 wakambizhizhe batumwa panyuma ya kupuluka kabiji ne kutokeshiwa monka mwaila Kyambo; ne kubingishiwa kupichila mu kuketekela mwi Nkambo Yesu; batokeshiwa mwi Yoano 17:17 kimye Yesu kyo aambile mba, “Bazhijikai, Taata, kupichila mu Bukine. Kyambo Kyenu bo Bukine.” Kabiji Aye wajinga Kyambo.

⁴⁰ Pano, wibapele bulume bwa kubuka bakolwa, kupanga bademona, kusangula bafwa; kabiji babwelele kasa basangalala. Kabiji mazhina abo ajinga mu Buuku wa Bumi wa Mwanamukoko. Mwavuluka byo twapita mu kyokyo. Bino nangwa byonkabyo kechi bajinga baaluluka ne. Yesu wabujile Petelo bufuku bwa kupopwa Kwanji, Aye waambile mba, “Panyuma ya kwaluluka, ukakoseshe balongo bobo.”

41 Aye Mupashi Wazhila uba . . . Obewa waketekela kuya ku Bumi Bwapeenape, pakuuba Mupashi Wazhila inge waiya Ke Bumi Bwapeenape. Obewa waitabila kuya ku . . . Anweba mwi baimitwa ku Mupashi ponka pa kutokeshiwa, bino kechi mwasemwa ku Mupashi ne kanatu Mupashi Wazhila waiya. Akyo kyaitabilwa. Mwaana walukeke uji na bumi munda mwainanji, misunyi icheche itatula kwendauka; ke bumi. Bino kikala ke bumi bwapusanako inge kapema mwela wa bumi mu myona yako. Ke kintu kyapusanako. Abyo byobyoyo kiji, ke . . .

42 Mulongo wami mutemwe waki Methodist, kabiji Pilgrim Holiness, kabiji ne ba Nazarene, lubatizhilo lwa Mupashi Wazhila lwa pusanako na kutokeshiwa. Kutokeshiwa ke komvwewa, alo ke lunengezho lwa Bumi. Pakuuba umvwe Mupashi Wazhila waiya, Ke Bumi. Lunengezho ke komvwa kipe; Mupashi Wazhila ke kuyuzha kipe. *Kutokeshiwa* kyalumbulula mba “komvwewa kabiji ne kubikwa pa lubaji kupembelela mwingilo.” Aye Mupashi Wazhila wiikibika mu mwingilo. Obewa wi kipe akyo Lesa kyo aomvwa.

43 Kabiji twatana kuuba mba Mupashi Wazhila ye Lesa Ayemwine mwi obewa. Lesa wajinga peulu yenu mu Mumbulungwa wa Mujilo ne Mosesa. Lesa wajinga ne obewa mwi Yesu Kilishitu. Pano Lesa uji mwi obewa mu Mupashi Wazhila. Kechi balesa basatu ne, Lesa umo ke engile mu maofweshi asatu.

44 Lesa mwine kwi kepesha, kwiya kufuma peulu ya muntu. Aye kechi wakonsheshe Kumukwata ne, mambo walengele mambo mu bujimi bwa Edena kabiji ne kwi abanya aye mwine kufuma ku lumvwang’ano Lwanji lwa bupopweshi. Pano kika kyamwekele? Aye wafwaijilwe kwikala peulu yanji. Mashi a bang’ombe ne a bambuzhi kechi akonsheshe kuleka Aye wabwela mu lumvwang’ano lwabupopweshi na muntu ne; bino kupichila mu mizhilo ne byatongolwa, abyoyajinga kivule kya kino kimye kibena kwiya, kya kupana bang’ombe balume, ne bikwabotu, ne mikoko . . . Nanchi kimye Lesa kyo aishile ne kwikala mu mubiji watokeshiwa, kisungu wasemwa ku mwanamukazhi, ao Lesa Ayemwine . . . Mwayuka Lesa byo aubile nyi? Aye—Aye kafwako kyoaubilene bino . . . Aye wabikile Tente Wanji mukachi ketu. Lesa wayikele mu Tente watelwa mba Yesu Kilishitu. Aye wabikile Tente Wanji pano ne atweba, mambo . . . (Amiwa ka—sapwilanga pa kyokyo mu lukeelo, nanchi kyawama akyo ne kilekatu.) Pano, mba—awa tente wa Lesa-byonkabyo waikela na atweba . . .

45 Kabiji pano Lesa uji mwi atweba. Yesu waambile mu Yoano 14, “Mu joja juba mukayuka mba Amiwa nji mwi Bataata, ba Taata mwi Amiwa, kabiji Amiwa mwi anweba, ne anweba mwi Amiwa.” Lesa mwi atweba. Eene mambo ajinga ka? Pakuuba mba afikizhe lunengezho Lwanji.

⁴⁶ Lesa wajinga na mutanchi. Aye wakebelenga kwingila mukachi ka muntu, kabiji Aye wamuletele mu Mumbulungwa wa Mujilo, awa wajinga Mujilo wafyamika wakobamine pa baana ba Isalela. Pano awa Mujilo umo wasolwelwe mu mubiji wa Yesu. Kabiji Aye waambile mba Wajinga yewa Mujilo, “Kasa akyangye kwikalako Abulahama, AMIWA NSAJIPO.” Aye wajinga yewa Mujilo. Aye waambile mba, “Nafuma kwi Lesa, kabiji Nkabwela kwi Lesa.” Kabiji panyuma ya lufu Lwanji, kuzhikwa, ne kusanguka, Paulo Wazhila wamukumenye Aye pa mukwakwa—jizhina janji sajiji Saulo—mu mukwakwa wakuya ku Damasakasa, kabiji Aye waalulukile jibiji ke Mumbulungwa Wamujilo. Akya Kyeya kya mupofwele meso anji. Abyo ibyo.

⁴⁷ Kabiji byo Aji leelo, Mumbulungwa wa Mujilo umotu, Lesa umotu kasa abena kuuba biyukilo bimo, mingilotu imo. Kika? Aye ubena kwingila mukachi ka bantu Banji. Aye uji mwi atweba. Ami. . . Aye uji ne anweba pa kino kimye, “bino Amiwa kekala mwi anweba. Amiwa kekala ne anweba, ne mwi anweba, kufikatu ne kumpelo ya byonse,” mpelo ya ntanda. Aye ukekala ne atweba.

⁴⁸ Pano, monai. Yesu wibakambizhe kuya ku Yelusalema na kupembelela. Kyambo *kupembela* kyalumbulula mba kulomba ne, kyalumbulula mba “kupembelelako.” Abo kechi bafikijilemo kusapwila ne, mambo abo bayukiletu lusanguko Lwanji mu Bumuntu Wanji, byo bamumwene Aye pa mubiji. Aye—Aye wibakambizhe mba kechi batwajijile na kusapwila ne, kechi kubapo nangwa kimo ne patanshi kana bayuzhiwa na Bulume bwafuma mwiulu.

Amiwa kechi naketekela mba musapwishi uji yense watumwa kwi Lesa ne nangwa wakonsha kwikajikwa bulongo. . . Mambo Lesa ke wabula mpelo. Kabiji Lesa kyo oba jimo, Aye wikyubatu kimye kyonse. Pano, inge Lesa kechi wibalekele kusapwila ne poso byo baile ku Pentekositi ne kutambula kyakupitamo kya Pentekosito, kafwako muntu ne, kanatu nkebelelo yanji mwine nangwa ya kabungwe kamo kamutuma mu mwingilo, kechi uji na nsambu yakutwela mu pulupiti ne poso wayuzhiwamo na Mupashi Wazhila. Abyo kine ibyo. Mambo aye ubena kwibatangijila na maana a buyuke bwa kabungwe posotu byo ayulamo na Mupashi Wazhila; kabiji pano, ubena kupana kajo ka nkunda; *Aye Mwanamukoko ne Nkunda*, byonka byo twaambilepo bufuku bwapita.

⁴⁹ Pano monai. Aye waambile mba, “Yainga ku Yelusalema kabiji mukekale konka; pembelelaitu konkakwa poso Natuma mulaye wa ba Taata.” Kabiji pano, baubile byepi? Kwajinga wanu aduleendi ne tweti ba mwiabo, mwanamulume ne banabakazhi. Baile pa nzubo ya peulu pa tempo.

Pano, kyafwenyeshenga ku juba ja Kijilo kya Pentekositi,

kufuma ku kutokesha kwa nzubo yazhila, kwipaiwa kwa mwanamukoko wa lupitalo poso kwiya kwa—kwiya kwa Pentekositi, ako kwajinga kunowa kutanshi kwa somo, yubili, yubili wa Pentekosito. Kabiji ne pa bishimikwa . . .

⁵⁰ Bino, Amiwa nafika mu byaalo. Byaalo byakala byajinga na ndandalashi yakajila peulu mukachi. Ndandalashi yakajila peulu yajinga pangye. Pangye ya tempo, twabulwa mba, kwajinga ndandalashi yaile peulu mu kakibamba kacheche kalepuluka; kuya peulu, kabiji peulu, kabiji peulu, poso mwafika mu kakibamba kakacheche popa, kiji nobe butala bwa peulu ya tempo, kiji nobe kakibamba kakacheche, pa kibamba kyapeulu. Kabiji Baibolo yaamba mba bajinga mukachi kabiji ne bizhilo byashikikile, mambo bajinga na moyo wa ba Yudeya, mambo bafwaijilwe kwi bataaula na mambotu a kupopwela Nkambo Yesu, panyuma ya kwa Kefasa ng'anga mukatampe, ne Pontius Pilato, kabiji ne booba Bamwipaile. Nanchi bakebelenga kufumyamo bonse batelwa-mba Benakilishitu. Kabiji bizhilo byashikilwe, kabiji bapembejilenga.

⁵¹ Pano, mu byobya bibamba bya musango yewa, kechi mwajinga ne mawindo ne. Mawindo ajinga nobe bintu bicheche bishikuka nobe bizhilo, byakushikula. Mu byobya bibamba mwajinga byeya byakoobama byatala panshi kasa bitema . . . Inge anweba muji mu California ku Nzubo ya majila ya kwa Clifton, mwaya mukibamba kya panshi, mukatana kimo kipasha byonkabya, nobe kibamba kya peulu. Bushe mwafikako kala nyi? Baanga muno bafikako kala? Namona bantu nakusutula mitwe yabo. Kyawama, mwayuka kyo Mbena kwambapo. Kijitu bulongo. Mwaya panshi momwa, kabiji mukamona Bujimi bwa Ngesemani; kasa mukyangye kuuba ne, mukatwela mu bimo bibamba byamusango wakala. Akyo kine kyakine. Amwa mukatana ka lampi kakacheche mwayula manyi a olivi na kamuzhinge kacheche kaji mukachi, kabena kutema.

⁵² Pano, twayai twambe mba bajinga popa peulu, na kukajila peulu palulwe lubaji lwa pangye. Bafikile kookwa ne kwifya abo bene, mambo bajinga na moyo wa ba Yudeya. Yesu kechi wibabuujile mba baye pa nzubo ya peulu ne. Aye waambile mba, “Pembelaitu ku Yelusalema.” Bajinga momwa mu nzubo, kwajinga kyakosa kuyuka kyakonsha kumweka. Bakonsha kwiya na kwibakwata. Nanchi baile mu kakibamba kakala kakacheche peulu, kuyatu mwine mwiulu, kabiji monka mwa, bashika ne mu kibamba pakuuba mba Bayudeya kechi bakonsha kutwela mukachi mobajinga ne. Kabiji baikele monka mwa na kupembelela moba jikumi.

⁵³ Pano, bino, tuji mu Byubilo 1. Pano, telekai bulongo. Anweba muji na kipikichala? Pangye ya kishimikwa ndandalashi icheche yakajijile kuya peulu, kabiji batwelele mu kikye kibamba. Monka mu tempo bajinga na Kijilo kya Pentekositi. Oo, kwajinga kimye kyawama bingi kyaubiwenga. Pano, juba ja

Pentekositi byo jafikile, bonse bajingatu na mulanguluko umo, umo mulanguluko, kasa baketekela mba Lesa usa kutuma yewa mulaye. Lekai muntu yense uji muno atwele mu mulanguluko umo bufuku buno mumone kyakonsha kumweka. Kyafwainwa kubwelapo jibiji. Ke mulaye umotu byonka byo bajinga nanji. Mwamona?

⁵⁴ Kika kyo baubilenga? Kulondela mikambizho, na kulondela awa—aya— mizhilo yakwa Lesa: “Pembelelai poso . . .”

⁵⁵ Bino, bajinga bingi na moyo wa ba Yudeya. Bino, vulukai kyokyo. Bajinga na moyo wa ba Yudeya. Bino, ponkapotu kwaishile kilulumo nobe kupupa kwa lubesha. Kechi wajinga mwela upupa ne; kyajinga nobe mwela mukatampe upupa. Amiwa nsakutanga byambo byaambiwapo kubatutulula mu kimye kicheche. Kyajinga nobe mwela ubena kupupa. Mu byambo bikwabo, wajinga mwela wabu lesa (oo!), kintu kimo kyo bakonsha kumvwa. Mwela wajinga mukachi kabo. Kwaishile awa—mwela upupa, nobe kupupa kwa lubesha. Mwela kechi wapupilenga ne, bino kyaumvwanikile nobe byonka mwela byo apupa, nobe kintu kimo kibena kuya: Yii! Bushe mwikyumvwapo nyi? Oo, ami! Kijitu pamo nobe mwela upupa. Pano monai. Kabiji kyayuzhizhe . . . Pano, papo waambile mba “yonse,” pakuuba mu Kingiliki kyaambiwa mba “Yonse (Kisopelo kikatampe Y-o-n-s-e), mu Nzubo Yonse,” monse monse momwa. Mulala yense, koonna, kabiji ne kipeze kyonse byamwekele kuyula. Kechi kwamba mba, “Amba, Balongo, mubena kumvwa byo Mbena kumvwa nyi?” Ine! Kyajigatu konse konse, nobe mwela upupa. Pano talai. “Kwaishile kilulumo nobe kupupa kwa lubesha mukatampe kabiji (kunungakanya. Pano monai *bakabiji*. Inge kechi mwauba ne, musakwikilengela Kwamba kintu kingi Kyokyabula kwamba. Mwamona?)—kabiji nobe (akyo kyo kyajinga kitanshi kubiwa ke kilulumo, kintu kiji nobe—mwela upupa waishile pe abo)—kabiji (mwavulukanyi, bufuku bwapita Naile ku shitolo na kupota shinkwa umo ne nyama. Akyo ke kintu kimo kyajinga nakyo. Shinkwa ke kintu kimo, nyama nayo ke kintu kikwabo. Kabiji kilulumo kyajinga kintu kingi kibafikijile)—kabiji kwibamwekejile, (kumeso abo) njimi—njimi yaabanwa.”

⁵⁶ Bushe mujipo umo muno wamwene *Mizhilo Jikumi* yakwa Cecil DeMille? Bushe mwamwene Mizhilo byo yanembelwenga nyi? Byo ekikwachile, Amiwa kechi nayukile ne. Kwajinga bibiji nangwa bintu bisatu byo Namwene mu kyokya byo Natemenwe bingi. Kintu kitanshi ke kyokya kyeya kya emalondi, abyo kine byo Kyamwekelenga. Mwamona? Kintu kikwabo kyajinga Mizhilo byo yanembelwe, kabiji byokyapwile, bushe mwamwene kutumbuka kufumako kuyewa mukatampe Mumbulungwa wa Mujilo, kwajinga kulakauka kwa mujilo kucheche kwafuminengako? Bushe mwamwene kyokyo nyi? Pano, abyo byo Nalanguluka amba byo kyajinga pa Pentekositi.

Akwa kwibamwekejile..Pakuuba mba be Kimone. Kechi kyaamba mba, “Wibaponejile ne.” Pakuuba kwi bamwekejile kulakauka (byo twikitela), njimi, nobe lunjimi nobe yuwe lunjimi *kuno*, mwekelo ya lunjimi, kulakauka kwa mujilo. Pano, kutwi—nobe byo Naambile, kutwi ke kutwi; munwe ke munwe. Munwe kechi kyalumbulula mba wikyumvwine ne; kyalumbulula mba kyamweka nobe munwe. Kabiji inge kyajinga kutwi, kechi kyalumbulula mba bekyumvwine ne; kyamwekele nobe kutwi. Awe wajinga mujilo wamwekelenga nobe lujimi, kechi muntu ubena kwamba ne, mujilo wamwekelenga nobe lujimi.

⁵⁷ Pano, telekai. Monai mu Kingiliki byo kitangwa papo:

Kabiji ponkapotu kwaishile kilulumo . . .nobe kupupa kwa lubesha mukatampe . . .(Wabu 3—veeshi wabu 3.)

Kabiji njimi ya abanwa *yamwekele* kwi *abo*, . . .(Kechi njimi yaabanwa yajinga mwi abo ne, nangwa mba baambilenga na lujimi wa abanwa ne; yajinga njimi yaabanwa yamwekele kwi abo. Pano, monai. Kechi yakikajile pe abo ne. Yajinga momwa mu kibamba, na kuzhokoloka nobe mu yuwe mwela.) . . .kwi *abo* . . . *nobe* . . .*mujilo* . . .abanwa *njimi* . . .*ibamwekejile* . . . (kumeso abo) *nobe* . . . *mujilo*, (njimi nobe mujilo) *kabiji* umo (kimotu) waikele pa *umo* wa mwi *abo*. (Kechi kutwela mwi abo ne; pakuuba waikele pe abo.)

⁵⁸ Pano, monai King James wakonsha kutaya kyokyo: “Kabiji njimi ya mujilo ya ikele pe abo, nangwa kwikala (pano kyangwa byepi mu King James papo?) yaikele pe abo.” Mwamona? Bino, kechi yaile kokwa na kwikala ne. Twayuka kyokyo. Pakuuba mwine mulaka waamba mba, “Waikajile pe abo,” Naketekela; ibyo nyi? Lekai ne kilete mu bukine. Ee! “. . .waikele pa umo wa mwi abo.” Umo lujimi wa mujilo waikele pa umo wa mwi abo. Mwamona popo? Mwikyumvwa nyi? Akyo kyo kintu kya bubiji kyaubiwe. Kitanshi kyajinga mwela, kyalondelapo ke mwekelo ya jimi ya mujilo.

⁵⁹ Kyajinga mu kikye kibamba kicheche na ao malampi abena kutema. Balangulukai byo baikele popa. Kabiji umo waamba mba, “Oo!” Aye watajile monse mukinshimikwa; kyajinga monse monse mu kinshimikwa. Nanchi baambile mba, “Talai!” Njimi ya mujilo yatatwile kwiya na kuzhokoloka kishimikwa. Pano talai. Kabiji kokwa kwamwekele iye njimi ya mujilo.

Pano monai kyalondelapo:

Kabiji (Kikwabo kya kunungakanya; kintu kimo kyamwekele.) *bonse bayuzhiwe na Mupashi Wazhila*, . . . (Kintu kya bubiji kyaubiwe.)

⁶⁰ Pano monai, twakeba kupipula yoyo ng’ambilo, “Bajinga na njimi ya mujilo, kabiji papo ke kikukuma; kabiji balupukile ne kutatula kwamba na njimi ingi.” Kechi kujipo kintu kya

yewa musango mu Binembelo ne, mulunda. Uji yense waamba na lujimi ungi pa kutambula Mupashi Wazhila wikyubila mwapusanako na Baibolo. Kabiji Amiwa mbeni kwimumweshi mu mamineti achedetu ne kushinikisha kwi anwebi mba Naketekela kwamba munjimi ingi, bino kechi kutambula Mupashi Wazhila ne. Akyo ke kya bupe kya Mupashi Wazhila. Aye Mupashi Wazhila ke Mupashi.

⁶¹ Pano monai. Abo njimi yajinga mu kibamba nobe mujilo, kabiji ya ikele paumo umo. Nanchi bayujilwe na Mupashi Wazhila (kintu kya bubiji), kabiji pano, panyuma yakuyuzhiwa na Mupashi Wazhila, baambile na njimi, kechi na njimi ne, na milaka. Bushe mwamona kyokyo nyi? Batatwile kwamba na milaka ikwabo monka Mupashi mo ebapejile kwamba. Bino, akye kyaumvwanikile kwalepa.

⁶² Pano monai. Pano, twayai tupitulukemo ne jikwabo pakuuba mba mubule kulubako ne. Monka mwaila Kinembelo, pa nzubo ya peulu na kupembelela, ponkapo kilulumo kikatampe kiji nobe mwela upupa, ao wajinga pe abo; awa wajinga Mupashi Wazhila. Baanga baketekela mba akya kyajinga kumweka kwa Mupashi Wazhila? Nobo mwela, mwela wabulesa. Apo po bekimwene. Kabiji monkamwa mwajinga njimi icheche ya mujilo, ba aduleendi na tweti ba mwiabo, kabiji wa tatwile kwikala panshi ne kwikala pa umo umo. Kyajinga kika? Kyajinga kika? Awa Mumbulungwa wa Mujilo, wajinga Lesa Ayemwine kasa abena kwiabanya Ayemwine mukachi kabantu Banji, kwiya mu bantu. Yesu wajinga na kintu kyonse; Aye wajinga na Mupashi kwakubula kipimo ne; atwebi Tumutambula nakipimo (Mwamona mo Nemitazha nyi?), mambo atwebi twi baana baalulwa. Bumi Bwanji—Bwanji Bumi Bwapeenape bwaishilengamo. Pano, kika kyamwekele? Nanchi bonse bayuzhiwemo na Mupashi Wazhila.

⁶³ ano, Nasaka kwimwipuzhapo kintu kimo. Sawakya watatwile kumvwanika kimye ka? Inge bafuminemo momwa mu kibamba kyapeulu kuya panshi na tampulo ne kuya mu bipango bya lukena—nangwa kulupuka kuya—mu bipango bya tempo, Akyo kyajinga musiso wa nzubo kufuma po bajinga, kwikila panshi, amwa mu kipango mwajinga bantu bonse bapwijile pamo. . . Kabiji bafuminemo momwa nobe-bapendwa na Mupashi. Mambo bantu baambile mba, “Abo bantu batoma binyu bipya.” Abo kechi bamwenepo kintu kiji byobya ne.

⁶⁴ Kabiji umo waesekelenga kwamba mba, “Aye Mupashi Wazhila waiya. Mulaye wakwa Lesa uji pe amiwa. Amiwa—Amiwa nayulwamo na Mupashi.” Kabiji aye byo ajinga mwina Ngalileya, muntu ye a ambilengapo, mwina Arab nangwa mwina Pezha, wamumvwine mu mulaka wanji.

⁶⁵ “Mambo ka tubena kumvwa (kechi njimi ingi ne)—mambo ka ne atwebi bonse tubena kumvwa mu milaka yetu yo

twasemenwamo? Bushe bonse bo babena kwamba kechi bena Ngalileya nenyi?” Kabiji kapepo baambilenga kina Ngalileya . . . Bino byo be kyumvwine, kyajinga mu mulaka ye basemekwamo. Inge kechi ibyo ne, Nasaka namba anweba mungipuzhe—nkumbulai jije jipuzho: Kyajinga byepi Petelo byo aimene ne kwamba mu kina Ngalileya, kabiji ne jibumba jonse baumvwine kyo aambilengapo? Myeo fiili sauzande yaishile kwi Kilishitu ponkapa bino Petelo kasa aambilenga mu mulaka umo. Kine! Kyajinga Lesa waingijilenga mwingilo wa bulume. Petelo, ku jibumba jimo mwajinga bena Mesopotomya, ne benyi, ne be alwile abo bene, kabiji bonse bafumine mu kyaalo kyonse kyapanshi baimene popa . . . Kabiji Petelo waimene ne kusapwila mu mulaka umo, kabiji muntu yense wamumvwine, mambo fiili sauzande balapijile ne kubatizhiwa mu Jizhina ja Yesu Kilishitu ponkapotu. Akyo kiji byepi?

⁶⁶ Monai, balunda, Amiwa kechi naketekela dinominesheni wami, mulongo waki Pentekosito kwitaba kyokyo ponkapano ne. Bino mwakonsha kupita mu Baibole yense ne ku nkumbula kimye kiji kyonse apo po batambwile Mupashi Wazhila ne kwamba mu lujimi ye babujile kuyuka kyo baambilengapo ne. Kabiji umvwe jojishinda mo Bekitambwijile kokwa, Lesa waikala pabuke bwaji . . . Kyafwainwa kumwekela mu jishindatu jimo kimye kyonse.

⁶⁷ Bino, Amiwa kechi . . . Pano, ku nzubo yakwa Kone- . . . Twavuluka, byo twaile ku Samaliya, bufuku bwapita, twatana kuuba mba kechi pajipo kintu nangwa kimo kyanembwa na mambo a kumvwa mu mulaka mukwabo ne, kafwako kyaambiwa pa kikye ne. Pakuuba byo baile ku nzubo yakwa Koneleusa, apo pajinga mitundu isatu ya bantu, baambile mu njimi. Kabiji byo baubile byobyo, inge bekyubile, be Kitambwile, Petelo waambile mba, mu musangotu umo monka mo Bekitambwijile kufumatu ne kuntendekelo. Kabiji bayukile mba Bangetila batambwile lusa kwi Lesa, mambo batambwile Mupashi Wazhila byonka byo baubile ku ntendekelo. Amiwa njina jipuzho papo, kintu kimo pa kyokyo mu mamineti acheche. Nakukebanga kwaala kintendekesho, pakuuba mba mumone byokiji.

⁶⁸ Bino, Amiwa kechi naketekela mba bantu bafunjishiwa byapusanako ne . . . Kabiji telekai kwi amiwa, mutemwe wami, batemwe ba Pentekosito. Amiwa kechi nakonsha kufunjisha kikye pangye ne. Akye ke . . . Amiwa kechi nakonsha kukeba kuuba kintu kyakuleta mapata ne. Bino umvwe twabula kutambula Bukine, kimye ka kyotukatatula? Twafwainwa kwikala na kintu kimo kyaubiwa kya kwitoolola. Twafwainwa kutambula lusa lwa kushikulwa pano. Bukine bwafwainwa kusoloka.

⁶⁹ Kika muntu kyo akonsha kuuba inge aye wajinga kamama, ne kishika matwi, kabiji kechi wakonsha kwamba nangwa

pacheche ne? Aye wakonsha kutambula Mupashi Wazhila? Pano ibyepi inge kechi wajinga na lujimi ne kyakutatwilapotu, kabiji awa mulongo kamulanda wakeba kupuluka? Mwamona? Ke Mupashi Wazhila, ke lubatizhilo. Kabiji pano, byonse bye byabupe nobe kwamba munjimi, kulumbulula njimi, ke panyuma ya kwiya mu Mubiji na lubatizhilo lwa Mupashi Wazhila. Mambo bya bupe biji mu Mubiji wa Kilishitu.

⁷⁰ Pano, ene mambo o Naambila...Pano, tala kuno. Mwakonsha kuketekela kipwilo kya Katolika, akyo kyajinga kipwilo kitansi kya bukabungwe mu ntanda panyuma ya batumwa...Apo kipwilo kya Katolika po kya alwilwe ke kabungwe, oo, myaka yavula aduleendi panyuma yakufwa mutumwa wapeleleko, pepi nobe sikisi aduleendi ne—myaka panyuma ya bantuwa, pakupwishatu Kije kya Nikeya, kimye bashakulu ba ku Nikeya bemvwangile pamo ne kulengamo kabungwe; popo babikileko kipwilo kya ntanda yonse, akyo kyajinga kipwilo kya Katolika. Monkamwa balengelelo kipwilo kya ntanda yonse. Kabiji kyambo kya *katolika* kyalumbulula mba “ntanda yonse”; akyo kijitu konse. Abo...bena Loma—Loma wabutushi waalulukile ke papa waku Loma. Kabiji babikilepo papa kwikala mutwe ne kusenda kifulo kyakwa Petelo, ao ye balangulukilenga ne kwamba mba Yesu wapaine bakii ba mu Bufumu. Kabiji awa papa byambo byanji ke bukine, kabiji ne leelo byo akiji ku kipwilo kya Katolika. Kuuba mba... Kyanji kyambo ke mizhilo ne ndonda. Aye papa byambo byanji bukine. Akya kyapichile.

⁷¹ Kabiji pano, mambo akubula kuswang’ana na lufunjisho lwa ba Katolika ne, baipailwe, be basokele mu mujilo, kabiji ne bintutu bikwabo. Atweba bonse twayuka mba kupichila mu byazhila byanembwa byakwa Josephus, kabiji ne *Fox’s Book of the Martyrs*, kabiji ne akwabo avula azhila...wakwa Hislop ba *Babilona Babiji*, kabiji ne—ne byapito bikatampe byakala. Nanchi, kya—pa myaka fiftiini aduleendi, byonka byo twayuka, pa Mankulo a Fishi, Baibolo bamufumishe ku bantu. Kabiji Wajinga—Wafilwe ku mukulumpe wabo, ne bikwabotu, byotwayuka.

⁷² Kabiji panyuma ya kyokyo paishile Lifomesheni, ao wajinga Martin Luther. Kabiji aye walupukilemo ne kwamba mba kijilo kyo batela ba Katolika mba mubiji—yenka mwine mubiji wa Kilishitu, kyaimenakotu mubiji wa Kilishitu. Kabiji wataile akya kijilo pa tebulu wakitapisho, nangwa pa tampulo, ne kukana kumutela mba iye mubiji wakwa Kilishitu, kabiji wasapwijile, “Baoloka bakekela ku lwitabilo.” Bino, kechi mwakonsha kuketekela kipwilo kya Katolika kuswang’ana pamo nanji ne, kyakine ine, umvwe mutwe wabo wibabuula mba ine. Kijitu bulongo.

⁷³ Pano panyuma ya Martin Luther, kusapwila Lubingisho, John Wesley waishile na kusapwila Kutokeshiwa. Kabiji aye

wasapwijile mba muntu, panyuma ya kubingishiwa (kijitu bulongo) bino obewa wafwainwa kutokeshiwa, komvwewa, muzhazhi wa bubu wafumishiwamo mwi obewa monka mu Mashi akwa Yesu. Pano, anweba kechi mwakonsha kuketekela Benaluther kusapwila Kutokeshiwa ne, mambo kechi bakonsha kwikyuba ne.

⁷⁴ Panyuma yakwa Wesley wasapwila Kutokeshiwa, kabiji ne mabaano-akwabo afuminemo, akyo kyaletete, Methodist wakwa Wesley, kabiji ne ba Nazarene, kabiji ne bakwabotu, abo balamine mujilo kuteema mu nkulo yabo, kabiji kwaishile ba Pentekositi ne kwamba mba, “Kika, Mupashi Wazhila ke lubatizhilo, kabiji ne kwamba na njimi pa Kumutambula.” Kine. Pano akya byo kyaishile, kechi mwakonsha kuketekela ba Nazarenes, ne ba Methodist bakwa Wesley, kabiji ne bikwabotu kwitabila kyokyo ne. Abo kechi bakekyuba ne. Abo bekitelele mba diabola. Kijitu bulongo. Kika kyamwekele? Batatwile kupona; Pentekositi watatwile kusutulwa peulu. Pano kyaimana kufika pa kifulo poso Pentekositi wikisukenya. Kyaalulwa bukabungwe ne kufumamo, kechi bakonsha kuswa kintu kikwabo ne. Baji na mizhilo yabo ne mikambizho, kabiji akyo kypawisha byonse.

⁷⁵ Pano, inge Mupashi Wazhila waiya kabiji ne kusolola Bukine bwa kintu kiji kyonse kabiji ne kwikishiniikisha na Kyeenyi Kyanji aye mwine kabiji ne ku Kyambo Kyanji, kechi mwakonsha kuketekela bantu ba ki Pentekosito kwamba mba, “Amiwa naitabazhanya nakyo.” Obewa wafwainwa kwimana bunke byonka byaubile Luther, nobe byaubile Wesley, kabiji nobe bonsetu bashala. Obewa wafwainwa kwimana pa kyokyo mambo kimye kyafika. Kabiji akyo kyo kindengela amiwa kumweka jimbata watama. Akyo kyo kindengela kwikala wapusanako.

⁷⁶ Kabiji kechi Nakonsha kutatula nobe Mulongo wami wawama Oral Roberts ne, kabiji ne Tommy Osborn, Tommy Hicks, ne bakwabo, mambo bipwilo kechi byanswang’ana ne amiwa ne. Baamba mba, “Aye waketekela mu bukikizhi bwa Peenape. Aye ke waki Baptist. Aye kechi waketekela mu kwamba mu njimi nobe bukamonyi bwa Mupashi Wazhila ne. Fumaiko kuyewa muntu!” Mwamona?

⁷⁷ Bino aye watalang’ene nakyo. Kwikiponesha panshi. Bakonsha kukumanya Benaluther, ba—ba Methodist bakonsha. Ba Pentekosito bakonsha kukumanya ba Methodist. Nakonsha kukumanya ba Pentekosito nakyo. Akyo kyakine. Kyakine. Kika kyokyaikela byobyoy? Tubena kwenda mu Kyeya nobe byonka byo Aji mu Kyeya. Mwamona? Tubena kukajila mu Mukwakwa Wamfumu, kabiji monka mobivujila, bupe bukatampe bubena kupanwa, bulume bwabaya bubena kupanwa, bulesa bwabaya bwapewa. Kabiji abyo byobyoy tuji. Akye kyo kimye Mupashi Wazhila po aiya mu musango wa Kyeya nobe byonka byo Ajinga pa ntendekelo, Mumbulungwa wa Mujilo, kabiji wimweesha

Ayemwine, kasa abena kubatu bintu bimo byonka byo Aubilepo kimye kyo Ajinga pano pantanda. Kabiji Yesu waambile mba, “Wayuka byepi kana baji bulongo nyi nangwa ine? Konka kubipangwa byabo ko mukebayukila. Aye waitabila mwi Amiwa, mingilo Yonguba ne aye ukeyuba. Abye biyukilo bikebalondelanga baitabila.”

⁷⁸ Pano, balongo bami baki Pentekosito. Amiwa nji ne anweba. Amiwa ne umo wa mwi anweba. Amiwa njina Mupashi Wazhila. Amiwa naambile munjimi, bino kechi Neitambwile pa kutambula Mupashi Wazhila ne. Amiwa natambwile lubatizhilo lwa Mupashi Wazhila; Naambile munjimi, kwaula, najinga na bya bupe bya maana, maana, kulumbulula, kabiji ne bintu byonse bibena kumweka. Bino Amiwa nepana ku byonse bye bintu, mambo pano Amiwa ne mwaana wakwa Lesa. Bulume, Mujilo wakwa Lesa uji mu mweo wami; awa lujimi wa Mujilo waambukile—waishile mukachi kami ne kusoka bintu byonse byapusanako na Lesa, kabiji pano Amiwa natangijilwa na Mupashi Wanji. Aye wakonsheshe kwamba mba, “Yainga *kukwe*,” kabiji Amiwa nkaya. “Yainga *kukwe*,” Amiwa nsakuya. “Ambai *kukwe*,” Amiwa nsakwamba. “Kabiji ubai *kikye, kyokya*, kabiji ne *kikwabo*.” Abyo byokiji, nobe. . . Obewa utangijilwa na Mupashi. Awa ke Lesa mwi obewa, ubena kwingila kyaswa muchima Wanji. Nangwatu kikale byepi, Aye ubena kwingila mwingilo waswa muchima Wanji.

⁷⁹ Pano, telekai. Lekai tange papo kasa tukyangye kutapa mepuzho muyuwe buuku muno. Pano, kufuma mu Kututululwa kwa Vatican, Volume 7, 190—1205:

“Kyajinga kyashupa kuyuka kana kyajinga jiwi ja booba bantu baaambilenga mu mulaka ungi; nangwa sawakya nangwa jashi ja bintu byaubilwe ja mwela wa bulesa wapupilenga ye watundaikile bantu.”

Abo kechi bekikwatakenye ne. Pano monai. Kana kyajinga bantu. . .

⁸⁰ Amiwa nsakwikimweshwa. Aje ke jibumba ja bakamulanda, bena Ngalileya bakosakana. Kabiji papo balupuka mu mukwakwa. Abo kechi bamwenepo kintu kiji byobya ne: maboko abo asutulwa mwiulu, bafumine pa kibamba kya peulu, ku kukuluka pa yoya tampulo, kuya momwa, bayulwatu; abo kechi bakyambilepo ne. Mwamona? Abo kebeye kupita momwa. Kabiji pano, twayayi twambe, bajinga momwa na kutalatata na kuzhokoloka. Kabiji bantu baambile mba. . . Mu Ngiliki waishile wanyemene lubilo kwiya kwi amiwa, ne kwamba mba, Amiwa mbena kwamba mu kina Ngalileya.

Obewa wamunyemena ne kwamba mba, “Kabiji lukatazho luji pepi ne obewa, Nsongwalume?”

81 “Amiwa nayuzhiwamo na Mupashi Wazhila. Bulume bwa Lesa bwaponene momwa mu kibamba. Kintu kimo kyamwekele kwi amiwa. Oo, lukumo lwikale kwi Lesa!”

Kabiji mukwabo kukwe, wajikwambanga ku mu Arab, bino aye kasa aji mwina Ngalileya ubena kwamba ki Arab—mulaka waki Arab.

82 Bino, kechi bakonsha kulondolola ne, bushe kyajinga mwela wapupilenga ye wabungizhe bantu pamo kimye jibumba jikatampe po japwijile pamo, nangwa kyajinga kwamba mulaka ungi ye baambilenga? Bino, Baibolo kechi yaubatu ne... Muji na bintu bibiji byo mwakonsha kumona. Kyajinga ikyo... Awa—awa wapangye waambile mba, “Mambo ka tubena kumvwa pa muntu pa muntu mu mulaka wetu monka motwasemekelwa?” Kechi kyaambiwa mba bekyambilenga ne, pakuuuba bekyumvwinenga.

83 Nanchi jibumba jimo, bantu bamotu, balumbulula kikye. Petelo watolokejile pa kintu kimo ne kwaamba mba, “Anweba bantu ba ku Ngalileya, kabiji ne anweba mwikala mu Yelusalema, lekai kikye kiyukanyikwe kwi anweba (bantu baambile mba kechi bayukile mulaka wa ku Ngalileya ne) lekai kiyukanyikwe kwi anweba ne kuteleka ku byambo byami (ng’anyi—ng’anyi mulaka ye aambilengapo, kwi abo bonse?); kika, aabo kechi bapendwa byo mulanguluka ne, mambo juba jikijitu lukeelo, pakuuba kino kyo kyokya kyaambile ngauzhi Yowela: ‘Kabiji kikeya kufikizhiwa mu moba akapelako, byo byaamba Lesa, Amiwa nketulwila Mupashi Wami pa bantu bonse. Baana benu babalume ne babakazhi bakaulanga.’” Watwajijiletu na kwamba, ne kwamba mba, “Anweba na maboko enu abubi mwapopele ku musalabu Mwaana wakwa Lesa wabula bubi. Davida waambile pe Aye... ‘kechi wakonsha kusha mweo Wanji mu kalunga kabafu ne, nangwa Aye kechi wakonsha kuleka Aye Wazhila Wanji kumona bubole ne.’” Kabiji waambile mba, “Lekai kiyukanyikwe kwi anweba mba Lesa wamupa bu Nkambo ne bu Kilishitu yenka uno Yesu ye mwapopele pamusalabu.” Kabiji byo baumvwine bibye... Amena! Ng’anyi? Muntu yense uji mushi ya meulu. Kika kyamwekelenga? Aye kechi waambile mba, “Pano, Amiwa nsakwamba mu kina Ngalileya; Amiwa nsakwamba mu *kikye*; kabiji Amiwa nsakwamba mu *kikye*...?...”

84 Kimye Petelo kyo aakyambilengatu, baambile mba, “Balongo ne batemwe, tube byepi pakuuba mba tupuluke?” Kabiji Petelo wibapele ndonda. Abyo byo kyubiwa kimye kyonse. Mwamona?

85 Kibena kwenda kuya peulu, na kuya kwi Lesa, kwenda kipikipi. Mwayuka byepi? Kyawama pano, kimye Luther kyo atambwile lubingisho, aye waichile kyokya mba Mupashi Wazhila. Kyajinga. Lesa wabikile pacheche mu Kikye. Nanchi

Aye waambile mba kika? Wesley watambwile Kutokeshiwa, ne kwamba mba, “Nsongwalume, inge wabijika, uji Nanji.” Bino bavula ba mwiabo babijikilenga kechi bajinga Nanji ne. Kimye ba Pentekositi kyo baambile munjimi—ingi, baambile mba, “Nsongwalume, uji Nanji.” Bino bavula ba mwiabo kechi bajinga Nanji ne.

Kechi kujipo bintu bya musango yewa nobe biyukilo bya kuyuka kyokyo ne. “Jishindatu ja kuyukilamo kichi,” Yesu waambile mba, “ke kupichila ku kipangwa kipangako,” mingilo ya Mupashi, kipangwa kya Mupashi. Nanchi inge wamona muntu wayuzhiwa na bulume, awa wayula na Mupashi Wazhila, pano bino pomwamona bumi bwapipulwa. Mwamona bibye biyukilo ke bilondele booba baitabila: “Mu Jizhina Jami bakapangilamo bademona, bakamba na njimi ipya. Inge muloolo wakonsha kwibasuma, kechi wakonsha kwibabeleka ne. Inge baikala na kintu kipayang’ana, kutoma, kechi kyakonsha kwibepeya ne. Bakabika maboko pa bakolwa, kabiji bakakosa.” Ami! Abye biyukilo bibalondelanga baitabila. Bino mwakonsha kutwelamo byepi? Abye bya bupe biji mu Mubiji. Mwakonsha kutwelamo byepi mu Mubiji? Kechi mwaila kwamba na kutwelamo ne; kanatu kubatizhiwa mu Mubiji umu (Mutanshi Kolinda 12:13). Konka ku Mupashi umu atweba bonse twabatizhiwa mu yewa Mubiji kabiji ne kutwela mu byonse bya bupe. Aye Nkambo emupeshe.

⁸⁶ Pano, inge muntu umu wakonsha kumvwa yuwe tepu nangwa muntu umu wakonsha kukana, vulukai, kyubai na bulunda, mulongo, mambo Nakutemwa.

93. Jipuzho jitanshi bufuku buno: Mulongo Branham, Nalanguluka mba televizhonyi ke jifingo ku inontanda. Walanguluka byepi pa kikye?

⁸⁷ Kyawama, uji yense wjinembele, Amiwa nsakwitabazhanya ne obewa. Bekilenga kwikala ke jifingo ku ntanda. Kyafwaijilwe kwikala jipesho ku ntanda, bino bekilenga ke jifingo. Kintu kyonse kiji byobya, bantu bami batemwe, ke kyokya kyo utalapo obewa mwine. Inge televizhonyi kd jifingo, nanchi pepala wa byambo naye ke jifingo, nanchi ne waileshi ke jifingo, kabiji kukilapo telefoni byo aji. Mwamona, mwamona, mwamona, mwamona? Kijitu byowikyalula obewa mba kikale. Pakauba byokiji mba mulongo waambile bufuku bukwapo, amba kechi pakitwajijila kwikala na lunengezho pa televizhonyi ne; ke kuvulatu kwa mali. Basapwishi bakamulanda basapwila Mamboawama Onse kechi bakonsha kwikalapo na lunengezho pa televizhonyi ne. Nanchi onkao mambo. . . Mulongo waambile bufuku bukwapo, Naketekela, pantu pamo, amba, “Kuta lukungu lwa waileshi obe,” nangwa muntu umu, nangwa, “Kifumyaimo mu koono ne kuteleka ku lulwe lunengezho.” Abye ibyo.

⁸⁸ Bino, muntu mutemwe, uji yense kana yeng'anyi, Naitabazhanya ne obewa. Kyaikala ke kintu kimo kyakila mu kutama ku mutundu wa muntu. Amwa imo mobatwala mali onse aji kuno afwainwa kuya ku misoko ya kafulumende, kabiji babikamo byonse byakusulwisha pa tusanga ne mitachi ya wisiki ne bintu bya yewa musango, kabiji ne kwibifumya ku misoko ya kafulumende; kabiji baiya basenda basapwishi ne kwibatwala ku kochi mukwibatambula mali. Amiwa naitabazhanya ne anweba, ke kintu kyatama bingi. Pano, abyo kechi. . . Mwayukatu, ke kintutu kimo kyo mutana. Nakusachila, nyenga, mulongo, uji yese waipwizhe kyokyo.

94. Pano, jino ke jawama bingi. Jipuzho: Amwa muji pantu pamo mu Baibolo nobe biji Mutanshi Samwela 18:10, waamba mba mupashi watama kufuma kwi Lesa waubile bintu. Amiwa kechi naumvwisha ne “mupashi watama kufuma kwi Lesa.” Napopwela londololai kikyhe.

⁸⁹ Kyawama, kape na bukwasho bwa Nkambo, Nakonsha. Kechi kyalumbulula mba Lesa Mupashi watama ne. Pakuuba mupashi yense wakitu kiji kyonse ukokela Lesa. Kabiji Aye ulengela bintu byonse kwingilo monka Moasakila. Mwamona?

⁹⁰ Pano, pa jipuzho jenu, mubena kwamba pa mupashi watama ao wafumine kwi Lesa nakumanyika Saulo. Aye wajinga mu byubilo, wa mwekelo- yakatazhiwa—ya musango, mambo, kintu kitanshi, wajinga wabwela munyuma. Kabiji umvwe wabwela munyuma, mupashi watama—Lesa wakonsha kuswisha mupashi watama kukumanyika.

⁹¹ Nakonsha kutemwa kutangapo kintu kimo mu—mu kakimye kachechetu. Amiwa njina mulanguluko mukwabo papo. Mwamona? Mupashi uji yense ukokela Lesa. Mwavulukanyi kimye Yehoshafwata ne Ahaba byo bailenga ku nkondo? Kabiji kintu kitanshi mwayukatu, kwajinga—babikilwe mu binzhilo. Kabiji Yeoshafwata wajinga muntu waoloka, kabiji aye waambile mba (abo bamfumu babiji baikela poopa, kabiji bakwatakene mazhita abo pamo) kabiji nanchi aye waambile mba, “Twayai tumwipuzhe Nkambo kana twakonsha kuya nangwa ine.”

⁹² Kabiji Ahaba waile na kusenda bangauzhi foolo aduleendi bo ajinga nabo, bonsetu, wibalamine na kwibajisha kabiji kwibabaisha ne bintu byonse; bajinga mu musango wawama. Kabiji bafikile kokwa, kabiji bonsetu baawilenga pamo na muchima umo, amba, “Yainga, kabiji Lesa ukemupa lushijilo. Yainga ku Limota-gileda kabiji konka kwa Lesa naye ukemusendelakyo akya kintu.” Umo wa mwi abo wilengejile aye mwine masengo abiji kabiji watatwile kunyema na kuzhokoloka nao nobe kyakumwenako, waambile mba, “Mwaila ao masengo a kyela kya kapotwe, mu kebafumyamo mu kyaalo; kiji kulubaji lobe.”

⁹³ Bino mwayukatu, pajipo kintu kimo pa muntu wakwa Lesa ao ubula kulondela byonse byo ne. Mwamona? Inge kechi kyatwajijila na Kinembelo ne, nishi pajipo kintu kimo kyatama. Yense waitabila kyakine. . . Nanchi Yeoshafwata waambile mba, “Kyawama, abo foolo aduleendi bamwekatu bulongo. Abo bamweka nobe bantu bawama.”

“Oo, byo baji,” kapepo Ahaba byo aambile.

Bino Yeoshafwata waambile mba, “Bushe kechi kujipo umo nenyi?” Kika kukebela mukwabo kasa uji na foolo aduleendi baji na muchima umo? Mambo wayukile mba kujipo kintu kimo kyabula kumvwananyika bulongo ne. Mwamona?

Aye waambile mba, “Ee, tuji na umo mukwabo, mwaana Imula, papo,” waambile mba, “bino Namushikwa.” Kine. Obewa ukashika kipwilo kyanji kimye kyonse kyo wakonsha kwikyuba. Ukamupangamo mu kyaalo. Mwamona? Kine. “Namushikwa.”

“Kika kyo wamushikilwa?”

“Aye kimye kyonse waaula byatama pe amiwa.” Naketekela mba Yeoshafwata wayukile ponkapa amba pajipo—pajipo kintu kimo kyabula kwikala bulongo ne.

Nanchi aye waambile mba, “Yanga ukamulete Mikaya.”

Nanchi bamulondejile, kabiji byo byo aishile. . . Nanchi byo baile, batumine muluwe kabiji waambile mba, “Pano, pembelaiko mineti umo. Bino, baji na ma Dokotala foolo aduleendi a Bulesa kokwa. Bo bawamisha bajimo mu kyaalo, baji na Ph, ma LLD, kabiji ne byonse.” Waambile mba, “Pano, mwayukatu, obewa kamulanda muntu wabula kufunda, kechi wakonsha kupachika na bonse basapwishi ne.”

⁹⁴ Imula waambile kikye, nangwa Natazha mukuuba mba, Mikaya waambile kikye: “Amiwa kechi nakonsha kwambapo kintu nangwa kimo ne kanatu Lesa wikibika mukanwa kami, kabiji pano Amiwa kamba byoka byo Aamba.” Amiwa natemwa kyokyo. Natemwa kyokyo. Mu byambo bikwabo, “Amiwa kekala na Kyambo.” Nangwatu bonse bashala bambe byepi. Aye waambile mba, “Kyawama,” waambile mba, “Amiwa mbona kukubuula. Inge kechi ubena kukeba kutaiwa ne, wafwainwa kwambatu bintu bimo.”

Nanchi waile kokwa. Kabiji waambile mba, “Amiwa Nsakuja konka?”

Aye waambile mba, “Yaingatu kulutwe.” Waambile mba, “Mpai bufuku buno. Lekai ne kyambe na Nkambo.” Natemwa kyokyo. Nanchi abwa bufuku Nkambo wamwekele kwi aye, kabiji jalondejilepo wabukile. Kabiji aye waambile mba, byo ailenga mwiulu, aye waambile mba, “Yaingatu kulutwe; bino Najikumona Isalela nobe mikoko yabula kafunga, kupalang’enamo pa tutumbatumba.” Oo, ami! Akya kyalupwile mwela kufuma mwi aye.

Kabiji aye waambile mba, “Bushe Amiwa kechi naji kukubuula nenyi? Nekiyukile. Abyo kine ibyo byo oba kimye kyonse, kwamba kintu kimo kyatama pe amiwa.”

⁹⁵ Kika? Aye waikele na Kyambo. Kika? Ngauzhi wajinga mutanshi, Kyambo kya Lesa kibena kufuma kwi Elaija, ngauzhi wakine, aye waambile mba, “Mambo akuuba mba waichijile mashi abula mambo akwa Naboth, bakabwa bakamyanga mashi obe ne ao.” Kabiji wamubuujile byatama. Elisha waile Mwiulu. Bino aye wayukile mba Elisha wajinga na Kyambo kya Lesa, nanchi waikele na Kyambo. Natemwa kyokyo. Ikala na Kyambo.

⁹⁶ Inge Baibolo waamba mba Yesu Kilishitu ye umotu keesha, leelo, ne myaka yonse; Bulume bwanji bujitu pamo; aye Mupashi Wazhila wa yense waswa, mulekai eye, ikala na Kyambo. Ee, mwane! Nangwa bashala bambe byepi. Nangwa bajishiwe byepi kabiji ne masukuulu avula byepi o bapitamo, akyo kechi kijipo na kintu kimo kya kwingila nakyo ne.

Nanchi pano waambile mba. . . Awe mulunda mukatampe wajinga na masengo ku mutwe wanji, wailenga na kwikishijika—kyaalo kukila pa mfumu, aye waendele kuya na kumupuma pa kanwa (awe musapwishi mucheche). Aye wayukile mba wajingatu upanga kyongo kyazhila nanchi kechi kwajingapo kintu kyakwamba pa kikye ne, nanchi aye wamwimbiletu pa kanwa. Aye waambile mba, “Amiwa mbena kukeba kukwipuzhapo kintu kimo.” Waambile mba, “Jepi jishinda Mupashi wakwa Lesa jo Ayilemo pa kufuma kwi amiwa inge uji Nanji?”

⁹⁷ Aye waambile mba, “Ukomvwisha bulongo byo ukekala mu fungwa nobe kaili.” Aye waambile mba, “Namwene Lesa nsaaikala pa jitanda (Amena! Pano telekai!), kabiji ne zhita ya Mwiulu ya Muzhokolokele.” Lukatazho lwajinga ka? Ngauzhi wanji waambile kala byo kikamweka kwi Ahaba. Lesa. . . Awa kechi wajinga Elaija waambile byo byo ne; awa wajinga ngauzhi washingwa manyi. Akya kyajinga Kyambo kya Nkambo, ABYO BYOBYAAMBA AYE NKAMBO. Kabiji Mikaya waambile mba, “Namwene zhita yonse ya Mwiulu yazhokoloka Lesa mu mbung’eno ikatampe. Kabiji besambilenga na umo ne mukwabo. Kabiji aye Nkambo waambile mba, ‘Ing’anyi ye Tusakutuma kuya panshi, ing’anyi mwi anweba wakonsha kuya panshi, na kujimbaika Ahaba, pakuuba mba akaye kokwa na kufikizha Kyambo kya Lesa, pakuuba mba bakamuloze? Ing’anyi wakonsha Kuya panshi?”

⁹⁸ Kyawama, umo waambilenga *kikye* nangwa *mukwabo* kyokya. Kabiji pa kupitapo kimye, mupashi watama, mupashi wabubela waishile kufuma panshi ne kwamba mba, “Inge Anweba mwakonsha nkuswishatu amiwa. Amiwa ne mupashi wabubela. Amiwa nsakuya na kutwela mu bonse basapwishi, mambo kechi baji na Mupashi Wazhila ne; kabiji Amiwa

kebalengela (ke bansongwalume bafunjishi watu-na sukuulu)—kabiji Nsakuya panshi, ne kutwela mu bonse, ne kwibajimbaika, ne kwibalengela kwaula byabubela.” Bushe aye wikyambile nyi? Kabiji aye waambile mba, “Ajo jo jishinda ja kujimbaikilamo.” Nanchi waikijile panshi.

Aye waambile mba—Lesya waambile mba, “Wapewa nsambu Yami yakuya.”

⁹⁹ Kabiji waikijile panshi ne kutwela mubooba bangauzhi babubela, nyingijilo ya kufunda-sukuulu, kabiji wibalengela kwaula byabubela. Kyajinga mupashi wabubela ubena kwingila ku kyaswa muchima wakwa Lesya. Lekai ami... Kintutu kikwabo kyo mwakonsha kumona papo, pa mineti umo. Talai kikye. Nasaka namba anweba muzhikule pamo ne amiwa mu Kolinda Mutanshi mu kyapitala kyabu 5, veeleshi wabu 1, pa mineti umotu. Mutanshi Kolinda... Kabiji monai kikye inge mubena kukeba kumonapo kintu kimo, Lesya kubapo kintu kimo—amba aya mipashi yatama, byo bakoba—bakenda... Kijitu bulongo, Paulo ubena kwamba:

Kyaumvwanika mba mwi anweba muji bulalelale, nabo bulalelale bwa musango... wabulwa mu Bangetila, . . . (Mwalangulukapo ka pakyokyo mukachi ka kipwilo?) . . . amba umo mukwenu uji na muka shanji.

Kabiji anweba mwi lundumika, kabiji kechi . . . (Twayai tumone. Amiwa naketekela Najikuzhikula mapeje abiji pa . . .) . . . Anweba mwi—Kabiji anweba mwilundumika, ne kuuba bulanda ne, amba . . . (Pano, pembelaiko mineti umo. Ami Yami . . . Ee, abyo ibyo. Ee.) . . . bulanda . . . (Byokiji.) . . . ne bulanda, kabiji kechi . . . bulanda, amba awa wauba kino kintu afumishiwe mwi atweba.

¹⁰⁰ Amiwa kechi nayuka ne. Amiwa kechi naketekela mba yense wakonsha kwamba ku kikye nangwa kubula kwikyuba ne, bino Amiwa mbena kupana bukikizhi ku byo Naketekela: Inge muntu wayulwa na Mupashi kuba Wikitaya ne. Mwamona, mwamona?

Mambo Amiwa kine, nangwa fwako mu mubiji, bino kasa jiko mu mupashi, namuchibila kala mambo awa wauba kino kintu, nobe Nji konka, awa wauba kino kintu,

Mu jizhina ja Nkambo yetu Yesu Kilishitu, byo mukapwila pamo, kabiji ne mupashi wami ponka, na bulume bwa Nkambo Yesu Kilishitu,

Mu mufikizhe awa muntu wa byonkabyo kwi Satana pakauba mba mubiji wanji onaike, amba mupashi wanji akapuluke mu juba ja Nkambo Yesu.

¹⁰¹ Lesya, ubena kubuula Kipwilo kyazhila, awo ye Mubiji Wanji pantanda, amba (pano, abye ke kupita Lulayang’ano Lwakala,

mu Lupya) kubuula muntu ao wajinganna bubi ne ndochi mukachi ka bantu bo aikelenga nabo bamuka shanji. Waambile mba, “Akyo kintu mu Mubiji wa Kilishitu . . . Anweba, Kipwilo, mupanai kwi diabola pakuuba mba onaike . . .” Mwamona? Lesa uswisha . . . Kabiji umvwe Uji na kintu kimo kyo Akeba mba kyubiwe, ke kupuma kamama pa muntu umo, Aye ukaswisha mupashi watama pe abo pakuuba mba awa muntu amanyikwe ne—ne kumubwezha. Pano, twatana yuwe muntu panyuma . . .

¹⁰² Alo lolukatazho luji na bipwilo leelo. Inge muntu waiya mu Mubiji wa Kilishitu kabiji waikala ke umo wa bamembala kabiji watatula kuuba kyetama, mukifulo kypawila pamo ne kuuba kiky kintu kimo . . . Kabiji anweba, Branham Tabernacle, ubai kyokyo. Mambo kikulu anweba mwamukwachijila, aye uji panshi ya Mashi. Kabiji aye utwajijilatu na kuuba kintu kimo kyakala ne jikwabo ne jikwabo kimye kyonse. Pwilai pamo ne kumupana kwi diabola pakuuba mba mubiji wanji onaike, amba mupashi wanji uji—nobe—wafwainwa kupuluka mu juba ja Nkambo. Kabiji monai kikote kya Lesa kyaiyamo. Monai diabola byo akamukwata. Awa ke mupashi watama wamukwata.

¹⁰³ Kabiji awe nsongwalume papo wa olwelwe. Aye wabwelele. Twatana mu Kolinda Wakibiji apo po atokeshiwa ku meso akwa Lesa.

¹⁰⁴ Talai pe Yoba, muntu walumbuluka, muntu waoloka. Kabiji Lesa waswishishe diabola watama kwikala pe aye, na kumufunda, kabiji bintutu bikwabo mambo akukeba kulumbulula mupashi wanji. Mwamona? Nanchi mipashi yatama iji na . . . Lesa wingijisha mipashi yatama bimye byavula bingi pakuuba mba engijilemo lunengezho Lwanji kabiji ne kyaswa muchima Wanji.

95. Bino, pano paji jimo jakonsa bingi. Jipuzho (Naketekela mba ye muntu umo, mambo wamweka nobe kuboko kumo): **Inge muntu wafwainwa kwikala na Mupashi Wazhila pakuuba mba ekale—kwikala na Mupashi Wazhila pakuuba mba aluluke ne kuya mu lapicha, ng’anyi musango ye bakekalamo baana bafwa kasa bakyangye kufika pa myaka ya kuyuka byawama ne byatama ne? Kabiji bakasanguka kimye ka?**

¹⁰⁵ Bino, mulongo wami, nyenga, Amiwa kechi nakonsha kukubuula kyokyo ne. Kechi kujipo Kinembelo pa kyokyo mu Baibolo nobe byo Nakonsha kutana kuji konse ne. Bino Nakonsha kulondolola milanguluko yami. Pano, akye kisa kwi mukosesha anweba mwaketekela mu bupe bwa Lesa. Mwamona, muntu ukeba kuyuka (aje ke jipuzho yawama bingi. Mwamona?) muntu ukeba kuyuka ng’anyi lusanguko—kika kikamweka ku mwaana, amba inge aye wafwainwa kwikala na Mupashi Wazhila pakuuba mba atwele mu Mulapicha . . . Nobe byonka byo Naamba, abyoy ibyo. Abyo mo mwaila

Baibolo. Alo lo lufunjisho lwa mu Kinembelo. Kechi ku—kechi kuya Mwiulu ne. . . Mambo bantu bayulwamo na Mupashi Wazhila bakatanwa mu lusanguko lutanshi, aba Basalwa. Kabiji bashalapo mu boobo. . . Bafu bashalapo kechi baikele na bumi mu myaka kiumbi kimo ne. Panyuma ya Myaka kiumbi kimo, nanchi ke lusanguko lwa bubiji, ne jikatampe Jitanda Jitoka jabuchibishi bwa mambo. Mwamona? Ayo kine yo ndonda ya Baibolo. Bino awe muntu ubena kukeba kuyuka pano ngaabo baana babacheche. Abo. . . Mung'ambilo ikwabo, bushe bajinga na Mupashi Wazhila kasa bakyangye kusemwa nyi? Bushe Bamutambwile? Pano, akyo kechi Nakonsha kwi mubuula ne.

¹⁰⁶ Bino pano, twayai twambe nobe bibye: Twayuka mba baana balukeke aba bafwa, nangwa basemi yabo bekale musango ka, bapuluka. Bino, Amiwa napachika na sukuulu wa bangauzhi pa kyokyo ne. Baambile mba inge kyajinga—wafwile na basemi bajinga bandengamambo, amba awa maana ukaya ku ngehena, ponkapotu; kechi kujipo lubaji lukwabo pakyokyo ne. Kyawama, Yesu. . . Yoano waambile mba Yesu byo aishile, “Talai Mwanamukoko wa Lesa ao ufumya bubi bwa panopantanda.” Kabiji umvwe awa mwaana wajinga muntu, wafwainwa kwiya mu buchibishi bwa mambo bwa Lesa, kabiji Yesu wafwile mu kufumya bundengamambo, bundengamambo bonse bwafumishiwepo kumeso a Lesa kimye Yesu kyo afwile na mambo akyokyo. Bubi bwenu bwalekejiwe. Bubi bwami bwalekejiwe. Kabiji jishinda jijipo ja kulekelwapo mambo ke kuswa kulekela kwa mambo Kwanji. Bino, mwaana kechi wakonsha kutambwila kulekelwa kwa mambo ne, nanchi kafwako nangwa kimo kyo auba ne. Kafwako nangwa kimo kyo auba ne. Nanchi aye wakasuluka kuya Kwiulu.

¹⁰⁷ Bino obewa ukamba mba, “Bushe bakaya mu Lapicha?” Pano—pano, akye ke kyambo kyami amiwa mwine; awe ke mulanguluko wami pano. Kechi. . . Amiwa kechi nakonsha kushiniikisha kikye na Baibolo ne. Bino talai. Inge Lesa, kitendekesho kya inontanda sakikyaangye kwikalako, wayukile muntu yense fwainwa kwikala panopantanda. . . Mwikiketekela kyo nyi? Aye wayukile kilongolo kyonse, lubalebale yense, luzhi yense, Wayukile kintu kyonse kikekala pantanda. Inge wayukile byo. . .

¹⁰⁸ Talai. Twayai tutole kya kumwenako, Mosesa. Kimye Mosesa kyo asemekelwe, wajinga ngauzhi. Kasa akyangye kwikalako Yelemiya. . . Lesa wabuujile Yelemiya mba, “Kasa ukyangye kulengwa munda mu bainobe, kasa ukyangye kulengwa munda mwabo ne, Nakuyukile obewa, ne kukutokesho, kabiji nakutongwejile jimo kwikala ngauzhi ku mikoka ya bantu.” Yoano Mubatishi, myaka sebeni aduleendi ne myaka twelufu kasa akyangye kusemwa ne, Isaya wamumwene mu kimwesho, waambile mba, “Aye jo jiji ja umu ubijika mungyetu mba.”

¹⁰⁹ Kutongwelwa jimo nangwa kuyukila jimo kwa Lesa

kwayuka byonse pa baana babacheche (mwamona?), ne byo bakooba. Kabiji Aye wayukile mba bakafwa. Aye wayukile. Kafwako nangwa kimo kyakonsha kumweka kwakubula Lesa kwikiyuka ne. Kafwako nangwa kimo kyakonsha kumweka . . . Kijitu pamo nobe Kafunga Wawama, byo Atwela mukachi . . . Pano, kusenda kikyeye mu Kinembelo, Amiwa kechi nakonsha kwamba mba Kinembelo kyaamba *kikananga-ne-kikananga*. Amiwa mbena kwikisendatu nobe mulanguluko wami.

96. Bino, jipuzho jalondelapo kejoja Nalanguluka mba kape muntu umo wafumya pa byobya byo Naambilenga abwa bufuku bukwapo. **Londololai mukazhi kupuluka pa kusema mwaana.**

¹¹⁰ Mukazhi kechi wakonsha kupuluka kupichila mu kusema mwaana ne. Pano twayai tuzhikule mu Timoti Mutanshi 2:8 pa mineti umo. Kabiji twayai tumone byaamba Baibolo pa mwaana. Pano, Navuluka alo ke lufunjisho lwa ba Katolika, mambo ba Katolika baamba mba mwanamukazhi ukapuluka pa kusema baana, kupichila mu kusema mwaana. Bino kechi tube . . . Amiwa kechi naketekela kyokyo ne. Timoti Mutanshi kyapitala kyabu 2, kabiji twayai tutatwile pa veeleshi wabu 8, ne kutanga pa kimye kicheche. Kijitu bulongo, telekai.

Pamo byonkabyo, ne banabakazhi nabo bavwale bibafwainwa . . . (Kechi twafwainwa kwipuzha kyokyo ne, twafwainwa nyi? Telekai ku kikyeye.) . . . na bumvu . . . (Yii!) . . . kabiji ne butekanye; kechi na nsuki ya kwichika ne, nangwa na kya ngolode ne, nangwa na bamangalite, nangwa na bivwalo byamutengo wanema ne; (Balongo, Amiwa mbena kwimukwasha papo, Naketekela. Byonse bye bisochi pajuba pajuba nangwa moba asatu. Mwamona? Abo kechi ke Benakilishitu ne.)

Poso (byafwainwa banabakazhi betela mba babulesa) na mingilo yawama.

Lekai banabakazhi benu bafunde mukuzhindama mu byonse.

Bino kechi Naswa mwanamukazhi kufunjisha ne, nangwa kwikala na bukulumpe . . . mwanamulumpe ne, kana kwikala . . . wazhindama.

Mambo Adama walengelwe patanshi, kabiji apa ke Eva.

. . . Adama kechi wajimbaikilwe ne, pakuuba mwanamukazhi ye wajimbaikilwe ne kuzhilulula wazhilulwile.

Nangwa byonkabyo bakapuluka pa kusema baana inge . . . (Pano, aye kechi ubena kwamba ku mwanamukazhi wa muntanda ne, waikala na baana balukeke.) . . . inge watwajijila mu lwitabilo . . .

(Mwamona? Inge watwajijila. Aye waikala kala... Awa ye mwanamukazhi ye abena kwambapo, mwanamukazhi wapuluka kala. Mwamona?) ... *kabiji ne butemwe ne mu kuzhijikwa kasa batekanya.*

¹¹¹ Kechi mambo akwikala na mwaana kyakonsha kumulengela kupuluka ne, kana mambo a kuuba mba ubena kukomesha baana, na kwingila mwingilo wanji, kechi kukomesha bapushi, bakabwa, kabiji ne bikwabotu-byavula mu kusenda kifulo kya mwaana, byonka byo booba leelo ne, na kwikipa butemwe bwa bumaama pakuuba mba wakonsha kuya na kunyema bufuku bonse. Bantu bamo boba kyokyo. Ndekelaiko mambo, nangwa byonkabyo bebyuba. Akyo ke kwilundumika kwabaya amiwa pa kwikyamba, bino bukine ke bukine. Mwamona? Abo kechi bakeba mwaana wikasa naji ne. Kana pa kusema baana, inge watwajijila mu lwitabilo, mu kuzhijikwa, kasa atekanya, ukapuluka. Pakuuba *inge* uji, obewa ukapuluka ne obe, *inge* wasemwa jibiji. Obewa usakutambula lubuko *inge* waketekela. Wakonsha kutambula Mupashi Wazhila *inge* Wamuketekela, inengezhe Kumutambula, *inge* winengezha Kumutambula. Kabiji ukapuluka inge watwajijila na kuuba bibye bintu (mwamona?), bino kechi mambo a kuuba mba mwanamukazhi ne. Nanchi abyo ibyo, mulongo, nyenga. Kechi ke lufunjisho lwa ba Katolika ne. Pano Nakeba... Apano paji jikwabo jakosa bingi. Nanchi tuji najikwabo jimo. Naketekela mba tuji nakimye kya jije. Naji kusendatu kimye kyetu. Pano, aje ke—aje ke jalondela panyuma ya kusangululwa. Aje ke jalondela panyuma ya mbung'eno, ao mepuzho.

97. Pano: Mulongo Branham (ke kyapulitwa), bushe kiji Kyanembwa muntu kwamba mujimi kabiji wabwela walumbulula mbila yanji mwine? Inge byokiji, mwane londololai. Mutanshi Kolinda nangwa Kolinda 14:19 kabiji ne Kolinda 14:27.

¹¹² Kijitu bulongo, twayai tuye ku Kinembelo tumone byo kyaamba. Kabiji pano tusakumona kana tulama kikye Kyanembwa. Tubena kukeba kimye kyonse kwikala Kyanembwa. Kabiji Kolinda 14. Pano, muntu ukeba kuyuka inge Kyanembwa muntu kulumbulula mbila yanji aye mwine yo aambile mujimi. “Inge byokiji, londololai Kolinda 14:19.” Twayai tumone, 14 ne 19. Kijitu bulongo, abino byo tuji.

Nangwa byonkabyo mu bipwilo Amiwa... nangwa kwamba byambo faivi na buyuke bwami, kyakuba mba monka mwaila jivi jami Nakonsha kufunjisha ne bakwabo ne abo, kukila teni sauzande... mu... jimi ingi.

Pano, veeleshi walondelapo ke veeleshi wabu 27, babena kukeba kuyuka.

Inge muntu waamba mu lujimi ungi, lekai kikale ku babiji, nangwa. . . bino kukila pa basatu ne, ne akyo balondakanenga; kabiji umo alumbululenga.

113 Pano, Natoola muntu kyo abena kukeba kufikapo (akyo Amiwa kyo mbena kukeba—Amiwa nsakutangapo kintu kimo kwi anweba pa kakimye kacheche). Bino Nalanguluka mulongo nangwa nyenga kyo abena kweseka kufikapo, “Bushe kijitu bulongo pa muntu wamba mujimi ne kulumbulula mbila yo aambile?” Pano, mutemwe watemwikwa mulunda, inge mwakonsha kutanga veleeshi wabu 13 mu kyapitalatu umo, usakukubuula:

Byonkabyo lekai yewa wamba mu lujimi ungi alombe mba amone mwakulumbulwila.

114 Kine. Aye wakonsha kulumbulula mbila yanji mwine. Pano, inge atweba twauba. . . Twayai tube. . . Kyawama, anweba. . . Tangai kyonse kye, kabiji mwakonsha kumona Ke. . . Tangai kyokya kyapitala kyonse. Kyawama bingi, kwikilondolola.

115 Bino, kwamba mujimi. . . Pano, kimye kyo tuji pa kyokyo, kabiji akye byo kibena kubikwa pa tepu, Nasaka kwamba mba Naketekela kwamba mu jimi nobe byonka byo Naketekela mu lubuko lwa Bulesa, kabiji ne—ne lubatizhilo lwa Mupashi Wazhila, Kwiya kwa bubiji kwa Kilishitu, kabiji ne bulume bwa ntanda ikeya; Naketekela bingi mu kyokyo nobe byonka byo Naketekela, bino Naketekela kwamba mujimi kiji na kifulo kyakyo kijitu pamo nobe kwiya kwa Kilishitu kuji na kifulo kyakyo; lubuko lwa Bulesa luji na kifulo kyakyo; bintu byonse biji na kifulo kyakyo.

116 Pano, kwi anweba bantu, Njina jishuko ja kwaamba kikye pano, kabiji Nakeba kwikilondolola. Kabiji inge Amiwa mbena kukozha muntu uji yense, Amiwa kechi ne kitazha momo ne. Amiwa kechi natazha mu kuuba mba ndete kivundakanya ne. Bino telekai. Lukatazho lwajinga ka pa kwamba mujimi ingi ku bantu baki Pentekosito (ao ye amiwa mwine; Amiwa ne Pentekosito. Mwamona?) . . . Pano, lukatazho ke lulwe: ke kuuba mba kechi bekinemeka ne. Kabiji kintu kikwabo, bekilekatu kyaaya mu kyubeube. Abo kechi babwela ku Kyambo ne.

117 Pano telekai. Ajino jo jishinda—lekai—a jino jo jishinda kipwilo jo kyabikwamo. Bino, mu kipwilo kya Pentekosito, inge Najinga kafunga wa kino kipwilo, Nsakwimubuula byo Nakonsha kwikibika (mwamona?), inge Najinga—wakonsha kwikala kuno kimye kyonse na kwikifunga. Nakonsha kuswisha kyabupe kyonse kiji mu Baibolo. Kubuula baitabila patanshi kubatizhiwa mu Mupashi Wazhila. Kabiji kyalondelapo, kya bupe kyonse kya mu Kolinda Mutanshi 12 kyafwainwa kwingila mu kipwilo kyami, inge Nakonsha kwibabika momwa, mubiji yense kasa engila.

118 Pano, inge mwamona...Kechi kwambatu ng'ambilo ne. Kabiji vulukai, Amiwa kechi nakonsha kwamba kyambo kimo kyapusanako ne—Amiwa nakonsha kumwendelea Mupashi Wazhila ne. Kabiji Lesa wayuka mba Amiwa kechi nakonsha kwamba kyokyo mokyatamina ne. Mwamona? Bino Amiwa mbena kwambatu kikyepakuuba mba nemupe kipikichala kya Kinembelo panyuma ya Kwikifunda pano ke pepi nobe myaka tweti. Amiwa nabasapwilenga pepi nobe myaka sate. Kabiji Amiwa napwisha byonse, napitatu monse; mwakonsha kulanguluka musango mo kyaikela. Kabiji ne kutajisha muntu yense, ne lufunjisho lwabo, ntanda yonse. Kabiji ne kwi kisenda mambo ke kintu kyonantako bingi muchima wami. Ke kintu kyantako michima ya bantu kubikapotu ne amiwa mwine. Nafwainwa kufumapo pano. Mwaafwainwa kufumapo pano. Kabiji umvwe Naya nobe ngauzhi wabubela, Nakonsha kutaya mweo wami ne kutaya wenu pamo ne amiwa. Nanchi kyakila pa—byakila pa shinkwa wa pajuba pajuba; kyakila pa kuyukanyikwa; ke kintu kyakila pa bintu byonse; ke Bumi kwi amiwa. Monai? Kabiji kimye kyonse Nkeba kwikala na bukisha bwabaya bingi.

119 Pano, obewa waya mu kipwilo kya Pentekosito, kintu kitanshi... (Amiwa kechi natazha mu kuuba mba byonse ne. Bamo baji...) Bimye byavula inge mwatwela mu kipwilo na kutatula kusapwila; kimye kyo mubena kusapwila, muntu umu wakonsha kwimana ne kwamba mujimi. Pano, awa muntu mutemwe wakonsha ne kuyulwa na Mupashi Wazhila, kabiji awa wakonsha kwikala Mupashi Wazhila ubena kwamba mu yewa muntu, bino kine kintu ke kino, kechi bafunjishiwa ne. Inge ino nyingijilo pa pulatifomu ibena kwamba kasa yatundaikwa, mupashi wa bangauzhi ukokela ngauzhi. Mwamona? “Lekai bintu byonse byubiwe...” Pano, monai kwi papo Paulo kika kyo abena kwambila mba “inge umu waamba,” kabiji ne bikwabotu... “byo aishileko, mwajingatu kivundakanya.”

120 Pano, Amiwa ngita bantu kukitapisho, kabiji muntu umu waimana na kwamba mujimi. Kijitu... Kyawama, wakonsha kulekatu lwito lwa kukitapisho. Wikileka. Mwamona?

121 Kabiji pano, kintu kikwabo. Bimye byavula bantu bemana ne kwamba mujimi, kabiji bantu kasa baikala na kunyeuna bbambo, na kukeketa kuzhokoloka konse. Inge Lesa ubena kwamba, zhindamaitu, telekai! Inge abo bo Bukine, inge awa ye Mupashi Wazhila ubena kwamba mu yewa muntu, anweba ikalaitu na kuteleka, ikalai na munema. Kulumbulula kwakonsheka kwiya kwi anweba. Mwamona? Zhindamaitu; telekai ku kulumbulula. Pano, inge kechi mujipo wakulumbulula mu kipwilo ne, nanchi bafwainwa kuzhindama mu Mubiji.

122 Kabiji pano, inge baamba na lujimi ungi, aye Baibolo waamba mba, balekai bambe abo bene ne Lesa. Aye wamba

mujimi ingi wikomeshatu aye mwine. Pano, ayo ke jimi ingi; ng'ambilo, milaka yapusana. "Kafwako kyom iji ne," aye waamba mba... Bino kika kilengela kilulumo kwikala na kilumbululo. Bino anweba... Inge tolopita yamvuma, wafwainwa kuyuka kilulumo byo kimvuma (... imvumyaitu) inge ne obewa kechi ukayuka kwinengezha kuya ku nkondo ne. Inge uji yense waamba mujimi, kabiji nobe "kepitu"; kyokyonka kyaikalapo, ng'anyi uyuka byakuuba. Bino umvwe kyatatula na *mvumino yalepa*, akya kyalumbulula mba "bukai!" Inge *yamvuma ipi*, akyo kyalumbulula mba "ikalai panshi." Mwamona? Inge kyavuma mba *kuyalutwe* akya kyalumbulula mba "kuyalutwe." Kyafwainwa kupana kilumbululo, bino kechi kwambatu bunke ne. Nanchi mu kipwilo, inge kechi kujipo wakulumbulula ne, pakuuba kuji wakulumbulula, nanchi jimi yo yakutanwa mu kipwilo.

¹²³ Pano, pa jipuzho jenu, mutemwe mulunda, ajo jaamba mba, "Nakonsha kutemwa kwamba faivi sauzande... byambo faivi mu, pakuuba mba bantu bakonsha nkung'umvwa kukila faivi sauzande (nangwa byonse bikwabo byo byakonsha kwamba) mu lujimi ungi." Akyo kine. Bino tangai kuya panshi: "... kana kyaikalala kya na lumwekesho nangwa na kilumbululo pakuuba mba kibafunjishe." Mwamona? Mu kwibakomesha.

¹²⁴ Pano, Nasaka kwimupako ng'ambilo imo icheche inge—kika... Inge Nafwainwa kwikala kafunga wa kino kipwilo kibena kwiya, inge Lesa wakonsha kungita mba ngikale kafunga wakyo, abino byo Nakonsha kwikisenda: Nakonsha kweseka kumona mba muntu yense ujimo momwa uji na kyabupe. Kabiji Nakonsha kutemwa babo bantu bakumana awala umo kupwila kasa kukyanye kutatula, mu kibamba pa bunke bwabo. Balekai bekale mushi ya Mupashi. Kabiji kintu kitanshi mwayukatu, umo waiya, aye uji na kya bupe kya kwamba mujimi. Kabiji aye waamba mujimi. Muntu yense wazhindamatu. Kabiji mukwabo waimana ne kulumbulula byo aamba. Bino, akya kasa kikyanye kupanwa ku kipwilo ne, Baibolo waamba mba bekyeseke ku batumonyi babiji nangwa basatu. Pano, ao ke muntu uyuka bapashi (mwamona?), mambo bimye byavula bulume bwatama butwelamo. (Mwamona?) Paulo waambile pakikye. Bino nanchi, bulume bwa Lesa nabo buji monka ne abo. Mbulaipo kipwilo kimo amo mubulwa kutanwa byatama. Mbulai kwepi baana ba Lesa kobapwila pamo ako Satana ko abula kutanwa mukachi kabo. Kijitu mu byonse. Nanchi kechi mwakonsha kumvwa kutama pa kyokyo ne. Mwamona? Satana uji konse konse. Pano, pano potuji. Muntu umo waamba mujimi. Bino, kuji basatu baikalakoko baji na Mupashi waku kuyuka bapashi. Kabiji umo waamba mujimi ne kupana mbila. Bino, kechi kyakonsha kwikalatu kwambula Kinembelo ne, mambo Lesa kechi ubwelulukatu mu bintu byatutu ne, kabiji Aye witubuula mba kuuba byobyoye ne. Mwamona? Nanchi kechi kyo kyo ne. Ke

mbila ku kipwilo.

¹²⁵ Tuji na bintu bibiji mu kukwe kusangululwa kufika pano. Monai kimo kyamubibye byo kyajinga—kyalumbuluka, kyafikilamotu bulongo. Mwamona? Watwelamo. Muntu umo waimana, ne kwamba mujimi, kabiji wapana kilumbululo, ne kubwela panyuma jibiji, kabiji ne kushinikisha aya mbila yapanwa. Mukwabo waimene bufuku bukwapo, ne kwaamba mu—na lutundaiko lwa bungauzhi, kabiji waambile kintu kimo, kwakubula ne kuyuka kyo abena kwambapo ne; kabiji pa kupelako wikyambile, “Watokwa awa wiya Mujizhina ja Nkambo.” Bukiji bukiji kintu kimo kyakwachile bukiji ne kwaamba mba, “Nangwa byonkabyo watokwa yewa waketekela mba awe ye Nkambo waiya.”

¹²⁶ Monai ne aye—ponkapo Mupashi Wazhila waponene mu kishimikwa bufuku bwapita. Mwamona? Akya kyajinga kya kukomesha. Amiwa naimene popa nakweseka kubuula bantu amba bafwainwa kutambula Mupashi Wazhila. Kabiji diabola waishile pa bantu, na kwamba mba, “Kechi muteleke ne; ikalaitu zoo.”

Nyenga yami waambile mba, “Bill, Najinga bingi na lusekelo mu kimye kyo wasapwijilenga; naumvwine nobe Nakonsha kwimana ne kupita mu kibumba.”

Naambile mba, “Imana ne kutolauka.” Byo byonka.

Kabiji waambile mba, “Bino byo watatwile na kuuba byooya,” kabiji waambile mba, “bantu batatwile kubijika,” waambile mba, “ponkapo Naumvwine nobe Najinga kintu kyabulamo nangwa kimo ne.”

¹²⁷ Naambile mba, “Awa ke diabola. Awa ke Satana. Byo aishile na kuuba kyokyo,” Naambile mba, “wafwainwa kwimana nangwa byonkabyo.” Atwebwa twi bang’anga kwi Lesa, na kupana kitapisho kya bumupashi—kitapisho, bipangwa bya pakanwa ketu bipanenga lutotelo ku Jizhina Janji. Mwamona?

¹²⁸ Pano, pano, kino kyo kyamwekele. Ponkapotu Mupashi Wazhila wamwekele, mambo akya kyajingatu. . . “Watokwa ke yewa waitabila.” Abiji, asatu mafuku alondakana Naesekele kwikikajika momwa; kabiji pano, aye Mupashi Wazhila waambile ne kwaamba mba (na lutundaiko) waambile mba, “Watokwa awa wiya mu Jizhina ja Nkambo.” Kabiji kasa Kyangye kwamba kiji kyonse ne, Amiwa nishi ne kyamba kala. “Watokwa aye waketekela mba Nkambo waiya mu kikye.” Mwamona? Kabiji Amiwa napwishishetu kwamba kikye mba, Mupashi Wazhila ye Lesa Ayemwine mwi obewa. Mwamona? Kabiji bekyumvwine. Mwamona? Kabiji ponkapo Mupashi Wazhila waponene mukachi ka bantu. Monai Byo—Byo bukomesha, bungauzhi?

¹²⁹ Bino, paji lupusano pakachi ka bungauzhi ne ngauzhi. Bungauzhi bufuma ku umo ne kuya ku mukwabo, pakuuba

ngauzhi usemekwa kufuma mu bwanyike kasa aji ngauzhi. Baji na ABYO BYOBYAAMBA AYE NKAMBO! Kechi kujipo bakwibeseka ne. Anweba kechi mwibamona kwimana ku meso a Isaya, nangwa Yelemiya, umo wa mubanguzhi ne, mambo bajinga NA ABYO BYOBYAAMBA AYE NKAMBO! Bino mupashi wa bungauzhi utanwa mukachi ka bantu; wafwainwa kumona kyokya, mambo Satana wakonsha kutwelamo momwa. Mwamona? Pano. Bino kyafwainwa kwesekwa.

¹³⁰ Pano, atweba—tusa kwikala na kusangululwa. Pano, monai kikyе bulongo, anweba bamwingilo. Tubena kukeba kusangululwa. Kijitu bulongo. Nangwa kape tujitu na kupwila kwa kimye kyonse. Akyo kipwilo kiji na mujilo. Kyafwainwa kwikalatu kimye kyonse. Kyawama, kapepo tuji na faivi nangwa sikisi bantu baji na byabupe; umo waamba na jimi, tuu nangwa fiili kape baamba na jimi, foolo nangwa faivi na jimi, baji na bupe bwa jimi, kwamba mujimi ingi. Babiji nangwa basatu ba mwi abo bakonsha kulumbulula. Kapepo kuji umo—tuu, nangwa basatu ba mwiabo baji na byabupe bya maana. Kijitu bulongo. Bonse basambakana, aba bantu baji na bupe... Anweba... Abya bya bupe byapewa kwi anweba kechi byakukaisha ne, kechi kwamba mba, “Lukumo lwikale kwi Lesa, Amiwa ng’amba na jimi! Aleluya!” Obewa ukoba—obewa ubena—obewa ubena kwibwezha panshi obewa mwine. Abye, byapewa kwi obewa ke byakwingila nabyo. Kabiji lubaji lwenu mu kipwilo lwafwainwa kwiya kwiine kupwila kasa kukyanye kutatula ne, mambo babula kufunda basakwikala mukachi kenu.

¹³¹ Nanchi mwatwela mu kibamba, kabiji mwaikala momwa, anweba bantu bonse pamo, mambo anweba mwi bamwingilo-pamo mu Mamboawama. Nanchi mwaikala popa. “Nkambo, kujipo kintu kimo Anweba kyo mwakeba mba tuyuke bufuku buno? Ambai kwi atweba, Anweba Taata Wamwiulu,” tubena kupana milombelo, misashijilo; kwimba nyimbo. Lutunanwa wiya Mupashi, waponena pa muntu umo, wamba mujimi. Umo waimana ne kwaamba mba, “ABYO BYOBYAAMBA AYE NKAMBO.” Kyo kika? Telekai. “Yanga ukabuule Mulongo Jones afumepo pa kifulo kyo abena kwikalapo, mambo keesha mabaanga kukekala kipumpu kya mwela kikapita mu kyokya kyaalo kyonse; kabiji kikasenda nzubo yanji. Kikasenda bipe byaji byonse!”

¹³² Pano, akyo—akyo kyumvwanika bingi bulongo. Bino pembelelaiko mineti umo. Kwafwainwa kwikala bantu basatu kokwa baji na Mupashi wakuyuka bapashi. Umo wa mwiabo waamba mba, “Kyajinga kya Nkambo.” Mukwabo waamba mba, “Kyajinga kya Nkambo.” Aba babiji ku basatu—babiji nangwa basatu bakamonyi. Kijitu bulongo. Banemba pa kipepala. Abyo byo byaamba Mupashi. Kijitu bulongo. Babwelele na kulomba, ke kusachila Nkambo.

¹³³ Pakupitapo kimye, “ABYO BYOBYAAMBA AYE

NKAMBO (ngauzhi waimana) ABYO BYOBYAAMBA AYE NKAMBO, bufuku buno, kufuma ku New York City kukekala mwanamukazhi; wasendwa pa makila; aye ukaletwa mकिनshimikwa pa makila. Uji na kitambala kya mazhamatamba ku mutwe wanji. Ubena kufwa na kaasa. Kika kyamulengela kwikala muyuwe musango, aye Nkambo ye wamumanyika: kimye kimo waibile mali kufuma mu Kipwilo Kyanji kimye kyo ajinga na myaka sikisitiini. Bulai Mulongo Branham mba amubuule bibye bintu. ABYO BYOBYAAMBA AYE NKAMBO, inge aye wakonsha kolola kyokyo bulongo, usakutambula lubuko.” Pembelaikotu mineti umo. Akyo kibena kumvwanika bulongo, bino pembelaiko mineti umo. Obewa usakubika jizhina jobe pa kikye kipepala, uyuka mipashi? Obewa usakubikapo jizhina jobe?

¹³⁴ “Kyajinga kya Nkambo.” Umo waambile mba, “Kyajinga kya Nkambo.” Nanchi—pano anweba mwikinemba, “ABYO BYOBYAAMBA AYE NKAMBO, bufuku buno musakwiya mwanamukazhi, uji na kintu *kananga-kananga*.” Awa uyuka mipashi, babiji nangwa basatu ba mwi abo banembako mazhina abo. Onse o mambila apewa. Kijitu bulongo.

¹³⁵ Pakupitapo kimye kicheche batatula kumvwa ngengele. Kipwilo kyatatula. Apo ipo pobaleta ao mambila, ne kuletwa abikwa pa desika. Ponkapano popo bafwainwa kwiatula. Amiwa nishi nji kuntu kumo mbena kutanga, na kulomba. Pakupita kimye kicheche na lupuka panyuma ya kwimba nyimbo. Kipwilo kyonse kiji mundonda, bantu babena kwiya, baikala, na kulanguluka langulukapo, ne kulomba; abyo byo mwafwainwa kuuba. Kechi kwiya ku kipwilo na kwisamba umo na mukwabo ne, kwiya ku kipwilo na kwamba kwi Lesa. Ikalai na lumvwang’ano lwenu lwa bupopweshi konkakwa. Mwamona? Atweba tuji mu lumvwang’ano lwa bupopweshi pamo ne Lesa. Kabiji twaiya kuno na kwamba, bintu byonse mu kuzhindama, na muneema, Mupashi kasa abena kwenda. Wimba piyano waiya ku piyano pepi nobe mamineti faivi kwimba kasa kukyanyge kutatula, kutatula bingi bulongo:

Ponka pa musalabu pafwijile Mupulushi wami,
Pankutokesha ku bubi Nkonajinjijile;

Nangwa lwimbo umo wawama, jiwi ja mushi. Jileta Kyeenyi kya Mupashi Wazhila mu mbung’eno. Mwamona? Kijitu bulongo.

¹³⁶ Bantu baikala popa. Bamo mwi abo baji—batatula kujila ne kwiya ku kitapisho, balapila kupwila kasa kukyanyge kutatula ne. Aye Mupashi Wazhila uji konka. Mwamona? Kipwilo kiji mu kubiza. Benakilishitu babena kulomba; baji mu bifulo byabo. Kechi baikala popa na kunyeuna nyeuna bbambo ne, ne kwamba mba, “Obe, Liddie, pepoi lipisitiki obe; Nakeba. . . Mwayukatu. Mwayukatu. Nakeba. . . Mwayukatu, juba jikwabo

byo Napotelenga bintu ku mashitolo, Ne mubuula, Najitu peepi kunyata pa mana enu. Bushe Namonapo kala kintu kyamusango yewa. . . Mwalangulakapo ka pakyokyo?” Oo, lusa! Kabiji ne kwikitela mba nzubo yakwa Lesa. Kika, ke kyabuvu. Aye Mubiji wa Kilishitu kwiya pamo. Waikala byobya.

Mwanamulume waikele kwipi, “Waambile mba, mwayuka byotwaile kokwa, awe *kananga-ne-kananga* kabiji *kananga-ne-kananga-ne-kananga*. . .” Akyo kijitu bulongo pangye, bino muno ke nzubo yakwa Lesa.

¹³⁷ Iyai na kulomba; tolai bifulo kyenu. Mbena kwamba pano, kechi ku bipwilo byenu ne, balongo. Amiwa kechi nayuka byomuba ne; Mbena kwamba ku uno tabbanako. Mbena kwamba ku kibelo kyami amiwa mwine. Mwamona? Abyo ibyo.

¹³⁸ Pano, inge mwatwela mukachi muye musango, pano kintu kitanshi mwayukatu, kafunga ulupuka. Aye wakasuluka. Aye wafwainwa kukumbula ku *kikye, kyokya*, kabiji ne *kikwabo ne*. Aye ubena kufumatu mu—mu kime kya mwingilo wani. Aye wajinga panshi ya bulume bwa Mupashi Wazhila. Aye wiya wafika monka muji jimi yamvula ya mujilo ya pwila pamo. Kijitu pamo nobe mumbulungwa pano (mwamona?), ubena kwenda. Uya na kwendauka, watola kikye. “Mbila kufuma ku kipwilo: ‘ABYO BYOBYAAMBA AYE NKAMBO, Mulongo Jones afume mu nzubo yanji. Keesha mabaanga pa tuu koloko kipupu kya mwela kipita mu inotanda. Atole bintu byanji ne kufumamo.’” Mulongo Jones waumvwa kyokyo. Kijitu bulongo. Akyo kyanembwa. “ABYO BYOBYAAMBA AYE NKAMBO, kukekala mwanamukazhi wajizhina ja *Kananga-ne-kananga* usakwiya muno bufuku buno, kabiji kyajinga—aye waubiwa *kananga-ne-kananga*.” (Monka mo Naambila, monai, monkamo.) Kijitu bulongo, akyo kypita. Byokiji. Baji na kifulo kyabo pano mu kipwilo. Kijitu bulongo.

¹³⁹ Pano aye utola mbila. Kabiji kintu kitanshi mwayukatu, aye utatula kusapwila. Kafwako kyakukakanya ne; kyaubiwa kala. Bino, tubena kuya kulutwe, twasapwila mbila.

¹⁴⁰ Kabiji pakupitapo kimye kicheche. . . Kintu kitanshi mwayukatu inge mbila yapwa, mulaini wa lubuko watatula. Awe wiya mwanamukazhi. Muntu umo wajikwamba na jimi amba mwanamukazhi ubena kwiya. Mwamona? Yense mwiatweba wayuka kisakumweka. Yense mwiatweba wikiyuka. Monai lwitabilo byo lushimikwa na yoya jimi ya mujilo yaimana pe anweba pakino kimye. Yatatulwa kwiya pamo. Kika, ke mwingilo wapwila jimo; kyokyoka.

Awa mwanamukazhi. . . Nakonsha kwamba mba, “Mrs. *Kananga-ne-kananga*, wafuma ku New York City, waikala muno. . .” Mwamona?

“Oo, abyo ibyo. Mwayukile byepi kyokyo?”

“Ke mbila yafuma kwi Nkambo kuya ku kipwilo. Kimye kyo wajinga na myaka sikisitiini, kechi obewa wajinga ku mpuzha *kananga-kananga* kabiji waubile—watolele mali kufuma mu kipwilo, kabiji wi eebile, ne kulupukamo, kabiji wapotelemo ne byakuvwala?”

“Oo, abyo ibyo. Abyo ibyo.”

“Abyo kine Lesa byo etubula bufuku buno kupichila mu Mulongo *Kananga-ne-kananga*, waambile na jimi; Mulongo *Kananga-ne-kananga* walumbulwile; Mulongo *Kananga-ne-kananga* waambile mba, mu bya kuyuka bapashi, baambile mba kyajinga kyafuma kwi Nkambo. Kabiji abo bo bukine.”

“Ee!”

“Nanchi, ABYO BYOBYAAMBA AYE NKAMBO, yanga ukobe bulongo, kabiji kaasa obe ukapwa.”

¹⁴¹ Mulongo Jones waya ku nzubo, watola bikochikala, wapaika bipe, watola mipando, kabiji wabwela wawilukapo. Pa tuu koloko keesha mabaanga: Zowie! bintu byonse byafuminepo. Mwamona? Nanchi kipwilo kyatumbijika . . . “Nemusachila, Nkambo Yesu, pa buwame Bwenu.” Pano, abyo byokiji, kukomesha, kwa kipwilo.

¹⁴² Pano, ibyepi umvwe kyabula kumweka panyuma ya kwikyamba? Nishi muji na mupashi watama mukachi kenu. Anweba kechi mukeba akya kintu kyatama ne. Kika kyo mubena kukebela kintu kyatama bino a—a meulu kasa ayula na Pentekosito wakine? Kechi mupingakenyepo kyakala kyatama kufuma kwi diabola ne. Tolai kintu kyakine. Lesa uji nabyo byenu. Pano kechi mfwainwa kwikala na mbung’eno ikwabo ne, kabiji kubikapo kintu kimo ne, poso Lesa washinikisha mba uji bulongo, mambo obewa winkwasho wa kipwilo mu kwingila kwa Mamboawama. Pano, mwikyumvwa byo kiji nyi?

¹⁴³ Kabiji jimi, jimi ingi . . . Kafwako muntu nangwa umo—uyuka kyo abena kwambapo ne. Aye wamba; bino kilulumo kyonse kiji na kilumbululo. Akyo kiji na kilumbululo. [Mulongo Branham watota mapi jisatu—Waku.] “Gluck, giuck, gluck!” Akyo kiji na—akyo ke—ao ke mulaka kuntu kumo.

¹⁴⁴ Kimye kyo Najinga mu Africa, Amiwa kechi ne kiketetekejile ne, bino bintu byonse byaubilenga kyongo byajinga na kilumbululo kyakyo. Aye Baibolo waamba mba kechi kujipo kyongo kivuma kwakubula kilumbululo ne, kyabula kilumbululo ne. Kilulumo kyonse kilengwa kiji na kilumbululo ku kintu kimo. Kika, Nakonsha kumvwa bantu kwamba mba . . . Nakonsha kwamba mba, “Yesu Kilishitu, Mwaana wakwa Lesa.”

¹⁴⁵ Umo mwi abo wakonsha kuya [Mulongo Branham wasombolola mwina Africa ututulula—Waku.]. Mukwabo waya [Mulongo Branham ne jikwabo wasombolola.]. Kabiji awa

wajinga, “Yesu Kilishitu, Mwaana Lesa.” Mwamona? Kyajinga na . . . Kabiji kechi pajipo kilumbululo kwi amiwa ne, pakuuba kwi abo kyajinga mulaka nobe byonka byo Mbena kwamba kwi anweba. Kimye ututulula waki Zulu, Xhosa, Basuto, ne bakwabotu, baishile, byonse byaambiwe, muntu yense waumvwine. Kabiji ne bibye bintu byo mubena kumvwa baabo bantu kasa banyinyita, kabiji ne kulanguluka mba kikukuma, kechi byokiji ne; biji na kilumbululo. Nanchi twafwainwa kwibibwezha pakuuba mba bibwele mubifulo byabyo.

¹⁴⁶ Pano, kapepo kechi kujipo mbila ne. Pano, kupwila kwapwa; lwito lwa kitapisho lubena kwitwa. Kabiji pakupitapo kimye muntu umo (kechi kujipo ne mbila kunyuma kokwa ne) muntu umo waimana akubatambulatu jishuko ja kuuba byobyoy. Aye Mupashi Wazhila . . . Pano, Baibolo waamba mba, “Inge kechi kujipo wakulumbulula ne, mulekai ekale na mutende.” Nangwatu kyumvwanike byepi kutama kyo abena kwambapo, zhindamaitu.

¹⁴⁷ Kwaamba mba, “Amiwa kuuba ne kyuba ne.” Aye Baibolo waamba mba wakonsha kuuba. Mwamona? Nanchi akya—akya kibipwisha bintu byonse. Mwamona? Mulekai ekale na mutende.

¹⁴⁸ Nanchi, umvwe kye, kimye kyaiya apo bintu byonse po biji mundonda, nanchi inge Mupashi Wazhila watolokela pe aye pakuuba mba apane mbila, po eyipana. Abyo kine byo mwafwainwa kuuba. Kyalondelapo ke kulumbulula, waamba mba, “Muji mwanamukazhi muno wa jizhina ja Sally Jones (Naketekela mba muno kechi mujipo mwanamukazhi wajojo jizhina ne, bino . . .) Sally Jones. (Mwamona?) Mubuulai mba abuno ke bufuku bwapelako bwakumwita. Awamishe bintu na Lesa wangi mambo uji na kimye kicheche kya kwikala kuno.” Pano, Sally Jones wanayemena ku kitapisho bukiji bukiji monka mo akonsha kubila (mwamona?), mambo alo lo lwito lwapelako. Mwamona? Akwa ke kupana mbila, nangwa kushinikishiwa, nangwa kintu kimo.

¹⁴⁹ Akya kyo kipwilo kya Pentekosito kibena kwingila. Amwa kechi mujipo lubaji lwa mipashi yatama kutwelamo ne, mambo yaikala kala . . . Aye Baibolo wapana kyakine, “Balekai bekale balondakana, kabiji ne apo bekale basatu; kabiji lekai babiji nangwa basatu bekyeseke.” Akyo kyo kipwilo. Bino kwepi kotwibifyama jalelo? Watoloka, watwa-jijila, waseka kabiji akwe muntu umo kasa abena kwamba mujimi; mukwabo kasa abena kutalapo, kasa abena kwamba pa kitu kikwabo akwe na kuzhokoloka; aye kafunga kasa abena kuuba kintu kimo; nangwa muntu kasa abena kuzhokoloka. Kyawama, akya kechi ibyo ne. Kapepo kafunga kasa asapwila, kabiji muntu umo waimana ne kukilang’anya kulutwe yanji mu . . . Kapepo kutanga Baibolo kabiji muntu umo . . . Kutanga Baibolo, kabiji muntu umo kunyuma kokwa na kwamba mujimi. Oo, ine! Mwamona? Musapwishi waimana mu pulupiti na kusapwila,

muntu umo waimana wa kilang'anya kulutwe, na kwaamba mujimi. Kijitu bulongo. Amiwa kechi naamba mba kechi Mupashi Wazhila ne, bino wafwainwa kuyuka mwakwingijisha Mupashi Wazhila (mwamona?), pa Kumwingijisha.

Pano, Ami—Amiwa mbeni kusenda . . . Muji na mpuzha ya jimo nyi? Pano, keesha ke pa Mulungu. Nanchi, tukooba . . . Twayaitu . . . Ajino jimo. Naketekela mba ke jakila bingi kuwama. Kabiji pano, inge anweba bonse mwakonsha kundekelakotu mambo pa mamineti acheche, mwane. Kabiji pano, Amiwa nkooba . . . Nakeba anweba—Nakeba mba anweba mumvwe kikye. Nafukula kunsunga kikye. Aje jo jami japelako.

Pano, kitanshi, Amiwa nsakutanga bintu bibiji abyo muntu byo aipwizhe. Kiji pa kipepala kyakala, kyanembelwe na kuboko kwawama bingi. Amiwa kechi njipo na buyuke kana yeng'anyi, kechi kuji jizhina janembwako—ku jiji jonse ne.

98. Mulongo Branham, bushe kijitu bulongo ba mwingilo kwikala na kikoka kyabaya kya mali mu kupwila kwabo, ne kubulang'ana mba Lesa wibabuula mba bavula mu jibumba bafwainwa kupana mali avula mukananga? Inge kikye kijitu bulongo, Nakeba kuyuka. Nangwa inge kyatama, Nakeba kuyuka. Akye kyakatazha bingi.

¹⁵⁰ Pano, mwamona, mulunda, Amiwa nsakwimubuula, Amiwa mbeni kwimubuula kyo Nalanguluka. Mwamona? Bino, akyo kechi kyalumbulula mba kiji bulongo ne. Naketekela mba kyatama.

¹⁵¹ Pano, Nalanguluka kikye. Lesa wantumine mu mwingilo. Amiwa namona kimye kyo Namwekele nobe Nafwainwa kwikala kape . . . Kabiji Ami—Amiwa kechi nanjingapo na mali nangwa pachechetu ne. Kabiji Nakonsheshe kwamba mba, “Pishaimotu nsanyi ya bupe.”

Kabiji awa mukulumpe wakonsheshe kwiya kwi amiwa ne kwamba mba, “Tala, Billy, tuji na faivi sauzande madola bufuku buno, Mulunda. Bushe uji na mali mu Jeffersonville a kwikilipila nyi?”

¹⁵² Nakonsheshe kwamba mba, “Kijitu bulongo. Lesa wantumine kuno, nangwa inge ne Amiwa kechi nakonsheshe kwiya ne. (Mwamona?) Pishaimotu nsanyi ya bupe.”

Kabiji kupwila kasa kukiyanje kupwa ne, muntu umo waamba mba, “Mwayukatu, aye Nkambo wabika pa muchima wami kupana madola faivi sauzande ku kikye.” Mwamona, mwamona? Kitanshi, tangijilwai kwikyuba.

¹⁵³ Amiwa kechi naketekela mu kikoka ne, kabiji ne kusashijila, ne kulomba mali. Naketekela mba ke kintu kyatama. Bino, mulongo, inge wikyuba, kechi ne mukozhe momusakila ne. Mwamona? Anweba—anweba mwakonsha kwikala na-jishinda-

ja kwa Lesa ja kwikyuba. Bino Amiwa mbena kwambatu kwi amiwa mwine. Amiwa kechi naketekela mu kikye ne.

¹⁵⁴ Bino, Amiwa nayuka ne bamingilo baya na kwamba mba . . . Naimana bulongo, kechi papita kimye kyabaya ne . . . Bino, akye kechi ke ba Pentekosito ne, akye ke . . . Kyawama, ke bipwilo (mwamona?), bipwilo bikwabo. Kyajinga pa mbung'eno ikatampe. Gertie, wajinga ne amiwa, ne bakwabo bavula muno. Kabiji basendele mabaanga onse ku dinominesheni yaya bingi kuwa—bibiji nangwa bisatu ba mwiabo pamo (abyo ke bipwilo bya kimye kyonse kimye kyonse, nobe bipwilo byetu byakatataka muno mu muzhi, ne bikwabotu) pa mbung'eno ikatampe—kabiji basendele mabaanga onse, na kwimana pa pulatifomu—na kuchinyisha amba Lesa wakonsha konauna bijimwa byabo, wakonsha kupana ku baana baabo kikola kya kalepu, kabiji ne bintu bya musango yewa, inge kechi babikamo mu yoya mbung'eno ne. Abo bo bukine, na yuwe Baibolo kulutwe yami. Naambile mba, “Kemwenga kwi Lesa kabiji ne Bamulondela.” Inge Lesa wakatuma, Aye ukatwajijilatu na kwimulama. Inge kechi Aye wakatuma ne, nanchi lekai dinominesheni imulame. Bino—bino obewa . . . Inge Lesa wakatuma, Aye ukakulama.

99. Pano ibyepi kukaya kisela kya Kimishimishi mu kipwilo kya Mupashi Wazhila?

¹⁵⁵ Kyawama, inge kiji pe Kilishitu, kyafwainwa kwikalatu bulongo. Bino inge kiji kyakwa Santa Claus, Amiwa kechi naketekela mwi aye ne. Amiwa—Amiwa nakomene—Amiwa nakomene nakufumamo mukyokyo. Amiwa kechi naketekela mwi Santa Claus nangwa pachechetu ne. Mwamona? Abye bintu bimo bicheche bya kikye Kimishimishi byo baji nabyo, Nalanguluka mba byatama. Kabiji . . . Bino Nalanguluka mba bafumishemo Kilishitu yense mu Kimishimishi ne kubikamo Santa Claus.

¹⁵⁶ Kabiji Santa Claus ke jishimikila jabubela. (Amiwa kechi mbena kukozhapo nangwa umu mumilanguluko yenu ne, Naketekela, pa baana.) Bino Amiwa nsakwimubuula. Kuno kechi papita myaka yavula ne, pepi nobe tweti-faivi, myaka sate yapita, kimye wamwingilo mu uno muzhi, aye kafunga wa—wa kipwilo kimo kyabaya muno mu muzhi, ye Nayukile bingi bulongo, mulunda nami, aye waendele kwiya kwi amiwa. Kabiji Charlie Bohannon (Mulongo Mike, mwavuluka Charlie Bohannon, mulunda nami wawama) . . . Waikele momwa mu ofweshi wanji ne kwamba mba, “Amiwa kechi kabuula baana bami nangwa ku bakana bami kwamba boobwa bubela ne jikwabo ne.” Aye waambile mba, “Songwalume wami wamulume waendele kwiya kwi amiwa byo afikile pa myaka twelufu, kabiji ne kwamba pe Santa Claus . . .” Kabiji aye, waambile mba, “Kika . . . Mutemwe, Amiwa njina kintu kimo kya kwi mubuula,” waambile mba, “Maama . . .” Mwayukatu, kabiji yaingatu kulutwe na kumubuula kintu kyo aubile.

Nanchi panyuma yakubwela, waambile mba, “Nanchi, Taata, awe Yesu ke kintutu kimo?”

¹⁵⁷ Bulang’anai bukine. Santa Claus ke kintu kyalengatu ba Katolika, Kris Kringle nangwa Nicholas Wazhila, Katolika mwina German wazhila wakala myaka yavula wailenga na kuuba bintu byawama ku baana babacheche. Kabiji abo bekisenda nobe kisho. Bino Yesu Kilishitu ye Mwaana wa Lesa. Aye wakine, kabiji Aye uji na bumi.

Pano, paji jipuzho, jakupelako, ajo ke . . .

¹⁵⁸ Pano talai. Anweba mwakonsha nkupachika ne amiwa pa kikye. Pakuuba inge mwapachika ne amiwa, vulukai, lekai kikale bulunda, mwakonsha nyi? Nemutemwa anweba, kabiji kechi Mbena kukeba—kechi nkeba kwimukozha ku muchima ne. Amiwa jitu, Mbena kukeba kwikala wakishika. Inge kechi Nakonsha ne. . . inge Nakonsha kubuula nsongwalume wami bya bubela, nanchi Amiwa ne wabubela. Mwamona? Amiwa nakeba kumubuula bukine.

¹⁵⁹ Bino, Namubuula pe Santa Claus, Naamba mba, “Ee, kine, kuji Santa Claus. Monai Bataata pabufuku bwa Kimishimishi.” Mwamona? Ee.

¹⁶⁰ Mwayukatu, juba jikwabo Najinga kokwa, kabiji Naesekele kyokyo pa nsongwakazhi mucheche pakuubatu mba mone. Amiwa kine nalipijile masoshi japichile. Najinga mu kishimikwa. Kabiji baimene kokwa, ponka pa Quaker Maid. Kabiji Naileko kokwa nakupota byakwingijisha. Kabiji nanchi atweba, bakazhi ne Amiwa, twajinga monka. Kabiji kwajinga nsongwakazhi mucheche, kechi wapichile pa bang’ondo eitiini ne, kabiji waimene popa, kasa abena kuya, na kwimba, “Mabbelu a Madingo, Mabbelu a Mandingo. . .” Kabiji Naambile mba. . . Byo aimene pabuke, mwayukatu, waikela kunyuma ya kikochikala kya kicheche.

Naambile mba, “Obewa ubena kukeba Santa Claus?”

Aye waambile mba, “Aba bo bataata, Anweba.”

Naambile mba, “Apushiwe muchima obe wamuheche, Mutemwe. Uji na maana.”

Pano, apano po paji kine kilamachila, balunda. Kabiji mu kikye. . . Nanchi Amiwa nsakushika. Oo, ke—ke Kinembelo kya bataata, bino kilamachila bingi ku muntu uji yense ao umweka nobe byo aji. Kabiji kyalamachile pe amiwa pa myaka ne myaka; kabiji kana konka ku lusatu lwa Lesa. . . Kabiji mukazhi wami wawama, waikala kunyuma kokwa, byo aumwine mba Najinga na joja jipuzho mute uno, aye waambile mba, “Bill, wakonsha kukumbula byepi pa kyokyo?” Waambile mba, “Amiwa kimye kyonse ngikala wakumya bingi amiwa mwine.” Waambile mba, “Amiwa kechi nekikwatakanya ne.” Kabiji waambile mba. . .

Naambile mba, “Wiye bufuku bunu, Mutemwe. Amiwa nsakuuba mwaila bukwasho bwa Lesa.”

100. Mulongo Branham, nakusashijila londololai Bahebelu 6:4 kufika pa 6.

¹⁶¹ Akyo kyo kimye kimo po kyaubile... Monai, pano mwafwainwa kumona papo pa lwitabilo lwetu, lusa, bukikizhi bwa baitabila, kuchichika kwa bazhijikwa, kuchichika, nangwa byonkabyo, kwa bazhijikwa. Bahebelu kyapitala kya bu 6, 4 kufika ku 6.

Pano, bukiji bukiji aku... kupwisha kikye, nanchi naketekela mba Lesa usakunkwasha kwikilondolola bulongo kwi anweba. Mundekeleko mambo, Na—Njina Mbila yami ya bufuku bunu; kapepo Amiwa kasapwila kintu kimo mu lukeelo kelo ku—ku mpwijilo. Apo Amiwa po kayanga.

¹⁶² Pano, akye kilamachila bingi. Mwamona? Bino, mwafwainwa kumona. Pano vulukai, twaketekela ne kufunjisha pa kino kipwilo, kechi mba kintu kyonse kiiya kabiji ne kubijika, bintu byonse byamba mujimi, byonse biimuna maboko na musapwishi, biji na Bumi Bwapeenape ne. Bino twaketekela mba inge uji na Bumi Bwapeenape, inge Lesa wakupa Bumi Bwapeenape, uji Nabo myaka ne myaka. Mwamona? Mambo talai. Inge kechi byo kyaubilwe ne, Yesu watantwa kuuba mba mufunjishi wabubela. Mu Yoano Wazhila 5:24, Aye waambile mba, “Aye umvwa Byambo Byami ne kumwitabila Aye watuma Ami uji na Bumi bwa Myaka, kabiji kechi ukeya ku kinje ne, pakuuba wapita kufuma kulufu kuya ku Bumi.” Pano, pachikai Nanji. “Bonse Bobapa kwiba Taata... Kafwako muntu nangwa umo wiya kwi Amiwa ne kanatu ba Taata bamukoka. (Amiwa mbena kwambula Kinembelo.) Bonse beya... Kafwako muntu nangwa umo wiya kwi Amiwa ne kanatu Ba Taata bamukoka patanshi. Kabiji bonse Ba Taata bo Baapa bakeya kwi Amiwa. (Mwamona?) Kabiji bonse beya kwi Amiwa, Amiwa ke bapa Bumi bwa Myaka (Yoano Wazhila 6), kabiji nkamusangula mu moba akapelako.” Abye byo byambo Byanji.

¹⁶³ Pano talai. Inge Nasaka kubwela ku Efisesa kyapitala kyabu 1, Paulo kusapwila... Pano, bena Kolinda, umo wajinga na lujimi ne masalamo. Inge mwamona bipwilo bikwabo kechi bajinga na loolo lukatazho ne. Aye kechi waambilepo kintu nangwa kimo pa kikye ne. Bushe watongolapo jimi paji ponse mu kipwilo kya Efisesa, kipwilo kya bena Loma? Ine! Bajinga na jimi ne bintu bikwabotu nobe byonka byajinga bena Kolinda, bino bajinga nabyo mu ndoonda. Bena Kolinda kechi bakonsheshe kwikibika mu ndoonda ne. Mwamona? Bino Paulo waile konka kwa na kubika kipwilo mundoonda.

Pano, aye... Naketekela, nobe byaambile Oral Roberts, “Lesa ye Lesa wawama.” Kechi mwaketekela kyokyo ne?

164 Kabiji mwaamba mba, “Kyawama, pano nga ba Pentekosito na jimi nanchi, Mulongo Branham?” Naketekela mba batambwile Mupashi Wazhila. Kine byo baubile. Kijitu bulongo, kika? Talai. Anweba mwaketekela mba Aye ye Lesa wawama? Thomas waambile kimye kimo, “Mwayukatu, Nkambo. . .”

Bonse bashala mwi abo bamuketekejile Aye. Waambile mba, “Oo, twayuka mba Aye wakine!”

“Oo,” Thomas waambile mba, “ine, ine, kechi Nekiketekela ne. Jishindatu jimo jo Nekiketekela, Nafwainwa kwikala na bukamonyi. Nafwainwa kubika minwe yami mu lubaji Lwanji kabiji ne mubito bya misumali ya mu maboko Yanji.”

Aye ye Lesa wawama. Aye waambile mba, “Iyai kuno, Thomas. Abyo byobiji.”

“Oo,” Thomas waambile mba, “pano Naketekela.”

165 Aye waambile mba, “Ee, Tomase, panyuma ya nkumona Amiwa, ne Nkukwata, ne kubika kuboko Kwami. . . maboko obe ku lubaji Lwami, mwaketekela. Bino mfweto yabo byo yabaya aba babuujile kumona bino banketekela.” Aye ye Lesa wawama. Aye upana nkebelo ya muchima obe, nangwa byonkabyo. Twayai tumwitabiletu Aye. Akyo ke—akyo ke—alo ke lufu lwafikila Satana. Umvwe muntu wasenda Lesa pa Kyambo Kyanji, mulongo, akyo kikepaya Satana kimye kyonse. Ako kekupumana kwakosa bingi Satana koakonsha kutambula, inge muntu wasenda Lesa pa Kyambo Kyanji. Ee, mwane. Nobe byonka byo Naambile, “Muntu kechi ukekela bunke ne (Yesu, bufuku bukwabo), kana Kyambo kyonse kifumatu. . .”

166 Pano, monai kikye. Pano Mbena kutatula veeleshi mutanshi:

Oka o mambo nanchi tuleke mambo abintu bitanshi bya Kilishitu, tuyenga kulutwe tufike ne kukulumbuluka; . . . (Pano, kintu kitanshi kyo Nasaka mba anweba muyuke: ing’anyi Paulo ye abena kwambako papo? Bahebelu. Baamba mba, “Bahebelu,” baji peulu, Buuku wa Bahebelu. Abyo ibyo nyi? Ba Yudeya bakaine Yesu. . . Mwakonsha—anweba mwikyumvwa pano nyi? Aye ubena kwamba ku ba Yudeya, na kwibamweshwa kivule kya mizhilo kwikala ke kipasha kya Kilishitu. Bintu byonse byakala ke kipasha kya byakatataka. Pano monai.)

. . . tuleke mambo abintu bitanshi bya lufunjisho lwa Kilishitu, tuyenga kulutwe tufike ne kukulumbuluka; . . .

167 Bino, aye ubena kwamba nabo pa mafunjisho. Twayai tuye kulutwe na kwamba pa bintu byalumbuluka. Pano, obewa walumbuluka mwi Lesa inge wabikwa katetesho ka Mupashi Wazhila *poso* kufika ku juba ja bukuzhi bobo. “Aye wasemwa kwi Lesa (Yoano Mutanshi) kechi ulenga mambo ne; mambo

kechi wakonsha kulenga mambo ne, mambo Lukunwa wa Lesa wikala mwi obewa.”

168 Muntu wayuzhiwa na Mupashi Wazhila, kechi yewa ulanguluka mba wayuzhiwa ne, kana yewa wasemwa ku Mupashi wakwa Lesa kechi ulenga mambo ne, mambo Lukunwa wa Lesa uji mwi aye, kabiji kechi wakonsha kulenga mambo ne. Mwamona? Bushe Baibolo waamba byobyo nyi? Nanchi abyo byokiji. Obewa wi. . . Kechi byo wauba ne, kika, ke kika, kechi ntanda byo ikulanguluka ne, kana byobya bikulanguluka Lesa. Mwamona, mwamona? Anweba kechi mwakonsha. . . Nakonsha kwikala byepi na ndoonda yanemba bameya bamuzhi, amba Nakonsha kunyema lubilo foote mailoshi pa awala umo kupita mu muzhi, bushe kapokola uji yense wakonsha kukwata nyi? Ami ne. Nakonsha Kulenga byepi mambo kasa kuji kitapisho kya mashi kikupu ku meso akwa Lesa, apo Aye kechi wakonsha kumona ne; kasa kuji bukikizhi ku—ku. . . kumeso ami ne Lesa, jikebo ja Mashi? Mambo atweba twafwa, kabiji ne bumi bwetu bwafiwa mwi Kilishitu kupichila mwi Lesa, bwabikwa katesho ka Mupashi Wazhila. Mu ntanda wakonsha kuuba kintu kyatama ku meso akwa Lesa byepi? “Inge twalenga mambo a mulupata (Bahebelu 10) panyuma ya kutambula maana a Bukine, kechi kujipo kitapisho kikwabo kya bubi ne.” Muno kechi kyakonsheka (mwamona?) kulenga mambo a mulupata ne.

169 Pano, twayai tuye kulutwe tutange. Kijitu bulongo.

. . . kulumbuluka; kechi kwaala jibiji bitendekesho bya—bya lulapilo ku mingilo ifu ne, kabiji. . . lwitabilo mwi Lesa,

Alufunjisho lwa mabatizhilo, . . . bya kubika maboko, kabiji ne bya lusanguko lwa bafu, ne. . . luzhachisho lwa peenape.

Kabiji bibye. . . byotukoba, inge Lesa waswa.

(Pano papo po bakebelenga kutatula, kufuma mu veeleshi wabu 4.) Mambo kechi kyakonsheka kuboba. . . batambwile kala kyeya ne, kabiji batompele ku kya bupe kya mwiulu, kabiji baubilwe ke bakutambula Mupashi Wazhila,

Kabiji batompele ku mambo awama a Lesa, kabiji ne bulume bwa ntanda ikeya,

Inge bapondoka, kechi kyakonsheka kwibabusha—kwibabusha jibiji ku lulapilo ne; byo bepopela jibiji Mwaana Lesa ku musalabu, ne kumumweshwa bumvu patoka.

170 Pano, pano, akyo kimweka nobe, kufuma mujishinda jo mubena kwikitangapo, kyakuuba mba muntu wakonsha kutambula Mupashi Wazhila, kabiji wabwela panyuma

waikala walubilamo. Bino kechi kyakonsheka ku mubilwa ne. Mwamona? Aye kuuba wikyuba ne. Inge wikyuba, Kilishitu wabepele. Mwamona? Kechi kyakonsheka kuboba batambwile kyeya ne. Pano, monai papo. Ubena kwamba ku bang'anyi? Aye ubena kwamba ku boba ba Yudeya bapelejile ku mupaka. Aye kechi waambile mba muntu wayuzhiwa na Mupashi Wazhila ne; aye waambile mba, "Inge watompa Kyambo kya Lesa."

¹⁷¹ Pano, lekai ne kipane mu bukishipi, pakuuba mba mwikimone kabiji kibule kwimupita. Pano, aye ubena kunembela babo ba Yudeya. Bamo bo ke baitabula ba kumupaka. Mwamona? Aye waambile mba, "Pano, tusa kusha iye mingilo ne kwamba pa kulumbuluka." Waamba mba, "Pano, tubena kwamba pa bya mabatizhilo, ne lusanguko lwa bafu, ne bya kubika maboko, kabiji ne bintu byonse; pano twayai tuye kulutwe twambe pa kulumbuluka. Pano, tusa kwamba inge mwaiya mu Mupashi Wazhila. Bino, anweba mwakobamine pa bya mbung'eno kimye kyabaya. . ."

¹⁷² Kabiji anweba mwamona booba bantu. Abo bekala; kechi bakonsha kutwela nangwa kulupuka ne. Abo basachila Mupashi Wazhila. Bakonsha kwiya na kuzhokoloka. Kabiji kapepo Mupashi Wazhila waubapo kintu kimo kabiji, banabalume, bakonsha kwimana ne kubijika, kabiji batolauka peulu ne panshi namambotu akyokyo, bino kechi bakeba ku Mutambulwila abo bene ne. Ine, ine! Mwamona? Kabiji bakamba mba, "Oo, ee, akyo kyawama. Oo, Amiwa kechi nayuka pa kyokyo ne." Mwamona, mwamona, mwamona? Baitabila bakumupaka. Bajitu peepi pepi kyakuuba mba bakonsha ne Kwikitopa, bino nangwa byonkabyo kechi Bekitambula ne. Mwamona? Bino, bekala byonkabya pa kimye kyabaya poso byo beya babwela baya. Nakonsha kutela mazhina a bavula bajinga pa tabbanako, baubiletu kintu kimo. Baponatu baya ne jikwabo, pa kwibabwezha ku lulapilo, kechi kuji lulapilo lwabo ne. Abo bafichisha pa muchima Mupashi wabwela wafumako kwi abo. Bajinga bingi pepi posotu. . .

¹⁷³ Apo, inge mwakonsha kuzhikula pamo ne amiwa (kechi muji na kimye ne, Nayuka, pano) bino inge mwakonsha kuzhikula mu Mpitulukilo ya mizhilo kyapitala kyabu 1 ne kwikitanga, mwakonsha kutana kintutu kimo. Kwikinemba ponka pano, Mpitulukilo ya mizhilo kyapitala kyabu 1. Pano, kabiji kutatwila pa veeleshi wabu 19 kabiji kutanga kufika ne pa veleeshi wabu 26. Mpitulukilo ya mizhilo. . . Mukatana mba. . . Pano talai. Bonse ba Isalela. . . Byo baubile bantu, bafikile ku Kadeshi-beleniya. Oo, Namona kintu kimo! Uno tabbanako, ino ntanda ya Pentekosito iji ku Kadeshi-beleniya. Abyo kine ibyo, Mulongo Neville. Tuji pa Kadeshi-beleniya, kipona kya buchibishi bwamambo kya ntanda (kyajinga kipona kyabuchibishi bwamambo).

¹⁷⁴ Kabiji bakukikizha ntanda bayile. Yoshiwa waambile papo,

“Bino, Natumineko bakukikizha ntanda,” nangwa Mosesa, byonkabyo, “Natumine bakukikizha ntanda, twelufu, umo wabo, umo muntu kufuma mu mukoka umo wabo. Nebatumine kuya na kukikizha ntanda kabiji ne kubwezha sawakya.” Abyo ibyo nyi?

Kabiji byo babwelele, kwajinga naini pa twelufu baambile mba, “Oo, ke ntanda yawama, bino oo, lusa, kechi twakonsha kwikitambula ne. Oo, ami! Abo bena Amoli mobaji, kabiji twamwekelenga nobe batete pakwimana kulubaji lwabo. Ke bantu baji na byanso. Bibumba byabo byabaya. Oo, kyaikesha...kika, Kyawamine kufwila momwa mu Ijipita kukila kukitula kuno.”

¹⁷⁵ Bino, mucheche mukulumpe Kaleba ne Yoshiwa batolokele ne kwibazhindamika bonse; baambile mba, “Atweba twakonsha kwikitambula.” Ee, mwane! Aba bo ibo. Pano talai. Kika kyamwekele? Kaleba ne Yoshiwa bayukile mba Lesa wapaine mulaye wakyo: “Amiwa kechi natako muchima ne nangwatu kibaye byepi, nangwa byamba bikale byepi, nangwa bilepe byepi, nangwa bibaye byepi, akyo kechi kijipo na kintu kimo kyakuba nakyo ne. Lesa ye waambile byobyo, kabiji twakonsha kwikitambula.” Kabiji mwayuka mba boboka bantu babiji, kufuma mu tuu na afu milyoni, baabukile kutwela mu ntanda? Mambo ba kwachijile lwitabilo lwabo mu byaambile Lesa amba bya Bukine. Amena!

¹⁷⁶ Tabbanako, pakino kimye, ya imana pa Kadeshi-beleniya. Talai, aba bantu bajinga bingi pepi kyakuuba mba batopele ne magelepu a muyoya ntanda. Bajile magelepu. Kimye Kaleba ne bakwabo baile konka ne kuleta magelepu, aba balunda baapileko amo ne kwi aja. “Oo, byawama bingi, bino kuuba twikyuba ne.” “Ibo aba batompele mingilo yawama yakwa Lesa, batopako ku Mupashi Wazhila, bamona buwame Bwanji, abo Bekitompele, batompele ku Kyambo kya Lesa...” Mwamona kyokyo? Kafwako nangwa umo wabooba bantu, kafwako nangwa umo waswishiwe kuya bushiya ne. Abo baonawinwe muntanda yabo, amwa monka mungyetu. Abo kechi baabukile ne, nangwa byonkabyo bajinga pepi bingi na Kwikitopa, bino kechi bajinga na bupe bwafikilamo ne lwitabilo lwa Kwikisenda ne. Abyo byokiji.

¹⁷⁷ Pano. Pano telekai ku yewa muntu mutemwe wanembele iye kalata. Twayai tutange veeleshi walondelapo. Talai pa mineti umo. Talai Paulo. Pano twayai tutange kyabu 7:

*Mambo mushiji...watoma mvula
wamunokelanokela, ne kumenesha kajo kafwainwa
abo bo bamujimijile, bamupesha mapesho kwi Lesa:*

*Pakuuba umvwe umenesha miba ne bincha
ulengululwa, kabiji uji pepi na kufingwa mafingo; ne
mpelo yanji ko kusokwa.*

178 Pano, monai kyo abena kwambapo? Pano talai. Akwa kwajinga jije jipuzho; pano, kabiji pano po tusakupwisha... Akye kintu kyakebele kungipaya pa myaka yavula.

179 Amiwa naile ku mbung'eno imo bantu po baambile na jimi ku Mishawaka, Indiana. Pano, Amiwa nji ku jibumba jami. Anweba mwibomvwapo bantu...mwang'umvwapo amiwa kubulang'ana jishimikila jabumi bwami, kabiji pepi nobe mwanamulume wachiluluka waambile mba, "Awe uji papo. Awe uji papo." Bino, Nabuulang'ene kyokyo.

180 Pakuuba byonse byashala: Namwene bantu babiji. Bajinga...Umo wakonsha kupana mbila, mukwabo wi kilumbulula. Mukwabo wapaine mbila, kabiji mukwabo walumbulula. Kabiji mulongo, bajingatu bulongo. Nobe bibye...Nalangulukile mba, "Buwame bwami! Amiwa kechi nakimonapo kintu kiji byobya ne." Naambile mba, "Amiwa nji mukachi ka bamalaika." Nalangulukile mba, Amiwa kechi namonapo kintu kyabyobya ne...Umo wakonsha kwamba, kabiji mukwabo...

181 Kabiji Naikele kunyuma konkwa, nobe musapwishi mwanyike wakala, obewa...[Kafwapo kiji pa tepu ne—Waku.]... bonse babiji bantu kimye kimo beimuna maboko abo. Amiwa kechi na kimwenepo bantu baji byobya mu bumi bwami ne. Bakonsha kwamba mbila, kabiji mukwabo walumbulula. Kabiji ami, ami! Kyajinga kyawama! Umo, waamba kabiji mukwabo walumbulula. Bonse...Kabiji bakonsha kwaluka ke batokoloka inge basutula maboko. Nalangulukile mba, "Oo, ami, ami! Kwepi ko Najinga bumi bwami bonse? Akye kyo kintu!" Naambile mba, "Ba Pentekosito baji bulongo." Abyo kine ibyo.

182 Amiwa kechi nakimwenepo byavula ne kanatu byonka byaubiwenga ponkapa, ako...Kapepo banabakazhi bamo baji na bumishonyi kuntu kumo. Kabiji bepachikilenga; umo na kutela mukwabo mba, "uja bifwila," mwayukatu, nobe byonka bya, nobe kwiendeleka umo na mukwabo. Kechi kulengulula banabakazhi nangwa kintu kimo ne, bino kyajingatu... Kyajinga—kyajinga kyapanshi. Inge bamo mwi anweba... Vulukai, Mulongo Graham. Najingatu mwanyike pa kyokya kimye. Kabiji nanchi, abyo byobyo kyajinga.

Kabiji Natelekele ku kyokya, kabiji Nalangulukile mba, "Oo, ami, Amiwa nakumanya bamalaika."

183 Juba jimo kasa mbena kwiya na kuzhokoloka mu koono ya nzubo, pepi nobe juba ja bubiji, Nakumenye umo wabooba bantu. Naambile mba, "Muji byepi, Mwane?"

Aye waambile mba, "Muji byepi?" Aye waambile mba, "Bushe...Jizhina jobe yobe ng'anyi?"

Kabiji Naambile mba, "Branham."

Aye waambile mba, “Kweepi ko wafumina? Kuno?”

Kabiji Naambile mba, “Ine, Amiwa nafuma ku Jeffersonville.”

Aye waambile mba, “Kyawama, akyo kijitu bulongo. Obewa wi Pentekosito nyi?”

Naambile mba, “Ine, mwane, Amiwa kechi byonji ne.” Naambile mba, “Amiwa kechi naitabizha jishinda ja ba Pentekosito ja kutambwilamo Mupashi Wazhila ne,” Naambile mba, “nangwa byonkabyo,” Naambile mba, “Amiwa nji pano na kufunda.”

¹⁸⁴ Aye waambile mba, “Kyawama, akyo kyakila kuwama.” Kabiji pa kwamba nanji, na kukwata mupashi wanji (nobe mwanamukazhi ku mushima), wajinga Mwinakilishitu wakine. Mulongo, Natazha mukuuba mba wanyemenengatu bulongo. Aye wajinga wawama. Pano, anweba bonse... Baanga batanwako ku mpwijilo yami kabiji ne kumona bibye bintu byamweka? Mwamona? Kabiji awa muntu wajingatu bulongo. Nanchi pano, Na—Nalangulukile mba, “Akwa! Ami, byo kyawama!”

¹⁸⁵ Pepi nobe mabaanga, kimye kya mute, Nakumenye mukwabo. Naambile mba, “Muji byepi, Mwane?”

Aye waambile mba, “Muji byepi? Jizhina jobe yobe ng’anyi?” Kabiji Namubuuji. Kabiji aye waambile mba, “Uji... Obe wi—obewa waki Pentekosito?”

Naambile mba, “Ine, mwane, kechi kine waki Pentekosito ne, Amiwa kechi nalanguluka byobyoye ne.” Naambile mba, “Amiwa njitu kuno na kufunda.”

Aye waambile mba, Naambile mba, aye waambile mba “Obewa uji na Mupashi Wazhila nyi?”

Naambile mba, “Ami—Ami kechi nayuka ne.” Naambile mba, “Mwaila byo muji nabyo, Naketekela kechi Njinabyo ne.”

Kabiji aye waambile mba, “Bushe waambapo mujimi nyi?”

Naambile mba, “Ine, mwane!”

Aye waambile mba, “Nanchi kechi uji Naji ne.”

¹⁸⁶ Kabiji Naambile mba, “Kyawama, Na—Naketekela mba abyo ibyo.” Naambile mba, “Amiwa kechi nayuka ne. Nabaasapwilenga pa myaka ibiji, ne kubwela mushi,” kabiji Naambile mba, “Amiwa kechi nayuka byavula pa Kikyeyo ne.” Naambile mba, “Kapepo kechi Nayuka ne.” Naambile mba, “Amiwa kechi nakonsha kukwatakanya ne...” Mambo kika, Naesekelenga kumukwata popa (mwamona?), pakuuba mba nekikwate. Kabiji byo Naubile, inge Nakumenye kafutufutu, awa wajingapo umo wa mwiabo. Mukazhaji wajinga na mutwe-ufita; kabiji waikelenga na mwanamukazhi wamutwe-wachiluluka, wajinga na baana babiji kwi aye; kabiji ne kwamba

mujimi, ne kulumbulula byonka byo kyafwainwa kwikala. Kabiji Naambile mba, “Pano, Nkambo, kika kyo Natwelelemo?” Kufuma ku bamalaika, Amiwa kechi nayukile kyo Najingamo ne. Naambile mba, “Ami—Ami—Amiwa neulonda byanembwa; kyafwainwa kwikala Baibolo. Kyafwainwa kwikala bulongo. Kujipo kintu kimo kyatama pantu pamo, Nkambo. Kyakonsha kwikala byepi?”

¹⁸⁷ Naile ku mbung’eno abwa bufuku, kabiji awa Mupashi waponenenga; kabiji mulongo, wakonsha Kwikyumvwa, amba Kyajinga Mupashi Wazhila. Ee, mwane! Inge kechi Kyajinga byobyo ne, Kyajinga na bukamonyi na mupashi wami amba Kyajinga Mupashi Wazhila. Kabiji Najingatu musapwishi mwanyike, kabiji kechi nayukile mwakuubila ne, byavula bya kuyuka mupashi. Bino Amiwa naikele popa. Kabiji Nayuka mba yeka Lesa umo wampulusha, aya yajinga ng’umvino imo. . . Naumwine nobe Mbena kupita mu mutenge, kyajinga ke ng’umvino yawama bingi mu kyokya kishimikwa. Nalangulukile. . .

¹⁸⁸ Pepi nobe fiftiini aduleendi ba mwiabo momwa. Nalangulukile mba, “Ami, oo ami!” Tuu nangwa fiili ba mwiabo bakumene pamo. Kabiji Nalangulukile mba, “Amba, ami! Kyakonsha kwikala byepi? Pano, awa Mupashi mukatampe mu kino kishimikwa ubena kupona byobya; kabiji papo, wamona kikye kibena kubiwa popa, aba bantu kwamba mujimi, kulumbulula, kupana mbila yalumbuluka— kabiji umo wa mwiabo kafutufutu kabiji mukwabo muntu wakine wa Lesa.” Kabiji Nalangulukile mba, “Pano, Amiwa navundakana. Amiwa kechi nayuka byakuuba ne.”

¹⁸⁹ Kyawama, panyumatu ya kyokyo, mulunda nami wawama, Mulongo Davis (mwayukatu), watatwile kwamba mba Amiwa ne kilubi. Akya kikandoli kya nsongwakazhi, mwayukatu. Kabiji nanchi, Najingatu katanda, kabiji nanchi Ami. . . Aye watatwile kuuba ne amiwa, kabiji ne kutwajijila, na kuseka ne amiwa.

¹⁹⁰ Kabiji twajinga na mucheche. . . Kabiji ba inobe kabiji ne atweba bonse twajinga na mbung’eno icheche ya ku mampuzha apusanapusana. Tabbanako kechi wa—kechi wayingijilenga pakyokya kimye ne, kabiji twajinga nampwijilo icheche mu mapuzha apusanapusana. Kabiji pa kupezhako juba jimo, panyuma tabbanako yashimikwa, myaka yavula palutwe, Naile ku Green Mill ku lukelo lwami na kulomba, mambo Mulongo Davis waambile bintu byatama pe amiwa mu—mu—mu kipepala kyanji. Namutemenwe. Amiwa kechi nakebelenga kintu kimo kyakumweka ne, kabiji Ami—Ami naile kookwa na kumulombelela. Kabiji Naile kookwa, kabiji Nafikile mu lukelo. Kabiji Naikele momwa pa moba abiji. Kabiji Naambile mba, “Nkambo, mulekelaiko mambo. Aye—aye kechi watazha mu—mu kyokyo ne.” Kabiji Nalangulukile mba, “Mwayukatu. . .” Amiwa kyamwekeletu nalanguluka pa Kinembelo.

¹⁹¹ Kabiji Nalupukile pangye. Kabiji kwajinga mwandalo (awa mwandalo ukiji ponka, najinga ponka kechi papita kimye kyabaya ne) mushi ya mutumba kabiji wakilang'enyekajishinda kakacheche kafuma ku jibwe. Kabiji Nazhalulwile awa mwandalo, kasa mbena kutala ku mutumba kunyuma—kunyuma kokwa, kabiji nabikilepo Baibolo wami byobya. Nalangulukile mba, “Mwayukatu. . .” Amiwa nalangulukilenga pa Kinembelo: “Awa sendwe, wangubile bintu byatama bingi, ne kwamba bintu.” Mwayukatu. . . Nalangulukile mba, “Naketekela Nsakutangatu kikye.” Nazhikwile Baibolo, kabiji Naambile mba, “Kyawama. . .” Nashimwiine mu meso ami, kabiji mwela wapupile, kabiji wazhikukile mu Bahebelu 6. “Kyawama,” Naambile mba, “ako kechi ko kiji ne.” Kabiji Namutujile Jibiji nobe bibye. Kabiji mwela wapupile ne jikwabo wabwela Wazhikulapo. Kabiji Naambile mba, “Pano, akye ke kyenye, mwela wazhikulapo jibiji byobya.” Nanchi Nalangulukile mba, “Kyawama, Naketekela Nsakwikitanga.” Kabiji waambile mba:

*Mambo kechi kyakosheka ne amba aba batambwile
kala kyeya, . . . baubilwe ke bakutambula Mupashi
Wazhila, kabiji batompele ku . . . Kyambo kya Lesa,
kabiji ne byobya bintu bya muntanda ikeya.*

Nalangulukile mba, “Kyawama, Amiwa kechi namonapo kintu nangwa kimo pa kyokyo ne.” Nekitanga kuya panshi, kyapitala kyonse. Kafwamo kijimo mu kikye ne. Naambile mba, “Kyawama, akyo—akyo kyaikajika byonse.” Kabiji Na—Nekimwene nobe bibye, kabiji kyabwelele kyazhikuka jibiji. Kabiji Namutolele, kabiji Nalangulukile mba, “Kyawama, kyo kika kya?” Natwajijiletu na kwikitanga, na kwikitanga, kabiji na kwikitanga, Naambile mba, “Kyawama, Amiwa kechi naumvwisha ne.” Nanchi Natwajijiletu. . . Kabiji Natanga kuya kulutwe:

*. . . kechi kyakonshaka ne kuboba batambwile kala
kyeya ne, . . .*

Kyaishile kufika ne pa mpuzha apo po kyaamba mba:

*Kabiji mushiji. . . watoma mvula wamunokelanokela,
ne kumenesha kajo kafwainwa abo bo bamujimijile,
bamupesha mapesho kwi Lesa:*

*Pakuuba umvwe umenesha miba ne bincha
ulengululwa, kabiji. . . uji pepi na kufingwa mafingo;
ne mpelo yanji ko kusokwa.*

¹⁹² Naambile mba, “Nakumya kana kyalumbulula ka?” Nakonsha kuuba. . . Bino, kechi Nalangulukilengapo nangwa kimo ne. Nalangulukilengatu kyokyo. Kabiji ponkapo byo Naikele popa, Nalangulukile mba Nkambo wakonsha nkupa kimwesho kya kwa Mulongo Davis kabiji ne booba baji kokwa. Kabiji Naikele popa; Nakeketele, kabiji Namwene kintu kimo

kibena kukilang'anya kulutwe yami. Kabiji kyajinga ntanda yazhokolokelenga. Kabiji Neimwene yonse yaumine, yamwekele nobe yonse be ijima. Kabiji Muntu wailenga na—na—na kikatampe kintu kulutwe Yanji kyayujile na kunwa, kabiji Aye wabyajilenga kunwa konse kwaya ntanda mo Ailenga. Kabiji Aye wailenga na kuzhokoloka ntanda, kabiji Aye wafumine ku meso ami. Kabiji byo Afuminetu kumeso ami, kwaishile muntu ubena kumweka-kujimuka bingi, wamwala bivwalo bifita, ubena kuya na kuzhokoloka bibye, nakuya, *wii, wii*, nakutayamo kunwa yatama, *wii, wii*. Kabiji Amiwa ne kimwene, kabiji ntanda yatwajijiletu na kuzhokoloka . . .

¹⁹³ Pakupita kimye wichi wamenene. Kabiji wichi byo amenene, kufuma monka mwa mwalupukile bincha, ne bisonsonya, kabiji ne miba, ne sokotela, kabiji byonse byakomenenga, seku ikwabo, kabiji ne bintu byonse byakomenenga monka mu wichi. Kabiji byonse byakomenenga pamo. Kabiji kwaishile kiine, kyashi kyatama, kabiji ka wichi kakacheche kakunyikile mutwe wanko byobyaya, kabiji ne bincha bya bicheche, ne bisosonya, miba, byakunyikile mitwe yabo. Kila luseku wajitu, *fwaa, fwaa, fwaa, fwaa*, kupemashika byonkabya. Mwakonsha kwibyumvwa. Kabiji byaichilenga mvula, mvula.

¹⁹⁴ Kabiji pakupitapo kimye, kwaishile jikumbi jikatampe, kabiji ne meema anokejile panshi. Kabiji byo aponejile popa, awa wichi watolokejile peulu ne kutatula kwamba mba, “Lukumo! Aleluya! Jitotwe ja Nkambo!” Peulu ya kiluka seku ikwabo ne kubijika mba, “Lukumo! Jitotwe ja Nkambo! Aleluya!” Miba ne byonse, na kuzha mu bujimi bonse, ne kubijika mba, “Lukumo! Aleluya! Jitotwe ja Nkambo!”

Kyawama, Naambile mba, “Amiwa kechi nakonsha kwikyumvwa kye ne.”

¹⁹⁵ Kimwesho byo kyafumine pe amiwa; ponkapo Nabwelele jibiji ku kyokyo: “Bincha biji pepi nakulengululwa.” Nanchi Amiwa ne kyumvwine. Yesu waambile mba, “Mvula unokela pa baoloka ne pa babula koloka.” Muntu wakonsha kwikala mu mbung'eno, wakonsha kwamba na jimi, wakonsha kubijika ne kuuba nobe bonse bashala baji na Mupashi Wazhila wakine kabiji nangwa byonkabyo kasa babula mu Bufumu bwa Lesa. Abyo kine ibyo. Bushe Yesu kechi waambile mba, “Bavula bakeya mu joja juba ne kwaamba mba, ‘Nkambo, bushe kechi Napangilengamo bademona mu Jizhina Jenu? Bushe kechi Naawilenga (basapwijilenga) mu Jizhina Jenu nenyi? Bushe kechi Naubile mingilo yavula ya bulume mu Jizhina Jenu nenyi?” Yesu waambile mba, “Fumai kwi Amiwa, anweba bakuba bibi, Amiwa kechi ne muyukilepo ne.” Pano ngakyo?

¹⁹⁶ Abino byobyoyo kyalumbulula papo. Mwamona? Batompele pa mvula yawama yakufuma Mwiulu. Bino kyakutatwilapotu, bajinga batama. Kyakutatwilapotu kintu kyobaimejilepo kechi

kyanjinga bulongo ne; kebelo yabo kechi yajinga bulongo ne. Kuuba mba, kechi wakonsha kubulang'ana ne. Aye... Mwayukatu, mukimye kya kunowa aye waambile mba, "Bushe Amiwa ngyenga kulutwe na kwibikokamo byonse nyi?"

¹⁹⁷ Aye waambile mba, "Balekai bakomene pamo, kabiji pa joja juba miba ne bisonsonya bikasokwa pamo, kabiji wichi ukatwalwa mubutala." Pano, mwakonsha kuyuka byepi amba ye mwiba, nangwa wepi kisonsonya, nangwa yeng'anyi wichi? "Konka kubipangwa byabo koko mukebayukila." Mwamona, mulongo, nyenga, kinchi kyawama kechi kikapanga bipangwa byatama ne. Nangwatu kikale byepi, pantu pamo mujishinda, kikakutana. Nanchi, obe pa kukeba lubatizhilo lwa Mupashi Wazhila... Amiwa nji bingi na lusekelo pa bonse banembele kikye. Mwamona?

¹⁹⁸ Pano, aba baitabila ba kumupaka kunyuma kokwa, bajinga bulongo nabo. Bajinga batwalwa ku mukanda na yenka mukanda wabo. Baile konka kuyoya ntanda Lesa yo ebalaille, kufikatu ne kupelo yakyo. Bantu bavula benda bapela ne kusa. Aye ukenda kufika ne ku lubatizhilo lwa Mupashi Wazhila kabiji ne ku mukana. Aye kechi ukeba kwikileka ne. Aye ukenda kuya ku Kinembelo kya lubatizhilo mu Jizhina ja Yesu Kilishitu, kabiji wabwela wavundaminako nyuma yanji, kabiji wikikana kwikimona ne.

¹⁹⁹ Kechi kujipo Kinembelo kimo mu Baibolo yense ne apo muntu po abatizhiwe mu jizhina ja Taata, Mwaana, Mupashi Wazhila, kechi pajipo Kinembelo nangwa kimo ne. Kipwilo kya Katolika kyokyatatwile, kyalupukila mwi Luther, kufika mwi Wesley, kabiji kyaenda kufika ne kuno. Abyo kine ibyo. Pakuuba mwaila Binembelo ke Jizhina ja Nkambo Yesu Kilishitu. Alo ke lubatizhilo lwa batumwa. Kuuba mwauba kyokyo ne kwikala mu dinominesheni ne. Abyo ibyo.

²⁰⁰ Pano, mwamona bibye bintu? Lubatizhilo lwa Mupashi Wazhila, bya bupe bya Mupashi, bintu Lesa byo aleta... Kipangwa kya Mupashi ke butemwe, lusekelo, kukoka muchima (oo, mwaamba mba, "Bino Mulongo Branham, apeshe Lesa, Amiwa ne kukoka muchima." Kyamwekatu nobe ikyo. Naile ku Ohio kuno kechi papita kimye kyabaya ne, kabiji muntu umo wangipwizhe, wanembejile kalata kuno kabiji wangipwizhe inge Mbatizha bantu mu Jizhina ja Yesu Kilishitu. Amiwa kechi Naambilepo kyambo nangwa kimo ne. Bekitaine nangwa byonkabyo, bamingilo sikisitiini mo bengijila bafuminemo. Ako ke kukoka muchima kechi ibyo ne!—kukoka muchima, buwame, bukimote, lusa, butekanye, kabiji ne Mupashi Wazhila. Mwamona?

²⁰¹ Oo, mulongo, nyenga, tuji—tuji pa Kadeshi-beniya. Obewa ubena kutompa. Bufuku bwapita Mupashi Wazhila waponejile pe atweba, waishile mwi atweba, nobe mwela mukatampe

upupa. Waikajile pe anweba bavula. Leelo bamwingilo babapepulenga manzubo kuno ne kokwa, na kubikapo maboko ne kwibalombelela aba babena kukeba Mupashi Wazhila. Kechi mutoole kya kupingakenyamo ne. Kechi musende kiji nobe kyongyo ne. Kechi musende kintu kiji nobe byakumvwa ku mubiji ne. Obewa pembelela ponkapo poso Lesa wakulenga bu kilengwa kipya, wakulenga obewa bumuntu bupya. Obewa ubena Kwikitompa pano, kwi Kitompa, bino lekai Nkunda emutangijile kufikatu ne ku tebulu, kabiji—kabiji aye Mwanamukoko ne Nkunda baikele pamo, kabiji ne kwiyowa myaka ne myaka pa Kyambo kya Lesa. Mambo Kikemana kasa kwabula jiulu nangwa ntanda ne; Kyambo kya Lesa kikashala. Abo bukine.

²⁰² Mwane kechi mulanguluke mba Nazhobakanako ne. Inge Amiwa byo nji, Amiwa kechi natazha mukyokyo ne. Inge Ami. . . Naketekela mba Nakumbula ao mepuzho; Nauba, monka mwaila maana ami.

²⁰³ Kabiji onkao mambo, mu Bahebelu 6, inge mwakonsha kumona, Paulo ubena kwamba ku Bahebelu baambile mba, “Kyawama, tusakuya nenu kulutwe kufika ne pano.” Bakasanguka. Mwamona? Waambile mba, “Pano, uji. . .” Aba beya kabiji batompako.

²⁰⁴ Najikutala kunyuma mu kishimikwa. Na kwimumweshwa kiyukilo kya Lesa Mumi. Naketekela mba Amiwa kechi mbena kutazha kikye ku ngubilo ya bumuntu bwami ne. Nafumine ku mbung’eno kechi papita kimye kyabaya ne, kabiji naishile kuno, ne kubijika kwi anweba mba mulunda wawama, muntu mulunda nami, mo twipaila nyama, muntu waikala wawama bingi kwi amiwa, muntu wafikapo kala ku kipwilo kyami, kabiji waikala mulongo wami; Namwichile mba Busty. Jizhina janji ke Everett Rogers; waikalanga mu Milltown. Baanga bavuluka amiwa kwiya kuno na kwikibijika? Aye wajinga kuno mu kipatela; badokotala bamutumbwile, bamushikwile, kabiji wajinga wayulwamo na kaasa babweleletu bamutungwa. Baambile mba, “Aye ukazhimang’ana bukijitu; mu milungu icheche nishi waya; abyoy byo byonka bikekalako. Aye ukapwa, byo byonka.”

²⁰⁵ Anweba vulukai byo Naimene kuno ku pulatifomu, na mulombelejile? Naile konka kwa na kutwela mu kibamba, kintu kimo kyajilenga mu muchima wami. Natwelele mu kibamba, kabiji byo nalupwile bantu bonse panygye pakuuba mba Ngube. . . Mulongo Everett walajile monkamwa. Kabiji mukavuluka kikye. Natwelelemo; Naambile mba, “Mulongo—Mulongo Busty.” (Namwichile mba Busty.)

²⁰⁶ Myaka yapita yavula kunyuma potwajinga na mpwijilo ku brush arbor kokwa, bonse ba Methodist kunyuma kokwa ku katumba (Gertie, umo wa mwi abo), watezhimukile wapona,

wasumbijilenga pa nkito kya magelepu pakuuba mba amone byo Nsakwamba, kabiji byonkabya, bachiyingenga kipwilo kya Methodist amba basakwibafumyamo. Kabiji pano, Naile kabiji najinga na kimwesho kokwa, kabiji namwene nyama yalumbama mu mbekete. Nakwachile mulumba wa masabi ne kubika ku nkungo, kubika—kubika ku mizhinge, kabiji nakasa ne yoya mizhinge. Kabiji byo Namwene... Kabiji byonse bye byajinga mu kimwesho; Nashiile—nashiile jibumba ja bantu kasa baimana pa nkito abwa bufuku kabiji naile peulu ya katumba pa Mulongo Wright. Kabiji kechi batainepo ne lukeelo lwalondejilepo. Naambile mba, “Kafwako nangwa umo wa mwi anweba ne. . .”

²⁰⁷ Kimye kyo Naimene byobya nakusapwila, akya Kyeya kyaishile; awa Mumbulungwa wa Mujilo waimene byobya peulu kulubaji lwami ne kwamba mba, “Mfuma kuno uyenga mungye; Kesamba nobe.” Kyajinga aja juba jimo, juba njalondejilepo jo bantaine amiwa pa katumba. Kabiji Najinga kokwa; Nafile motoka wami mu malele, kabiji naikele pa mutumba na kulomba bufuku bonse kabiji ne juba jalondejilepo. Bamo mwiabo baishile kokwa, bataine motoka kabiji ne kwiya baishile konkakwa. . . Aja jajinga juba Mulongo Graham Snelling, kuno, po atambwile Mupashi Wazhila kabiji ne kwitwa mu mwingilo.

²⁰⁸ Akwa kulubaji lwa katumbatumba Nkonalajilenga, kabiji Aye—Aye wambujile bintu byapusanapusana kuuba kabiji ne yonse misambo yaotwajinga nayo. Aye wapaine kimwesho kya kumona aja jisabi jiji kumuzhinge, ne kwamba mba, “Akye ke kipwilo kyobe kya ku Milltown.”

Kabiji foolo nangwa faivi baponene; kabiji Naambile mba, “Yeng’anyi oo?”

Waambile mba, “Umo wa mwi abo ke Guy Spencer ne bakazhi banji. Mukwabo ke Spencer mukwabo, kabiji ne banji.” Kabiji Aye wambujile bapusanapusana, baanga bakapona.

²⁰⁹ Amiwa ne babuujiile; Naambile mba, “Kafwako nangwa umo wakujako ne.” Bakazhi bami ne Amiwa kechi. . . Kyajinga kasa tukyangye kwisongola ne; kabiji wayile ku nzubo na kwikala bufuku bonse na Nyenga Spencer, mwanamukazhi wawama. Mwanamulume wawama, Guy Spencer ujitu pamo muntu wawama nobe waimana mu sapatu yakiseba. Kabiji aye—kabiji aye waile konkwa, kabiji Opal waambile mba, “Pano, talai. . .” Kwi Meda, waambile mba, “Bino, Meda, Naketekela Mulongo Bill.” Aye waambile mba, “Bino umvwe Opal wafwa zala, wafwainwa kuja kashinkwa ne make.” Nanchi waile konkwa, kabiji wakanga ka shimkwa ne make, kabiji waikala panshi na kuja, kabiji watatula kwamba mapesho, kabiji washakamina pa tebulu, na kujila, kechi wakwachileko ne. Nanchi baishile na kwipaya nyama.

²¹⁰ Kabiji akwa ku katumbatumba aja juba, Aye wambujile bintu bikamweka. Aye waambile mba, “Abo bakaya, kabiji abo bonse bakaya.” Bino Aye wajinga na nyama yavula yabikwa-mubikopo. Aye waambile mba, “Lama iye yakwingijisha palutwe bantu ba ku Milltown.” Kabiji bufuku bukwabo byo Naumvwine Mulongo Creech...Aye waikela muno bufuku bwapita. Amiwa kechi...Mulongo Creech, uji muno buno bufuku? Kimye Mulongo Creech waishile kwi amiwa, wangichile, ne Nyenga Creech, nakujila; bashaji bobalajile popa. Waambile mba, “Mulongo Bill, kumubuula ne. Aye ubena kufwa.” Waambile mba, “Aye bamuja na kaasa; badokotala bamushikwile, kabiji wayulatu na kaasa monka mokyafwainwa kwikala.” Kabiji Will Hall (kabiji anweba bonse mwamuvuluka), kimye dokotala umo kyo amushikwile kabiji wajinga uji na kaasa ponse ponse...Natatwile kuya na kwipaya baluyeye alwa lukeelo, kabiji Namwene ma apozi abena kupepela mu luumu. (Anweba mwavuluka joja jishimikila ja kikye?) Kabiji awa mwanamulume uji na bumi leelo. Aya ke myaka yapita kunyuma. Aye ne Mulongo Busty bajinga balunda.

²¹¹ Kabiji Naile ku kipatala, kipatela kyakatataka (Nalubamo byo bekitela, kokwa ku New Albany) kipatela kyakatataka. Kabiji Naile konka na kumona Busty; kabiji byo Naile mu kibamba, Naambile mba, “Mulongo Busty.”

Aye waambile mba, “Mulongo Bill.” Wakwachile kuboko kwami na yoya nyimwino ikatampe ya maboko akala; wapitamo mu Nkondo Itanshi ya Ntanda yonse, kechi kwi kyamba mu kyeenyi kyanji ne, bino wajingatu na muchima wawama ubena kupema mu joja jilaya jakala ja bblue. Wakwachile mu kuboko kwami. Najinga mu nzubo yanji; na kuja mu nzubo yanji; nalajile mu nzubo yanji, pamo nobe Najinga mulongo wanji. Baana banji ne bonse, bajitu—bajitu nobe bulongo bwa mumashi. Muntu wawama.

²¹² Kabiji aye...Bino kechi waishilepo kwi Nkambo kyazhika ne. Aye...Namubatizhe mu Jizhina ja Yesu Kilishitu. Bino joja juba awa Methodist musapwishi byo aambile mba, “Muntu yense wabatizhiwa mu Jizhina ja Yesu Kilishitu, mfuma muno mu tente wami.” Akya kyajinga kyawama. George Wright ne bakwabo balupukilemo. Aa mabaanga Naile kookwa na kubatizha mu Jizhina ja Yesu Kilishitu pa Totten Ford. Kipwilo kyanji kyonse kyatwelele mu meema ne kubatizhiwa mu Jizhina ja Yesu Kilishitu. Nanchi Natwajijiletu. Akya kyajingatu bulongo. Lesa inge waikala kulubaji lwenu, ng’anyi wakonsha kukwimena? Amiwa kechi nayuka kwaile yewa muntu ne, kika kyamumwekejile.

²¹³ Nangwa byonkabyo, Natwelele mu kipatela. Amwa mwajinga Busty walajile byobya kasa ayulwa na kaasa, badokotala kechi bakonsheshe, kechi baubilepo kintu ne bino bamusonenetu. Busty waambile kwi amiwa; waambile mba,

“Mulongo Bill, akye kiji na kilumbululo kimo. Kintu kimo kyamwekele.”

Naambile mba, “Ee, Busty.” Natatwile kumvwa awa Mupashi nobe yewa mwela upupa ye Najikwambangapo, mwayukatu, kasa abena kwiya.

Aye waambile mba...Byo Nafikile mumwe, mwajinga kankongolo mu yewa koono, kaimana mu yewa koono. Kankongolo ke lulayang’ano; lulayang’ano lwa Lesa. Lesa walayang’ene lulayang’ano ne amiwa pa yewa mutumba aja juba. Nabikile maboko ami pa Mulongo Busty ne kumulombelela.

Badokotala baambile mba, “Usakuzhimang’anatu. Aye ukabwelangatu panshi. Kechi kujipo kintu kimo ne...Aye ukaya mu moba achechetu.” Kabiji Busty Rogers...Ayo yajinga milungu ne milungu ne milungu yapita kunyuma, kabiji Busty Rogers, waikala kunyuma kukwe mu kipwilo bufuku buno, na bututulu kabiji wakosa bulongo nobe byo Namumwenenga mu bumi bwami. Imanai, Mulongo Busty. Ao byo aji. Twayai tupane lutakaiko kwi Lesa, muntu yense.

Bakumejile pa nzubo ya peulu,
Bonse balombelenga mu Jizhina Janji.
Babatizhiwe na Mupashi Wazhila,
Kabiji bulume bwakwingila bwaishile.
Pano, Aye byo ebabuujile aja juba
Aye ukakubila obewa mu musangotu umo.
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Amiwa ne umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo;
(Aleluya!)

Umo wa mwiabo, Amiwa ne umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Nangwa babo bantu kechi bakonsha kwamba
mba byo baji ne,
Nangwa kwitota nalulumbi lwa inontnda,
Bonse batambula Pentekositi wabo,
Kubatizhiwa mwi Yesu mu Jizhina;
Kabiji babena kubulang’ana pano baji palepa
ne mu bukata,

Bulume bwanji bujitu pamo.
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Amiwa ne umo wa mwiabo, Amiwa ne umo wa
mwiabo,

Amiwa njibingi na lusekelo mambo Nakonsha
kwamba mba Amiwa ne umo wa mwiabo;
(Aleluya!)

Umo wa mwiabo, Amiwa ne umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Pano, iyai, mulongo wami, kebai ao mapesho
Akyo kikatokesho muchima obe kufuma ku
bubi,

Akyo kikatatula ma bbelu alusekelo kujila
Kabiji akalama mweo obe na kutema mujilo;

Oo, mujilo ubena kupya mu muchima wami,
Oo, lukumo ku Jizhina Janji,

Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Twayai tumwimbe!

Oo, umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo;
(Aleluya!)

Umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Baanga baji umo wa mwiabo? Sutulai maboko enu. Oo, ami!
Oo, kyalusekelo Amiwa Amiwa ne umo wa mwiabo!

Umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo;
(Aleluya!)

Umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Bakumejile pa nzubo ya peulu,
Bonse na kulomba mu Jizhina Janji,
Abo babatizhilwe na Mupashi Wazhila,
Pano bulume bwa mwingilo bwaishile;
Pano, Aye byo ebobijile aja juba
Aye ukakubila obewa mu musangotu umo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Oo, umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo;
(Aleluya!)

Umo wa mwiabo, umo wa mwiabo,
Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Pano, kimye kyo tubena kwimba ao kolasi ne jikwabo, Nasaka umo umo mwi anweba kwaluluka, kabiji imunai muntu umo uji kulubaji lwenu, ne kwaamba mba, “Yobe umo wa mwiabo nyi?” Mwamona? Kijitu bulongo.

Oo, umo wa mwi abo, (Nayuka mba obewa byo uji, Mulongo Neville. Nayuka mba obewa byo uji, Mulongo Capps. Nayuka mba obewa byo uji. Nayuka mba obewa byo uji. . . ? . . .)

. . . Amiwa ne umo wa mwiabo;

Oo, umo wa mwiabo, umo wa mwiabo,

Amiwa njibingi na lusekelo mambo Nakonsha kwamba mba Amiwa ne umo wa mwiabo.

²¹⁴ Oo, anweba kechi mwasekela mba mwi umo wa mwiabo nenyi? Baanga bakonsha kutemwa kwikala umo? Sutulai kuboko kwenu. Kijitu bulongo. Pano, Mbeni kwimwimbila yuwe:

Pano iya mulongo wami, kebai ao mapesho
Akyo kikatokeshi muchima obe kufuma ku
bubi,

Akyo kikatatula kuvumya mabbelu alusekelo,
Kabiji kikalama mweo obe na kutema;

Oo, kibena kutema mu muchima wami,

Oo, lukumo ku Jizhina Janji,

Amiwa njibingi na lusekelo mambo Nakonsha
kwamba mba Amiwa ne umo wa mwiabo.

Oo, umo wa mwiabo, umo wa mwiabo,

Amiwa njibingi na lusekelo mambo Nakonsha
kwamba mba Amiwa ne umo wa mwiabo;

(Aleluya!)

Umo wa mwiabo, Amiwa ne umo wa mwiabo,

Amiwa njibingi na lusekelo mambo Nakonsha
kwamba mba Amiwa ne umo wa mwiabo.

²¹⁵ Vulukai awa nsongwakazhi mucheche byo aambile kwi Petelo mba, “Bushe anweba kechi mwi umo nenyi?” Amiwa njibingi na lusekelo, kechi ibyo nenyi? Mwayukatu, Petelo waambile pa juba ja Pentekositi, “Akye kyo Kyokya!” Bino, Amiwa kimye kyonse ng’amba mba, “Inge *Akye* kechi kyo *Kyokya ne*, Njina lusekelo Njina *Kikye*, kupembelela *Kyokya* kwiya.” Akyo ibyo. Amiwa nasekela pa *Kikye*.

Mambo Amiwa ne umo wa mwiabo, Amiwa ne
umo wa mwiabo

Amiwa njibingi na lusekelo mambo Nakonsha
kwamba mba Amiwa ne umo wa mwiabo;

Oo, umo wa mwiabo, umo wa mwiabo,

Amiwa njibingi na lusekelo mambo Nakonsha
kwamba mba Amiwa ne umo wa mwiabo.

²¹⁶ Oo, bushe kiky kechi kyawama nenyi, twaikala pamo mu mampuzha a Mwiulu mwi Kilishitu Yesu, kuja pamo na

Mupashi, kuja pamo Kyambo, na kwamba pa bintu byawama bikeya. Ke kintu kyawama bingi. Amiwa njibingi na lusekelo pa kuyuka kyokyo, kechi ibyo nenyi? Bushe kechi mwasekela mba mwi Benakilishitu nenyi? Bushe kechi muji na lusekelo amba muji panshi ya Mashi nenyi? Aye ukeya juba jimo jibena kwiya, kabiji tukayanga Nanji. Pano langulukai, bukote bonse bukafumapo pe atweba; misongo yonse, byalumanamo byonse, bumi bufwa bonse bukapipulwa. Oo, ami! Nakonsha kulangulukatu pa balongo batemwe bakala baimene kuno. Navuluka... Baanga babena kuvuluka Rabbi Lawson? Ami, bavula bamwianweba. Nakonsha kumumona kasa akwata aya koto yakala konka kuno. Kabiji Amiwa nishi naikala kunyuma kokwa. Aye waimbanga yuwe lwimbo mucheche... (Pa mineti umo Teddy, mulongo.) Amiwa nsakweseka, kumona kana Nakonsha kutana chuni wanji. Amiwa kechi nayuka ne.

Akwa kubena nkupembelela jakesha jawama,
Ako bibelo bitoka kobishikuka,
Kabiji umvwe Naabuka yuwe ubola
wabulanda,
Amiwa kakokoloka ku Lubaji lukwabo.

Juba jimo kakila pafwainwa kufika muntu,
Juba jimo, Lesa ye yekatu wayuka kwepi
nangwa kimye,
Ng'endo ya bumi ikemana,
Nanchi Nkaya nakwikala ku mutumba wa
Ziona. (Ee.)

²¹⁷ Ao mawilo acheche abena kuzhokoloka mwi atweba—kumona, kutopa, kukwata, kunusha, ne kumvwa, ao masesi acheche ne mawilo abena kwenda mu buno bumi, juba jimo bakemana. Nanchi amiwa, amiwa mwine, kabiji anweba, tukaya na kwikala ku mutumba wa Ziona. Oo, Natemwa kyokyo, kechi ibyo nenyi? Twayuka mba tuji na luketekelo lwapeshiwa. Kijitu bulongo. Baanga bayuka lwimbo wetu wakala wakubatizhamo? Pano, tusa kusingya byobyoy. Twayai tutole lwimbo wetu wakulupukilamo:

Yanga Najo ja kwa Yesu,
Mwaana wabulanda ne wamalwa;
Jikakupa lusekelo ne lutekenesho,
Yanga Najo konse.

²¹⁸ Yanga Najo ja kwa Yesu. Ubatu kyokyo, byo mubena kuya. Kijitu bulongo, bonse pamo. Kechi mulubeko ne, pa eiti koloko lukeelo bitupa bya milombelo bakapana bya mbung'eno. Mbung'eno ikatapa pa naini-sate. Amiwa nkasapwilanga pa teeni. Milombelo ya bakolwa ikatatula pepi nobe leveni koloko.

²¹⁹ Keesha mute, ja mabaanga kukekala mbila ya busapwishi pa tabbanako. Kabiji keesha bufuku, bonse balapila bubu bwabo bonse bino kechi mwabatizhiwa ne, kukekala... kizhiba

kikashikuka; tukabatizha bantu mu Jizhina ja Nkambo Yesu Kilishitu.

²²⁰ Muntu yense twayai pamo, kimye kyo tubena kwimba na mawi akatampe. Mulongo Busty, kechi wayuka ne byoji wa lusekelo ne kumusachila Lesa. Mwayukatu, aye waile kwi dokotala. Kabiji bambula mba dokotala wamuntajile, kabiji kechi wayukile bya kulanguluka ne. Aye kechi waketekejile mba ye muntu umo ne. Oo, kechi kyafyamika Lesa kyo akonsha kuuba ne. Bushe kyokyo kechi kiji bulongo nyi? Kijitu bulongo.

Yanga Najo . . .

Ivumyai!

. . . ne obewa,

Mwaana wabulanda ne wamalwa;

Jikakupa lusekelo ne lutekenesho,


Pano, Yanga Najo konse.

Jizhina Jawama, (Jizhina Jawama!) Byo
janemesha!

Luketekelo lwa ntanda ne lusekelo lwa
Mwiulu;

Jizhina Jawama, (Oo, Jizhina jawama!) Byo
janemesha!

Luketekelo lwa ntanda ne lusekelo lwa
Mwiulu.

²²¹ Kijitu bulongo. Napana mpwijilo ku kafunga. Aye uji na byambo bimo, nangwa kutongola muntu umo etulupule, nangwa kyonse kiji mumilanguluko yanji. 

MEPUZHO NE MIKUMBU PA MUPASHI WAZHILA KDE59-1219
(Questions and Answers on the Holy Ghost)

NGUBILO, NTANCHIKILO NE LUFUNJISHO LWA KIPWILO LWALONDANKANA

Ino Mbila na Mulongo William Marrion Branham, yalupwilwe patanshi mu Kizungu pa Kibelushi mabaanga abufuku, Kuvumbi 19, 1959, pa Branham Tabernacle mu Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org